













# বিলেত দেশটা যাটির

শ্রীমতী জ্যোতির্মালা দেবী

গুরুদাস চট্টোপাধ্যায় এণ্ড সন্স  
২০৩।১।১, কর্ণওয়ালিস স্ট্রিট, কলিকাতা

## এক টাকা

“ঐ বিলেত দেশটা নাটির,  
সেটা সোনার রূপোর নয় :  
তার আকাশেতে হৃদয় ওঠে,  
আর ঐ মেঘে বৃষ্টি হয়।”

.....**দ্বিজেন্দ্রনাথ**

গুরুদাস চট্টোপাধ্যায় এণ্ড সন্সের পক্ষে ভারতবর্ষ প্রিন্টিং ওয়ার্কস্ হইতে

শ্রীগোবিন্দপদ ভট্টাচার্য্যর দ্বারা মুদ্রিত ও প্রকাশিত

২০৩১১, কর্ণওয়ালিস্ স্ট্রীট, কলিকাতা

পুস্তক সংখ্যা

পরিগ্রহণ সংখ্যা ১২৮

## উৎসর্গ

শ্রীমা ও শ্রীঅরবিন্দের

চরণে—

শ্রীমা—

ওগো      কিরণ-প্রতিমা,      প্রেম-মধুরিমা,

                 শুভ্র জ্যোছনা ধীর !

হেথা      এলে কারে চাহি'      স্বধা-তরী বাহি'

                 ছায়াপথে উষসীর ?

হের,      নীলিমের বুকে শশী উন্মনা—

                 পরশে তোমার রাঙে ধূলিকণা,

সন্ধ্যার তারা      সম্বিতহার,

                 আকুল সাগরনীর !

দেলে      ফুল স্বকুমার      শ্যাম-লতা-হার,

                 দীপমালা রজনীর ।

ওগো, কার প্রেরণায় নামিলে হেথায়

রূপালি নিঝর-রেশে :

ঢালো বিরহী বিধু-র স্বপ্ন মেদুর

অবনী-কাজল-কেশে !

রাখি' উজল দীপালি গগন-বিতানে

আঁখি নত করি' চাও নিশা পানে—

পলকে উছলি' তিমির বিদলি'

হাসে তব উষা-তীর !

কার মিলন-স্মরণে বাজিছে চরণে

আলো-ছায়া-মঞ্জীর !

—জ্যোতি

শ্রীঅরবিন্দ—

মোহন ! ঘন-শ্যামল-তনু !

এলে নব সাজে ।

সুন্ধ শঙ্খ, মৌন বাঁশি,

চরণে নত কুহুমরাশি :

‘তিমির নাশি’

মিহির-হাসি

কৌস্তভসম রাজে

মোহন ! ঘন-শ্যামল-তনু !

এলে নব সাজে ।

রাস-রঙ্গ করি' নীরব

অতল-মস্ত-মস্ত্রে তব' :

প্রথর-বিভব

ফেনোৎসব

মুখর মোহ লাজে ॥

মোহন ! ঘন-শ্যামল-তনু !

এলে নব সাজে ।

সুধানিলয়-নীল-নয়ন,

কণ্ঠে নিধিচ্ছন্দ গহন

করি' বন্দন

গীতি-গগন

নিধ্বনি নতি যাচে ॥

—জ্যোতি

आर्य

---

---

---



## রবীন্দ্রনাথ :

লেখিকার সম্বন্ধে আশ্বাসের কারণ রয়েছে তাঁর “রাশিয়ান ক্যাট” গল্পটিতে। তার মধ্যে যে-বেদনা আছে তা অল্প দক্ষিণা দিয়ে বিদায় করবার মতো নয়, তার প্রাপ্তিস্বীকার করতেই হয়।

## পরিচিতি

জ্যোতির্মালার সঙ্গে আমার পরিচয় হয় ১৯২৭ সালে—পারিসে। পরে স্কটলাণ্ডে লণ্ডনে বার্মিংহামে নিকট সান্নিধ্যে অন্তরঙ্গতা হবার সুযোগ ঘটেছিল। সেই সময়েই জীবন সম্বন্ধে তাঁর সন্ধানী মনের পরিচয়ে আমি বিস্মিত হই। তখন অবধি অত অল্প বয়সে স্বদেশীয়া কারুর মধ্যে আধ্যাত্মিক সত্যের জ্ঞে এত তৃষ্ণা দেখবার সৌভাগ্য আমার হয় নি।

সাহিত্য সম্বন্ধেও তাঁর ঔৎসুক্য লক্ষ্য করেছিলাম—কিন্তু ললিত সৃষ্টি তো শুধু ঔৎসুক্যে হয় না, অন্তঃপ্রেরণার অপেক্ষা রাখে। এখানে সম্প্রতি এসে শ্রীঅরবিন্দ শ্রীমার দিব্যস্পর্শে ও বোগশক্তিতে সেই প্রেরণা পাওয়াতে সাহিত্যে সৃষ্টির দিক তাঁর খুলে যায়—কথা-সাহিত্যে, যেমন কবি হারীজনাথের খুলে গিয়েছিল—ইংরাজি কাব্যে।

জ্যোতির্মালার আগেকার গল্পের সঙ্গে তাঁর বর্তমান গল্পের দ্রুত বিকাশ তুলনা করলে এ-খুলে-বাওয়ার কথা আমার মনে না হ'য়েই পারে না। তার ওপর যখন ভাবি : বিলেত-দেশটা-মাটি'র গল্পগুলি তাঁর কথা-সাহিত্যে হাতে-খড়ি—তখন মনে বড় আনন্দ হয় ভাবতে যে, অন্তরে প্রেরণার ঢল নামলে সে নিজেই নিজের পথ কেটে নিয়ে এমনি সহজেই চলতে পারে। এ-কথা জানতাম বহুদিনই, কিন্তু তবু প্রতি জানা সত্যও যখনই প্রত্যক্ষ হ'রে ওঠে—একটু চমকে দেয়ই। যিনি কখনো গল্প লেখেন নি তাঁর প্রথম গল্পেই এমন বলিষ্ঠ সাবলীল ভাষায় ওদের দেশের ভালো-মন্দ এমন নিপুণ দরদী অথচ তীক্ষ্ণ ভঙ্গিতে ফুটে-ওঠা, ছোট গল্পের পরিসরে ওদের সভ্যতার অন্তঃশীলা নানা ধারার রীতি-নীতি ফলিয়ে তোলা এত সহজে এমন সাবলীল ছন্দে—!—জানলার ছোট

একটা পাখী 'দিয়ে সমস্ত আকাশের অনেকখানি চোখে পড়ে :  
জ্যোতির্মালার স্কুমার রূপরেখায়ও ( বিশেষ ক'রে তাঁর বড় উপন্যাসে )  
তেমনি ওদের অচিন বিস্তীর্ণ সভ্যতার নানান গুণাগুণ ছবির মতন ফুটে  
উঠছে ক্রমে ক্রমে ।

যাঁরা গল্পে নিছক গল্প চান তাঁদের এ-গল্পগুলি 'কি রকম লাগবে বলা  
কঠিন—কারণ মাহুষে নাহুষে রুচিভেদ এত বেশি যে, সময়ে সময়ে কুণ্ঠা,  
এমন কি ভয়ও, একটু জাগেই কোনো শিল্পকলার রসোত্তীর্ণতার সম্বন্ধে  
কিছু বলতে—তবু আমার মনে হয় যে, পাঠক যদি সত্য দরদী হ'ন  
তবে এ-কয়টি ছোট গল্পের মধ্যে দিয়েই লেখিকার সত্যসন্ধানী মনের,  
স্কুমার চিন্তের, ঋজু দৃষ্টির ও নারীস্বলভ দরদের পরিচয় পেয়ে কমবেশি  
মুগ্ধ হবেন । তবে বেশি মুগ্ধ হবেন বোধহয় তাঁরা যাঁরা গল্পে শুধু গল্প—  
অর্থাৎ ঘটনা-পর্যায়—চান না, চান : অন্তরের নানা উর্ক স্বপ্ন, সৌন্দর্যের  
তৃষ্ণা, সত্যের আকৃতি ;—এক কথায়—যাঁরা গল্পে চান অন্তর্মুখিতা  
তাঁরাই বোধ করি এ-গল্পগুলিতে খুসি হবেন সবচেয়ে । অন্তত আমার  
এই রকমই মনে হয়—আমি নিজে সব সাহিত্যেই বহিমুখিতার চেয়ে  
অন্তর্মুখিতার রসমূল্য বেশি দেই ব'লে ।

এ-গল্পগুলি সবই-যে আলেখ্য-শিল্পে একান্ত অন্তর্মুখী তা নয় অবশ্য—  
যেমন অন্তর্মুখী বলা যেতে পারে জ্যোতির্মালার “সন্ধান” ব'লে বৃহৎ  
উপন্যাসটিকে । সেটি ক্রমশ প্রকাশ্য । কিন্তু এ-সব গল্পেও আশা করি  
দরদী পাঠকের চোখে পড়বে যে, লেখিকা বাইরের ছবি আঁকবার সময়েও  
তাকে এঁকেছেন অন্তর্মুখী ভঙ্গিতেই, চূর্ণ তরঙ্গের চেকনাই ফলাবার  
সময়েও দৃষ্টি তাঁর নিবন্ধ বাইরেরকার শীকারে নয়—অতলেই : তাই ওদের  
দেশের বাইরের চুল-চলনের ছবির মধ্যে দিয়েও তিনি ফুটিয়েছেন কোথায়

ওরা অসার, কোথায় ওদের ভড়ং জীবনে কোন্ বস্তু গভীর কোন্ বস্তু সস্তা। এই ভঙ্গিকেই আমি বলতে চাই অন্তর্মুখী ভঙ্গি। এ-ভঙ্গি জ্যোতির্মালার এত সহজে আরম্ভ হয়েছে দেখেই আমার বিশ্বাস হয়েছে কথা-সাহিত্যে তাঁর ভবিষ্যৎ বিকাশ উজ্জ্বল—কারণ ভবিষ্যৎ যুগের কাব্য, সাহিত্য, শিল্প ঢের বেশি অন্তর্মুখী হবে শ্রীঅরবিন্দের এ-কথা অপ্রতিবাচ্য বলেই মনে হয়—বর্তমান শিল্পের অন্তর্মুখী প্রবণতাটিকে একটু তলিয়ে বুঝতে গেলেই। তবে লেখিকা আমার স্নেহভাজন বলে প্রথমটার আমার মনে একটু কুণ্ঠা হয়েছিল এ-সব কথা বলতে—আমি তাঁর রচনার একটু বেশি পক্ষপাতী বুঝি বা। অসম্ভব নয়—কারণ আমি না যতখানি ভালো লাগে অনন্ততঃ চিন্তে, অসাবধান ভঙ্গিতে ততখানিই ভালো বলে থাকি : বেশি এফেক্ট করার জন্তে হাতে রেখে কম ক’রে বলতে পারি না : অর্থাৎ কিনা, আমার স্বভাবটা রাশকড়া নিরপেক্ষ অতি-সাবধানী সমালোচক-বর্গীয় নয়। তাই ভেবেচিন্তে এ-গল্পগুলি ধূর্জটিপ্রসাদকে পাঠাই, বলে যে, বিশেষ ভালো যদি না লাগে তবে একটি কথাও যেন তিনি না বলেন। ( শ্রীঅরবিন্দ একবার আমাকে লিখেছিলেন যে, ‘আর্য্য’ লেখার সময়ে নানান বই-ই আসত তাঁর কাছে সমালোচনার্থে ; তাদের মধ্যে যাদের সম্বন্ধে তিনি মন খুলে ভালো বলতে পারতেন না তাদের সম্বন্ধে তিনি চুপ ক’রেই থাকতেন। এ-রীতিতে আমার মনও বরাবরই সায় দিয়েছে : যা ভালো লাগল না, যাকে স্বল্পায়ু মনে হ’ল,—সে অর্দ্ধমৃতের ’পরে কেনই বা খাঁড়ার বা ? ) বাহোক, ধূর্জটিপ্রসাদ আমাকে বরাভয় দিয়ে লেখেন : না ভৈঃ, এ আমার পক্ষপাত নয়—গল্পগুলি সত্যিই ভালো হয়েছে।

কেবল সঙ্গে সঙ্গে একটা কথা বলা আমার কর্তব্য : যে, আমি

নিজে তথাকথিত নিরপেক্ষ কঠোর দৃষ্টির চেয়ে দরদী দৃষ্টিভঙ্গিকেই ( তার ভ্রমসম্ভাবনা সত্ত্বেও ) প্রকৃষ্টতর সমালোচনা-ভঙ্গি ব'লে মনে করি—কেন না রচনার অন্তর্নিহিত সৌন্দর্য্য বেশি ধরা দেয় শেষোক্ত শ্রেণীরই মনের কাছে : দরদীরা সত্য গুণ যতটা বোঝেন, দেখেন, জানেন—বে-দরদী বিচারক কখনই ততটা বুঝতে দেখতে জানতে পারেন না। তা ছাড়া বিরাগীর কাছে অমুরাগীর ভালো-লাগাকে পক্ষপাত মনে হয়ই-বে। তাই না গেটে বলেছিলেন : “Aufrichtig zu sein kann Ich versprechen : unparteiisch zu sein aber nicht.” ( অর্থাৎ “অকপট হব এ-প্রতিশ্রুতি দিতে পারি, কিন্তু সেটা নিরপেক্ষ হবই এ-প্রতিশ্রুতি দেই কেমন ক’রে?” ) কিন্তু থাক এ-সব তর্ক, কেন না এ হ’ল রুচিভেদের সেই আদিম তর্ক—যার কোনো চরম নিষ্পত্তিই আজ পর্য্যন্ত কেউই ঠাউরে উঠতে পারেন নি। তাই উপস্থিত শুধু এইটুকু ব’লেই এ-পরিচিতির ইতি করি যে, এ-গল্পগুলি পড়বার সময়ে সহৃদয় পাঠক-পাঠিকা যেন এর মধ্যকার অন্তঃশীলা অন্তর্মুখী ভঙ্গিটি লক্ষ্য করেন, যেন মনে রাখেন একটি তরুণী বাঙালী মেয়ে খোলা মনে ও-দেশের দোষগুণ দেখছে ভারতের দৃষ্টিভঙ্গির নিকষে পাশ্চাত্য সভ্যতাকে খানিকটা যাচাই ক’রেই বৈ কি। তাহ’লে, মনে হয়, প্রথম প্রয়াসের ক্রটি সত্ত্বেও ঐ-গল্পগুলির সার্থকতা, উজ্জলতা ও রসালতা তাঁদের কাছে ধরা দেবে আরও বেশি, কেন না পূর্জ্জটিপ্রসাদ যতই সংশয় প্রকাশ করুন না কেন, ভারতীয় মন ও চেতনার একটা সত্য বৈশিষ্ট্য যে আছেই আছে এ-কথা প্রব—অপ্রতিবাণ। ইতি—

শ্রীঅরবিন্দ ঔষ্ম,  
পরিচিতির

শ্রীদিলীপকুমার রায়

নববর্ষ—১৩৪৩

## ভূমিকা

বাংলার সাম্প্রতিক সাহিত্যিক সমৃদ্ধির অস্তিত্ব নিদর্শনের মধ্যে একটি হোলো সূক্ষ্মতর দৃষ্টির সাহায্যে তথাকথিত তুচ্ছ বিষয়ের বিস্তারিত বর্ণনা, এবং অন্তর্গত হোলো ক্ষেত্রের পরিসর বৃদ্ধি। প্রথমটির সাক্ষাৎ সাধারণত মহিলা-সাহিত্যিকের লেখায় পাই : দ্বিতীয়টির পরিচয় মেলে বিদেশ-প্রত্যাগত একাধিক সাহিত্যিকের রচনায়। কোনো গৃহিণীর সঙ্গে যে-পুরুষ একবার ক'নে দেখতে গিয়েছেন তিনিই স্বীকার করবেন যে, তিনি যদি একবার কলম ধরতে শেখেন তবে বাঙলা সাহিত্যে তাঁর দান পর্যবেক্ষণের প্রথরতায়, পুঙ্খানুপুঙ্খ বিচারে, এবং অ-প্রধানকে মর্যাদা দেবার ক্ষমতায় প্রকাশ পাবে। তা ছাড়া পুরুষাট থেকে ড্রয়িং রুমের সামাজিক আলোচনার সঙ্গে অন্তত কথা-সাহিত্যের একটি নিগূঢ় সম্বন্ধ যে রয়েছে তার প্রমাণ মেলে 'উমা দেবী' এবং অপরাঞ্জিতা দেবীর কবিতায়, এবং 'শরৎকুমারীর ও জ্যোতির্মালার দেবীর দেশী গল্পে।

ক্ষেত্র-বিস্তৃতির জন্ত বিলেত-প্রবাসই প্রধানত দায়ী। •পূর্বেও বাঙালী বিদেশে গিয়েছেন এবং ফিরে এসে প্রবাস-জীবনের গল্প ও ডায়েরী ছাপিয়েছেন। সেই সব লেখার মধ্যে অনেকগুলিই সাহিত্যপদবাচ্য এবং এখনও আমাদের তৃপ্তি দেয়। কিন্তু কিছুকাল থেকে প্রবাসী সাহিত্যের উদ্দেশ্যটাই বেন বদলে গিয়েছে। শরৎবাবুর ব্রহ্মদেশে বাঙালী অপেক্ষাকৃত স্বাধীন। সেখানকার সমাজ-বন্ধন শিথিল, তাই শৃঙ্খলিত পাঠক-পাঠিকা তাঁর প্রবাসের বর্ণনা পড়তে ভালবাসেন। অনেকের মতে

ব্রহ্মদেশেই তাঁর নায়িকা সজীব হ'য়ে উঠেছে। তাঁর বিদেশী ও বিদেশিনীরাও জীবন্ত। বর্ণিত ঘটনা থেকে যুরোপীয় সভ্যতার রীতি নীতি অনুমান ক'রে নিতে হবে। অল্প বে-শ্রেণীর গল্পের ও নভেলের কথা বললাম তাতে অনুমানের অবকাশ নেই—সেখানে ঘটনাধারা ও চিন্তাশ্রোতাই প্রধান। ব্যক্তিগত জীবন সেই শ্রোতের ফুল।

অবশ্য মনে মনে শিক্ষিত সম্প্রদায়ের প্রায় সকলেই অনেকদিন থেকে বিদেশী। কিন্তু প্রত্যক্ষ অভিজ্ঞতার বিদেশী জীবনের ও মনের বে-পরিচয় পাওয়া যায় তার সঙ্গে কেতাবী পরিচয়ের তুলনা হয় না। কলসীর গঙ্গাজলে পুণ্ডার চেরে শ্রোতস্বিনীতে অবগাহনে পুণ্য বেশি—এ নিশ্চয়।

কালাপানি পার হওয়ার পূর্বেকার আতঙ্ক আজকাল সাহিত্যিক মঙ্গল-কামিনায় পর্যাবসিত হয়েছে। অনেকেই ভয় পাচ্ছেন যে যুরোপীয় জীবনের সঙ্গে প্রত্যক্ষ অভিজ্ঞতার ফলে আমাদের বৈশিষ্ট্য লোপ পাচ্ছে, এবং তারই ফলে আমাদের সাহিত্য হ'য়ে উঠছে তৃতীয় শ্রেণীর কন্টিনেন্টাল রচনার অনুবাদ ও অনুকরণ মাত্র। কিন্তু বাঙালীর বাঙালীত্ব ব'লে যদি কোন গুহসত্তা থাকে তবে সেটা আমাদের এতই মজ্জাগত যে তাকে চেতনারাজ্যের আদান-প্রদান ও চেতনাহীন অনুকরণের বহির্ভূত ভাবা যায় না কি? আর বাঙালীর জাতিগত মন ও মনুষ্যত্ব? ঐ ছুটি বস্তুর কোনোটি নিয়ে মানুষ জন্মায় না—ছুটি উৎপন্ন হয় ঘাত-প্রতিঘাতে, আকর্ষণ-বিকর্ষণে, মন্থনে।

আমি বাঙালীত্ব অর্থে একপ্রকার ঐতিহ্য বুঝি। বাঙালীর ঐতিহ্য যদি কিছু থাকে তবে সেটি বাঙালিনীর মধ্যেই প্রবহমান। এক কথায়, বাঙালী মানেই বাংলার মেয়ে। হয়ত, এখনও বাঙালী মেয়েদের মনের কোনো বালাই নেই—কিন্তু বাঙালী মেয়েদেরই চোখ সমাজ-গঠনের দিক

থকেও শরণাবাবুর প্রবাস-সাহিত্য তাঁর কল্পিত ভবিষ্যতের আভাস দেয়। কিন্তু ব্রহ্মদেশে অনেকে সম্ভ্রষ্ট ন'ন। সেখানকার বাঙালী-জীবনও যথেষ্ট পরিমাণে স্বাধীন নয়, সহজ নয়। আজকাল দলে দলে বাঙালী যুবক-যুবতীরা ভারতবর্ষের বাইরে যাচ্ছেন এমন সব দেশে—যেখানকার জীবন আমাদের মতন এইভাবে শৃঙ্খলিত নয়, যেখানকার সামাজিক ভাঙন-গড়নের গুরুভার কর্তাদের হাতে গুস্ত নয়, দেশস্থ যুবক-যুবতীর অমুপ্রেরণায় বতঃস্ফূর্ত। এঁরা যখন বিদেশী জীবনের বর্ণনা দেন তখন আমরা একটি চলিছু সভ্যতার পরিচয় পাই। পূর্বকার প্রবাসী সাহিত্যে যেতাম একজন বাঙালীর জীবনের উপর যেন একটি কঠিন বস্তুর আঘাতের বর্ণনা। কারণ বোধ হয় এই—তখন বিদেশী সভ্যতার রূপ ছিল স্থির।

যাঁরা কথা-সাহিত্যে ব্যক্তিগত জীবনকেই মুখ্য ভাবেন তাঁরা ঠিক ঐ কারণেই পুরাণো ধরণের বিদেশী গল্প ও নভেলকেই যথার্থ সাহিত্য বলবেন। যাঁরা ভাবেন এই যুগে ব্যক্তি নেই, ব্যক্তিগত জীবন অসম্ভব, এবং সভ্যতার রূপের দ্রুত পরিবর্তন ঘটছে বলে ব্যক্তি কোথাও দাঁড়াবার স্থান খুঁজে পাচ্ছেনা, আছে কেবল মন, আন্দোলন আর একীকরণ, তাঁরা নতুন ধরণের প্রবাসী-সাহিত্যে ঐ প্রকার সভ্য জীবনের প্রতিচ্ছবি দেখে উল্লসিত হবেন। জ্যোতির্মালা দেবীর গল্প প্রথম শ্রেণীর। বইখানির ছত্রে ছত্রে একজন বাঙালী রমণীর মনে বিদেশ প্রবাসের প্রতিক্রিয়া ফুটে আছে, মনুষ্য আছে। দৃষ্টিশক্তি আর মনুষ্যত্বের অভিসন্ধিতেই সাহিত্যিক প্রবৃত্তির উৎপত্তি, সেই প্রবৃত্তি গঠন পায় ভিন্ন ধরণের সংস্কৃতির সংস্পর্শে এসে। বাঙালী মেয়েদের মধ্যে অনেকেরই সাহিত্যিক প্রবৃত্তি আছে, কিন্তু তাকে মন বলা চলেনা। মন যার তৈরি হয়েছে তাই কলম চলে।



বাঙালী মেয়েদের মন তৈরি হ'লে বাংলা সাহিত্যের উন্নতি অনিবার্য, এবং অথবা অম্লকরণের আশঙ্কাও কম।

এই বিশ্বাসের বশবর্তী হ'য়ে জ্যোতির্মালা দেবীর প্রথম পুস্তকের ভূমিকা লিখছি। লেখিকা অনেকদিন বিলেতে ছিলেন, এবং যুরোপীয় জীবনের নানাদিকের সঙ্গে তাঁর পরিচয় নিবিড়। বইখানিতে দেশী ও বিলাতী উভয়শ্রেণীর গল্পই আছে। দ্বিতীয় শ্রেণীর গল্প পড়লেই লেখিকার স্বকীয়তা হানির ভয় অপসৃত হয়। তাঁর প্রত্যেক পটভূমিতেই পরিষ্কৃত হয়েছে রমণীমূলভ কমনীয়তা, সহৃদয়তা ও পর্যবেক্ষণশীলতা। অল্প ভাবে বলা চলে যে, ইংলণ্ডের সমাজ তাঁর দৃষ্টিশক্তির পটভূমি, তাঁর ভাবৈশ্বর্যের আধার এবং তাঁর মননশক্তির নিকষ। লেখিকার কল্যাণে সাহিত্যের বিস্তৃত অবস্থান একটি বিশেষ রূপগ্রহ করেছে—যেটি আমাদের ভারতীয়মন্দিরে নীপলক্ষ্মীর মতন বিরাজ করবে। বাঙালী মহিলার এই কৃতিত্বে গর্ব অমূল্য না ক'রে থাকা যায়না। তিনি দ্বিজেন্দ্রলালের মতন “বিলেত দেশটা”কে “মাটির” বলেছেন। এই উক্তিই কোনো জাত্যভিমান নেই—আছে সার্বভৌমিকতা, সেইজন্য তাঁকে অভিনন্দন জানাচ্ছি।

লেখিকার অগ্ৰাণ্ণ সাহিত্যিক গুণাবলী পাঠক-পাঠিকার বিচার্য। কিন্তু যার হাত থেকে এমন সুচারু আল্পনা বেরোয়, বিশেষ ক'রে, যিনি “রাশিয়ান ক্যাট”-এর মতন স্ত্রী গল্প লিখতে পারেন তাঁর শিল্প-প্রতিভা সম্বন্ধে আমি অন্তত নিঃসন্দেহ।

১৩৪২, লক্ষ্ণৌ

ধুর্জটিপ্রসাদ মুখোপাধ্যায়

## নিবেদন

“বিলেত দেশটা মাটির” বইটির ভূমিকার জন্তে শ্রীধুর্জটিপ্রসাদ মুখোপাধ্যায়ের কাছে কৃতজ্ঞতা জানাচ্ছি। নানা সাহায্য ও নির্দেশের জন্তে নলিনীকান্ত ও নীরদবরণের কাছে আমি ধন্য। শ্রীরামেশ্বর দে-ও অনেক সাহায্য করেছেন পুস্তক মুদ্রণ বিষয়ে। সুচারু প্রচ্ছদপটখানি এঁকেছেন আশ্রমের প্রতিভাবান কিশোরশিল্পী শ্রীমান্ রমেন্দ্রনাথ পালিত। শ্রীঅনিলবরণ রায়, শ্রীসোমনাথ মৈত্র, শ্রীসুরেশচন্দ্র চক্রবর্তী ও আরও অনেকে গল্পগুলি প’ড়ে উৎসাহ দিয়েছেন ব’লেও তাঁরা আমার ধন্যবাদার্থ।

শ্রীমতী ভার্জিনিয়া নারী-সম্বন্ধে তাঁর একটি উজ্জ্বল অভিভাষণ থেকে কয়েকটি সুন্দর লাইন উদ্ধৃত ও অনুবাদ করবার অনুমতি দিয়েছেন ব’লে তাঁকে ও তাঁর প্রকাশক হগার্থ প্রেসকে ধন্যবাদ জানাচ্ছি : স্নকবি নিশিকান্ত এটুকুর ছায়াঅনুবাদ করেছেন এজন্তে তাঁকেও। প্রচ্ছদ পত্রিকায় মূল ও অনুবাদ দেওয়া হ’ল।

শ্রীঅরবিন্দ আশ্রম

পণ্ডিচেরি

নববর্গ, ১৩৪৩

শ্রীমতী জ্যোতির্মাল দেবী

## ତୁଳ୍ଲିପତ୍ର

ପୃଷ୍ଠା	ପଂକ୍ତି.	ଅଶୁଦ୍ଧ	ଶୁଦ୍ଧ
୧୧୩'	୧	ହ'ତେ	ଥେକେ
୧୩୩ .	୧୬	ଅଜ୍ଞାନା	ଅନାନ
୧୫୧	୧୩	କ'ଟି	କ-ଟା

## VIRGINIA WOOLF :

But this creative power differs greatly from the creative power of men. And one must conclude that it would be a thousand pities if it were hindered or wasted, for it was won by centuries of the most drastic discipline, and there is nothing to take its place. It would be a thousand pities if women wrote like men, or lived like men, or looked like men, for if two sexes are quite inadequate, considering the vastness and variety of the world, how should we manage with one only?

# নারী

হে নারী,

শক্তির বিকাশ তব আপনার বৃদ্ধ-অধিকারী,

পুরুষের শক্তি হ'তে নে স্বতন্ত্র, চির-অনুগ্রহ নে—

‘ যুগ-যুগ-আম্প্‌হার প্রকাশ-প্রয়াসে ।

হে সাধিকা, সাধনার একান্ত নিষ্ঠায়

প্রাণ-প্রতিষ্ঠায়

পলে পলে—পুঞ্জিত বাধার বন্ধুর বন্ধন টুটি’

আজ তুমি উঠিয়াছ ফুটি’

উন্মুক্তির দীপ্ত শতদলে !

তোমার আশ্রয় বাণী আনিল অপূর্ব বার্তা বিশ্ব-নভাতলে ।

এবে তুমি ধ্বংস করিয়ে না,

বরিয়ে না পুরুষের যাত্রাপথ : পরিয়ে না

ছন্নবেশ—যাহা তব নয় ।

তোমার সঞ্চয়

থাক ভরি’

হস্তির নালকে—যেথা মল্লিকা-মঞ্জরী

মুক্ত গন্ধরাজ পাশে

অকুণ্ঠ উদ্ভাসে

দক্ষিণের আশীর্বাদ লভি’—শুভ্র ভালে

বিশ্ব-বিবর্তন তালে

কালে কালে—বিচিত্রের বিকাশে মগ্ন চলে জপি’ ।

( অনুবাদ—নিশিকান্ত )

# বি লা তী

সেটা সোনার রূপোর নয়  
নীল রক্ত  
রাশিয়ান ব্যাট  
অকারণ



## সেটা সোনার রূপোর নয়

ঘরের এক পাশে দুটি ছেলে বিলিয়ার্ড খেলছে, ~~অন্য পাশে~~ <sup>অন্য</sup> দুজন খেলছে পিং পং। স্বধীর বোস আর চারু দত্ত সিগারেট মুখে, পাউজারের ছপকেটে ছহাত চুকিয়ে দিয়ে কায়দা ক'রে জান্নায় ঠেশ দিয়ে দাঁড়িয়ে কখনো বা খেলা দেখছে, কখনো বা জান্নার কাচের ভিতর দিয়ে বাইরের সূর্যালোকিত রাস্তার দিকে চেয়ে চেয়ে কি-সব লেছে। মাঝে মাঝে দু-একটা মন্তব্য যা করছে তা শুধু ওদের মধ্যেই লেতে পারে। মহিলা তো দূরের কথা, তৃতীয় কোনো পুরুষ বন্ধুও সে-সব শুনলে একটু লাল না হ'য়ে, অন্তত তার কানের পাশটা একটু গরম না হ'য়ে থাকতে পারত না—এ আমি হলফ ক'রে বলতে পারি। কিন্তু স্বধীর আর চারুর দোষ কি? দুটি ঘনিষ্ঠ বন্ধু একত্র হ'লে—বিশেষত এমন সুন্দর জ্যোতিরুচ্ছল দিনে,—রাস্তায়-ঘাটে যখন রং-বেরঙের হলের ছড়াছড়ি, মাথার উপরে নীল আকাশ সুন্দরীর চোখের মতো নিন্দ্র মনোহর, সহরের মাঠে মাঠে, পাহাড়ে, দোকানে যেখানেই যাও সুরূপা শবেশার মনোরম কটাক্ষ, বার হাত থেকে কোথাও গিয়ে উদ্ধার পাবার পা-টি নেই তেমন দিনে—এত হাসি, গান, রূপের, রঙের সমাবেশের



মধ্যে—মনটা হাক্কা না হ'য়ে পায়ে কখনো,—একটি ছুটি হাক্কা কথা না ব'লে থাকতে পারে কেউ?—বিশেষত যাদের কোনো ভাবনা-চিন্তা মেই, নেই খাওয়া-দাওয়ার হাঙ্গাম, বাড়ি থেকে যাদের দিবা মাসের পর মাস গুণুতি টাকা এসে হাজির হয়—তা হোক না সে টাকা বাপের, বড়-ভাইয়ের—আর খসুরের হ'লে তোঁ কথাই নেই—বুকের রক্ত-জল-করা ধন! এমন নিশ্চিন্ত মুক্ত বেপরোয়া স্বল্প নিয়ে চাকু আর সূখীর যে মিনিটে মিনিটে রাস্তার দিকে তাকিয়ে মেরী, ডলি, লিলি আর রেবেকার দলকে দেখে একটু-আধটু আমোদ করবে এবং জ-ও নিচু-কথায় মাত্র—সত্যিই তো কেউ আর রাস্তায় নেমে গিয়ে “এরসী, এস” ব'লে ওদের বাহ এগিয়ে দিচ্ছে না—সুদু কথায়, নিরামিষ কথায় যে একটু আমোদ করবে, তাতে এত আশ্চর্য্য হবার আছে কী? এই ছুটিতে, ভাগ্যবান যারা, তারা তো বেরিয়েই গিয়েছে—কেউ দিয়েছে কটিনেটে পাড়ি, কেউ আইল্ অব্ ওয়াইটে, কেউ বা বেশিদূর না পারুক, অন্তত লগুনে। যে-হতভাগ্যের দল পরীক্ষা অথবা বাইরে যাবার যথেষ্ট টাকার অভাব ইত্যাদি কোনো-না-কোনো অনিবার্য কারণে বাধ্য হ'য়ে এই সূন্দর গ্রীষ্মটাকে মাঠে মারা যেতে দিচ্ছে, তারা এটুকুও যদি করতে না পারে, তবে এত বড় রাত ও দিন কাটে কী ক'রেই বা এই উত্তুরে দেশে—যেখানে পারী-র মতো না আছে সত্যিকার ‘ক্রিডম্’, না লগুনের চোখ-ধাঁধানো জাঁকজমক!

এ রকম নীরস জায়গার পড়তে আসাই বকমারী।—সূখীর হাতের সিগারেটটার আর একটা লম্বা টান দিয়ে আর একবার বাইরের দিকটার মুখ ফিরিয়ে—“হ্যালো, এ যে সন্দীপ! আয়ে, I say—সন্দীপ! সন্দীপ!” ব'লে জান্নায়া ছবার টোকা দিয়ে পথচারী বন্ধুর মনোযোগ

আকর্ষণ ক'রে তাড়াতাড়ি জান্নার স্কাচটা তুলে ধরলে এবং ঘাড়টা বের ক'রে দেখে আশ্চর্য হ'ল যে, সন্দীপ এখানেই আসছে।

—“তার পর, কী মনে ক'রে? হঠাৎ যে পথ ভুল? যা ঘাড়-মুখ গুঁজে পড়ছ তুমি, ভাবিনি যে একরত্তি আলো থাকতেও বই ছেড়ে উঠবে। ভাগ্যিস ডাক্তার রাত্তিরে পড়াটা বারণ করেছে—নইলে, একটা কাণ্ডই ক'রে বসতে। তার পর, খবর কী বলো?”

—“মড়ার ওপর আর খাড়ার ঘা কেন ভাই? তিন-তিনটে সাবজেক্ট বাকি প'ড়ে আছে জানোই তো। এবারও পাশ করতে না পারলে আর কোন্ ভরসায় টাকা চাইব দাদার কাছে? তোমাদের মতো ভা নয়—কত কষ্ট ক'রে এসেছি এ-দেশে,—তাও একটা বছর মাটি-অস্থি প'ড়ে। ‘অভাগা যেখানে যায়—সমুদ্র শুকায়ে যায়—’”

চারু সুধীরকে টিপে দিলে।

—“যাক গে সে-সব কথা। এখন হঠাৎ এলে যে এসোসিয়েশনে?”

—“এলুম এখানে তোমাদের দেখা পাবো জানি ব'লে—”

—“কেন রে, আমরা হঠাৎ কবে এমন ডুমুর-ফুল হ'য়ে উঠলুম ভোর কাছে? ব্যাপার কি?” বলতে বলতে শ্রামবর্ণ দীর্ঘদেহ একটি ছেলে এক কোণের টেবিল থেকে উঠে এল। সে এতক্ষণ এ-সব কথাবার্তা মন দিয়ে শুনছিল।

—“এই যে রাজেন, তুমিও আছ। ভালোই হ'ল সবাইকে একসাথে পাওয়া গেছে। ভাই, দেখো দিকি, স্কুমার আমাকে কী বিপদে ফেলেছে—বলা নেই কওয়া নেই হঠাৎ এক পোষ্টকার্ড—ওর বোন আসছে, ঘর ঠিক করতে হবে এবং তা-ও ঝটিতি—অর্থাৎ আজই।”

—“হু, স্কুমারটা চিরদিনই ঐ-রকম—”

—“দেখি কী লিখেছে”—চারু পোষ্টকার্ডটা হাত থেকে টেনে নিল।

—“ও বাবা, বোন নয়, একেবারে ‘ভগ্নী-মহোদয়া আসছেন’—”

রাজেন খামিয়ে দিল—“ধা, যা, স্কুর লেখার ধরণই ও-ই। ফাজলামো ছেড়ে দিয়ে এখন বরং চল্‌ ক্রম দেখতে বেরিয়ে পড়া যাক। কাল সকালেই তো এসে পড়বে দুজনে। স্কুর ঘর তো ঠিক আছেই তোরা ওখানে, না রে সন্দীপ?”

সন্দীপ মাথা নেড়ে জানালে—“হ্যাঁ।”

—“তবে আর কি, আর একটা ঘর কি পাওয়া যাবে না এই এত বড় এনিব্রু-সাইরে?”

—“ঘর পাওয়া যাবে না কেন? একটার জায়গায় চারটে দেখিয়ে দিতে পারি। কিন্তু এ তো তোমার আমার জন্ত নয় হে, এ যে গেডি নিয়ে ব্যাপার—”

—“এই সিঙ্ক-এ লগুনের মতন সহর ছেড়ে হঠাৎ এই পাড়াগাঁয় কেন পদার্পণ বাপু? কি হে সন্দীপ, স্কুমার লিখেছে না কি কিছু?”—সুধীর জিজ্ঞেস করলে।

সন্দীপ বললে—“না, স্কুমার রহস্য ভালোবাসে, জানো না? নিজে এঁখান থেকে গিয়েছে এই সবে দিন-পনের, এরই মধ্যে ফিরে আসছে— সঙ্গে আবার বোনকে নিয়ে—কেন, কি বৃত্তান্ত কিছুই লেখেনি।”

—“এলেই জানা যাবে রে, এখন চল্‌ একটু পা চালিয়ে, ঘর একখানা ঠিক ক’রে এসে যত পারিস জল্লা কল্লা করিস স্কুর বোনকে নিয়ে।”

সকলে হেসে উঠল।

অনেক খুঁজে-পেতে বাড়ি পাওয়া গেল—মার্চমন্ট রোডে। ঘরটা বেশ ভালই, রাস্তার উপরে, কাচ-দেওয়া বড় বড় জানালা, আসবাব-পত্র মন্দ নয়। ফ্ল্যাটখানি দোতলায়। সন্দীপ খুঁসি হ'য়ে বললে—“সুকুমার বলতে পারবে না—এডিনবরায় ওর ‘ভগ্নী মহোদয়ার’ অভ্যর্থনা যথোপযুক্ত হয়নি—তাও এত শর্ট নোটিশে।”

—“নাঃ—ঘর মন্দ হয়নি। এখন বুড়ি বাড়িওয়ালি—”

—“স্বোৎ, বুড়ি নয়রে, মাত্র একটি খুকির মা এবং খুকিটি এই—”  
একটি বছর-সাতকের লাল-ফ্রক পরা মেয়েকে দেখিয়ে চারু বললো।

—“ও একই কথা, বাড়িওয়ালি হ'লেই বুড়ি—আমাদের আদরের ডাক—”

—“তাই না কি? তবে যে বড়—”

—“চারু, রাখবি তোদের ফাজলামি ঋনিকক্ষণ? কাজের কথা—  
হোক—ডাক বুড়িকে। ওগো—ও খুকি, কী নাম তোমার?—এলিস? বা, দিব্যি মিষ্টি নামটি তো।—এলিস, লক্ষ্মী মেয়ে, যাও তোমার মাকে ডেকে নিয়ে এস তো আর একবার।—কোথায় গেলেন তিনি ঘরটা দেখিয়ে দিয়েই?—সন্দীপ, বুড়ি সব টার্ম্‌স্-এ রাজি না হ'লে আবার খরতে হবে অল্প রাস্তায়। কাগজখানা দে দেখি, এখানেই কাছে আর বাড়ি আছে কি না দেখা যাক!”

সুধীর বললে, “জানিস্ চারু, ওটা হচ্ছে কায়দা—কাগজখানা হাতে নিয়ে বাড়িওয়ালিকে দেখানো যে, তোমার এখানে না হ'লেও কুছ পরোয়া

নেই, আমরা মাঠে মারা যাবো না।” দেখ্ আর শেখ্, তুই তো একটা হাবা, ল্যাণ্ডলেডি যখন যে-দর হাঁকে দিয়ে দিস কথাটি না ব’লে। এত বছর রইলি, ‘ফল্ট্রুট্’, ‘জ্যাজ্’ কিছুই শিখতে বাকি রাখলি না—কেবল কারবারি-চালটুকু একের এখনও নিতে পারলি নে?”

রাজেন হেসে বললে—“নেবে কী ক’রে? মিসেস ব্রাউনের কাছে ও যা আরামে আছে—! পাছে তাড়িয়ে দেয়—ভয়েই মরে। লুইসা ব্রাউনকে কি তাহ’লে—”

—“যাও, যাও—বাজে কথা বোলো না। মিসেস ব্রাউনরা ভদ্রলোক, তাইরাম? ওঁর স্বামী সলিসিটর ছিলেন। নেহাৎ অসময়ে মারা গিয়েই ঐ বেচারি মিসেসকে এই বিপদে ফেলে গেছেন?—ও-বাড়ি ছাড়তে ভয় পাই তেমন ভালো লোকের বাড়ি আর পাবো না ব’লে। তাদের মতন মাসের মধ্যে বার চারেক ক’রে তো ল্যাণ্ডলেডি বদলাতে পারি না—জানিস, a rolling stone gathers no moss, তাই তো তাদের কপালে—”

—“লুইসার মতন বন্ধুণী জোটে না, না রে চারু?”

—“স্বধীরটা একের নম্বর—ওঃ, এই যে মিসেস—ইয়ে—”

—“ম্যাকফার্নেন, সান্ধ্, মিসেস ডি, ম্যাকফার্নেন। তা’ ঘর পছন্দ হয়েছে তো আপনাদের? যদি বলেন আরো কিছু ফার্নিচার—”

রাজেন ঘরের গাদা গাদা মাঝাতার আমলের চেয়ার, টেবিল, সোফা-র দিকে তাকিয়ে মনে মনে ভয় পেয়ে বললে—“না, না, এই বেশ আছে মিসেস ম্যাকফার্নেন, এই বেশ দেখাচ্ছে। ঘরটি আপনার চমৎকার—”

মিসেস ডি, ম্যাকফার্নেন দু হাত দুই কোমরে রেখে বুট-পর্যাপ্ত-দ্রুথানি আর একটু শক্ত করে ভূমিতে চেপে বসিয়ে ঘাড়টি পেছন

দিকে হেলিয়ে গর্বিত সুরে বললে—“এই বলে দিলুম আপনাদের—মনে রাখবেন—ডি, ম্যাকফারলেন কখনো মিথ্যে বলে না—এমন বাড়ি, এ রকম রুম কোথাও আর একখানা পাবেন না, তা সে যতই খুঁজে বেড়ান না কেন। মশায়, কাগজে বিজ্ঞাপনে এমন সবাই নিজেরটা ভালো বলে। ও-সব বিশ্বাস ক’রে ঘুরে ঘুরে বাড়ি দেখতে যাওয়া মানে মিথ্যে হায়রানি—”

সন্দীপ কণ্ঠে হাসি চেপে রেখেছে। সুধীর কায়দা ক’রে সামনে বুকে অভিবাদন ক’রে বললে—“নিশ্চয়, নিশ্চয়, একশোবার। তাই তো বলি, কাগজে যখন পড়লুম আপনার বিজ্ঞাপনখানা—”

মিসেস ম্যাকফারলেন একটু ন’ড়ে-চ’ড়ে বললে—“আর, ওরা ও-রকম. সাত-পাঁচ বানিয়ে লেখে ব’লেই বাধ্য হ’য়ে—মিস্টার ম্যাকফারলেন আমায় বললেন কি না—বুঝেছেন—”

রাজেন তাড়াতাড়ি বললে—“তা বই কি, এ আর শক্তটা কী বলুন”—গোপনে সুধীরের প্রতি সরোষ সন্কে—“এখন ম্যাডাম যদি অহুগ্রহ ক’রে—ভাড়া-টাড়া কত—আমাদের আবার সন্ধ্যা হ’য়ে গেলে আজ-বাজে বাড়ি দেখে বেড়াতে কষ্ট হবে কি না—তাই—”

—“ভাড়া—আর কত? আমরা কখনই বিদেশীকে ঠকাই না—এ জন্তে ওই পাশের রাস্তার ম্যাকডোনাল্ডরা আমায় টিটকিরি দেয় ব’লে। বলে,—বিদেশীর ওপর আবার অত দরদ কিসের? ওদের এখানে পড়তে আসা তো নয়, আমাদেরই পকেট ভর্তি হওয়া; তা নইলে গবর্ণমেন্ট ঐ ডার্কগুলোকে দলে দলে এদেশে আসতে প্রত্নয় দিত?—আমি বলি, নাঃ—যা দর, যতটা খরচ পড়ে, তার থেকে এক ফার্দিং বেশি আমি নেব না—ওরা আমাদেরই লোক, ইণ্ডিয়া তো আর আলাদা একটা রাজ্য নয়, কি বলেন মশায়? সত্যি বলিনি?”

সন্দীপের মুখখানা ক্রমশই লাল হ'য়ে উঠছে, এসব ব্যাপারে এদের মধ্যে সবচেয়ে আনাড়ি ও-ই। হাত দিয়ে পাশের টেবিলে রক্ষিত টুপিটা নিতে যায় আর কি—রাজেন কোন্ এক ফাঁকে ল্যাণ্ডলেডির চোখ এড়িয়ে আবার ওকে চোখ টিপে দেয়। মুখে বিনয়ের হাসি টেনে এনে—কারণ গরজ বড় বালাই—মিসেস ম্যাকফার্লেনকে বলে—“তা তো বটেই, তা তো বটেই—তা, এখন কত হ'লে—”

—“ভেবে দেখুন, মশাই, এই এত বড় ঘর, রোজ তাকে ঝাড়পৌছ পরিষ্কার করা—একটা চাকরাণির কর্ম তো নয়, আমাদেরই দেখতে শুনতে হবে স—” বড় মেয়ে নেই যে সাহায্য করবে, তাই বাধ্য হ'য়ে একটা রাত্তি রাতেই হবে কিছুক্ষণের জন্তে অন্তত—তার পর ধোপা, ইলেকট্রিক লাইট—এ রকম সুবিধার বাড়ি আর কোথায় যে—”

সুদীর্ঘ অতিষ্ঠ হ'য়ে উঠেছে। যথাসাধ্য বিরক্তি গোপন ক'রে নিম্নস্বরে, যেন দরদস্তুর সংক্রান্ত কথা বলছে এমনভাবে, বললে—“গোল্লায় যান তোমার বাড়ি আর তাঁর সুবিধা। ওহে রাজেন, এতক্ষণে সাতটা বাজি দেখা হ'য়ে যেত—”

রাজেন আবার বললে—“কত-র কমে আপনার চলবে না? ঘর আমাদের জন্তে নয়, আমাদের একটি বন্ধু—অর্থাৎ বন্ধুর বোনের জন্তে। কাল সকালে আসছেন তিনি।”

মিসেস ম্যাকফার্লেন আকাশ থেকে পড়ল—“তাই না কি? সেটা বলতে হয় এতক্ষণ। মেয়ে নিয়ে আবার যে-হাঙ্গামা—”

রাজেন অবাক হ'য়ে বললে—“কেন? বরং ওঁরা চুপচাপ থাকেন বেশি—হাঙ্গামা তো কমই হবার কথা—”

শ্রীমতী ঠোঁট উন্টিয়ে বললে—“ভারি তো জানেন মশায়

আপনারা। ছেলে হ'লে প্রায় সারাদিনই তো বাইরে বাইরে থাকে—  
আমাদের তাতে সুরিধা কত ! মেয়েরা যতটা সম্ভব ঘরে থাকবে, সারাদিন  
এ আসবে ও আসবে, এটা দাও, সেটা দাও। আমাকে তাহ'লে আবার  
চাওতে হ'ল মশায়, রেট নিয়ে—আমি তো জানতাম না যে মেয়ে  
ঘাসবে এ-বাড়ীতে—”

সন্দীপ, সুধীর ও চারু হতাশ হ'য়ে মুখ চাওয়া-চাওয়ি করলে। রাজেন  
কশে গলাটা পরিকার কু'রে বললে—“আমরা তবে আর দু-একখানা বাড়ি  
দেখি গে, একেবারে সময় নেই কি না—”

—“তা আপনাদের ইচ্ছে হ'লে যেতে পারেন, কিন্তু আমি তো—”  
যে ভাড়াটে বা অতিথি নেব না। কেবল বলছি যে যে সময় চ'লে আসে  
একটু বেশি খরচ পড়বে—”

—“খরচের কথা আপনি এখনো কিছুই তো বলেননি—”

—“তা দেখুন,—ইয়ে—খুব টেনেটুনে না হয় আমি তিন গিনিতে  
চুলিয়ে নেব—আপনারা তো আর আমাদের পর নন—বলব আমার  
স্বামীকে বুঝিয়ে—”

—“তি—ন গিনি ? ফী হণ্ডায় ?—”

—“বেশি বলিনি মশায়, আমি বোকাসোকা মেয়েমানুষ—  
কারবার ভালো বুঝি না—মিস্টার ম্যাকফারলেন বলেন যেখানে যাই  
সেখানে হামেশাই আসি ঠ'কে—”

—“ঠ-পূর্বক ‘কিয়ে’ প্রত্যয় শ্রীমতী, ‘কিয়ে’ প্রত্যয়, ‘কে’ নয়”—চারু  
হাস্যে বাঙলায় বললে—“আহা বাছারে, গাল টিপ্লে দুধ বেরয় এম্‌নি  
নোস্টেট ! চলরে সন্দীপ, অল্প বাড়ি দেখি গে। শা—”

—“ছি ছি, ঞ্জড্র হ'সনে চারু।—না দেখুন, আমাদের মার



করবেন—অন্ধকার হ'য়ে আসছে। কিছু মনে করবেন না, আপনাকে অনেক কষ্ট দিলাম—গুড্-বাই—”

—“গুড্-বাই সান্”, দোর খুলে দিয়ে—“আড়াই গিনি হ'লে যদি পারেন তবে না হয়—আমার বড্ড কষ্ট হবে, মেড্ আর রাখতে পারব না—তবে আপনাদের খাতিরে না হয় ওতেই দেখব রাজি করতে পারি কি না আমার স্বামীকে—”

—“কিন্তু আমাদের অতক্ষণ অপেক্ষা করবার সময় নেই যে! আর আমার বন্ধু আড়াই গিনিতেও রাজি না হ'তে পারেন। তাঁরা হলো শওনের লোক, সেখানেই থাকেন দুগিনি আড়াই গিনি দিয়ে এর চাইতে ঢের ভালো পাড়ার ঢের ভালো বাড়িতে। এডিনবরার সবই তাঁদের চোখে অপেক্ষাকৃত খেলো ঠেকবে কি না। শেষে কি আপনাকে কথা দিয়ে মুষ্কিলে পড়ব—বাড়ি তাঁর পছন্দ না হ'লে?”

রাজেন বন্ধুদের নিয়ে সিঁড়ির দু-এক ধাপ নেমে গেল।

—“তাহ'লে কত হ'লে আপনার বন্ধু রাজি হ'তে পারেন, সান্?”

—“এই ৩০।৩৫ শিলিং, যা রেট্ এখানকার।—তার কম কি আমরা বলতে পারি?”

ওরা আরো খানিকটা নেমে গেল।

—“৩০।৩৫ শিলিং? না, না—ম্যাকফারলেন তাহ'লে আমায় আস্তে রাখবে না—”

—“ভারি দুঃখিত, আচ্ছা গুড্-বাই—” ওরা তড়তড় ক'রে এবার অনেকখানি নেমে গেল।

—“আমি বলি কি, সান্”—ল্যাওলেডি দু'পা এগিয়ে রেলিং-এ ভর দিয়ে দাঁড়াল।

যেতে যেতে রাজেন বললে—“কী বলছেন ?”

—“হু গিনিতে হ’তে পারে, আমার স্বামী—”

—“এখানকার রেট—”

—“আচ্ছা বেশ, দু গিনি—সমস্ত খাবার, আলোর খরচ, স্নানের  
গরম জল—সব নিয়ে।”

রাজেন স্ত্রীকে বললে—“কী বলিস রে ?—এর কমে রাজি হ’বে বলে  
তো মনে হয় না, বাগে পেয়েছে—বুঝতে পেরেছে আমাদের গরজটা—”

—“এডিনবরায়—একটা সাধারণ ক্রমের জন্তে দু গিনি ?”

—“কিন্তু সব খাবার দেবে বলছে—”

—“সব খাবার উনি বাড়িতে খেলে তো ?”

—“কোথায় খাবেন, তা না হ’লে ? তোদের মতো তো আর ফটুফটু  
ক’রে রেস্টোর’য় যেতে পারবেন না ভদ্রমহিলা ?—আমি বলি কি, এতেই  
রাজি হওয়া বাক্—এর চাইতে ভালো আর পাওয়া না গেলে মুশ্কিল হবে  
শেষটা।”

সন্দীপ বললে—“কিন্তু বুড়িটা বড় ইয়ে—একেবারে ছিনে-জোঁক—”

—“আরে, ওরা সবাই ঐ রকম,—ঠক বাছতে গাঁ—আচ্ছা—মিসেস  
ম্যাকফারলেন, কাল আসব তাহ’লে আমরা—”

—“বেশ, ক্রম তৈরি থাকবে। একটা কথা, সার্, আপনার বন্ধু  
বেশ কিছু দিন থাকবেন তো ?”

স্ত্রীর চট্ করে ব’লে ফেললে—“মাস-দুই তো বটেই, বেশিও হ’তে  
পারে।”

বাইরে এসে সন্দীপ বললে—“অমন কথা দিলি কেন, স্ত্রীর ? উনি  
যদি অতদিন না থাকেন—শেষটায় ?”

—“বললাম—তা নইলে বুড়ি আবার আর একটা ফ্যাসাদ বের করত, দেখেছে কি না আমরা একটু নরম হয়ে এসেছি।—হয়েছে কী তাতে? হুগা হিসেবে বনোবস্ত, হুগাখানেকের নোটিশ দিয়ে চ’লে যাবেন আইনত বুড়ি কিছু বলতে পারে না তাতে।”

চারু বললে—“একটা রুম দেখতেই গলদবর্ষ, বোঝো এখন মিসেস ব্রাউনের একটু আধটু আঙ্গার কেন সহ্য করি। চক্রী মন তোমাদের, তাই সোজা কথা বিশ্বাস করতে চাও না—”

সুধীর মুখে হাসলে। সন্দীপের চোখ রাস্তার দুধারে এটা ওটা দেখাচ্ছিল। হঠাৎ সামনের একটা বাড়ি দেখিয়ে বললে—“ঐ দেখ্ ঘর খালি আছে। চল না একবার দেখা যাক।”

চারু বললে—“একজায়গায় কথা দিয়ে ফেলে?”—

সুধীর প্রতিবাদ করলে—“তাতে হয়েছে কি? আরো ভালো আর সস্তা যদি পাই আমরা—কি বলো রাজেন?”

—“মন্দ কি, দেখতে ক্ষতি নেই। সুবিধামতন হ’লে, সকালে উঠেই বুড়িকে একটা খবর দেওয়া যাবে।”

বাড়ির সামনে বাগান। বাগানের বাইরে গেটের কাছে দাঁড়িয়ে বাড়িটা একবার দেখে নিলে ওরা। বেশ পছন্দ হ’ল—মার্চমন্ট রোডে বাড়ির মত ব্যবসাদার ল্যাণ্ডলেডির নয়, আর, একটু ভদ্রগোছের—মধ্যবিত্ত পরিবারের ব’লে বোধ হ’ল।

ভিতরে ঢুকে দরজার কাছে এসে খণ্টা বাজালো রাজেন। বেশিক্ষণ না যেতেই একটি পরিষ্কার পরিচ্ছন্ন মেড্ এসে দোর খুলে জিজ্ঞেস করলে—“কি চাই আপনার?” অন্ধকারে ঠাহর করতে পারেনি রাজেন কোন্ বন্ধুরা দাঁড়িয়ে আছে বাইরে, রাস্তার উপর।

—“কত্নীকে ডেকে দেবে একবার ?”

—“রুমের জন্তে কি, সান্ন ?”

—“হ্যাঁ, রুমের জন্তে ।”

মেড্‌টি আড়চোখে চট্‌ক'রে একবার রাজেনের ওভারকোট আর হুটজোড়া দেখে নিলে । নিয়ে—বোধ হয় ধারণা ভালোই. হ'ল—চলল খবর দিতে ।

মিনিটখানেক পরে, আড়াগোড়া কালো-পোষাক-পর্য্য একটা বৃদ্ধা মহিলা বেরিয়ে এলেন পাশের বসবার ঘর থেকে ।—“গ্যাসটা একটু বাড়িয়ে দাও, আইভি ।—কাকে চান আপনি—” ব'লে উজ্জল আঁধোকে চাহর ক'রে দেখে ছ' পা পিছু স'রে গিয়ে তখন-তখনই একেবারে রাজেনের মুখের উপর সশব্দে দরজাটা বন্ধ ক'রে ফিগন । ভিতর থেকে ঠাকুরাণি আর চাকরাণির বিশ্রী প্রতিবাদ শোনা গেল আঁধাভাষে । মেয়েটি জবাবদিহি করছে মনে হ'ল দোর খুলে দেওয়ার অপরাধের ।

রাস্তায় আসতেই সন্দীপ বললে—“কী ?”

রাজেন টুপি খুলে চুলগুলো নেড়ে-চেড়ে মাথাটা ঠাণ্ডা ক'রে নিয়ে নীরস স্বরে উত্তর দিলে—“কী আবার ? কালো আদমি ! !”

—“হুঁ ।”

অপমান হজম ক'রে নিঃশব্দে চারজনে বাসায়ুখে ।

পরদিন সকালে সন্দীপ আর রাজেন স্নকুমার ও তার বোনকে রিসীত্ করতে ষ্টেশনে গেল । সন্দীপ মেয়েদের সঙ্গে কখনো বেশি মেলামেশা করেনি, তাই বেশ একটু নার্ভাস । কি জানি কেমন মেয়ে, ঘর তাঁর মনঃপুত হবে কি না, হয়ত লণ্ডনের ‘ফ্যাশানেবল্‌ লেডি’, এই আধ-পাড়াগাঁ সহরে তাঁর জন্তে এত অল্প সময়ের মধ্যে আর কী-ই বা

করতে পারত ওরা, এ-সব বুঝবেন কি না তিনি...? নিজের মনের ভয়টার আভাষ রাজেনকে একটু দিতেই সে কাঁধটা একটুখানি উপরে তুলে বললে—“নাচার—আমাদের যথাসাধ্য করেছি।”

সুজাতার সঙ্গে আলাপ হ’য়ে কিন্তু পথেই ওদের ভয় ভেঙে গেল। নিতান্ত সাদাসিধা মেয়ে, এখনও যেন স্কুলের ছাত্রী—ফ্যাশানের ধার-পাশ দিয়েও যায় না। এডিনবরার রাস্তাঘাট দেখে তারি খুসি, উচ্ছলিত হ’য়ে বললে—“কী চুপচাপ! লণ্ডনের হট্টগোল থেকে এসে মনটা যেন জুড়িয়ে গেল! আমার কিন্তু মেজদা, সব দেখিয়ে বেড়াতে হবে গ্লাসগো যাবার আগে—হট্ট করে যেতে পারবে না তা বলে রাখছি।”

রাজেন ও সন্দীপ প্রায় একসঙ্গে ব’লে উঠল—“সে কি, গ্লাসগো যাচ্ছ না কি সুকুমার?”

—“কেন, মেজদা, তুমি ওদের লেখনি সব কথা?”

সুকুমার ছট্‌মির হাসি হাসতে লাগল।—“আগে থাকতে বললে সন্দীপকে সঙ্গে নেয় কার সাধ্য? এখন তোর কথা ঠেলতে পারবে না। —রাজেন, লেক্স দেখতে যাচ্ছি হে—গ্লাসগো হ’য়ে। প্রভুল লিখেছে ওরা অনেকে যাবে, সুজাতার বান্ধবীও কারা আছেন। তাই তো কিরে এলাম, নইলে ছুটি না ফুরোতে এ-দিক মাড়াই আমি?”

ট্যান্সি মার্চমন্ট রোডে ম্যাকফার্লেনের বাড়ির সামনে এসে থামল। রাজেন কি বলতে যাচ্ছিল, সুজাতা নামবার উত্তোষ করতে সে আগেই টপ্ করে নেমে পড়ে দরজা খুলে দিয়ে স’রে দাঁড়াল। ট্যান্সির আওয়াজ পেয়ে মিসেস ম্যাকফার্লেন উপর থেকে হাতুল ঘুরিয়ে সদর দরজা খুলে দিয়েছে।

উপরে যেতে যেতে সুজাতা বললে—“চমৎকার চওড়া সিঁড়ি তো!

পথে আসতে রাস্তাও দেখলাম থাসা চণ্ডা আর পরিষ্কার লোকজন কম  
‘লেই কি এত বড় দেখাচ্ছিল?’

রাজেনই উত্তর দিল—“না, সত্যিই এখানকার রাস্তাঘাট সুন্দর।  
কত বড় বড় পাথর দিয়ে তৈরি দেখলেন না?”

—“আমি থাকি লণ্ডনের গোন্ডার্স গ্রীণে, ছোট ছোট বাড়ি সব  
ওদিককার, ছবির মতো সুন্দর আর ঝকঝকে। এখানে সব নতুন লাগছে।  
এডিনবরা যে পাহাড়ে দেশের রাজধানী, তা ওর বড় বড় পাথরে তৈরি  
রাস্তা আর বাড়ি দেখেই বুঝতে পারা যায়।—ব্রেকফাস্টের পরেই বেরিয়ে  
পড়ব, মেজদা।”

রাজেন ল্যাণ্ডলেডিকে ডেকে সজ্জাতার জন্তে ভাঙ্গা ডিম আর চায়ের  
হুকুম দিল। পরে ওকে খেয়ে দেয়ে একটু জিরিয়ে নেবার জন্তে এঁকলা  
য়েখে তিন বন্ধুতে মাঠের দিকে যুরে আসতে চলল।—“সুকু, তুইও এই  
পাশের দোকানটায় ঢুকে কিছু খেয়ে নে।”

—“মন্দ কি। তোমরাও কিছু খাও।”

—“আপত্তি নেই, চলো এই সামনের টেবিলটায় বসা যাক।”

ওয়েস্টেস্টের খাবার আনবার হুকুম ক’রে আরাম ক’রে ব’সে রাজেন  
বললে—“এদিকে কিন্তু এক ফ্যাসাদ হয়েছে, সুকুমার। ল্যাণ্ডলেডিকে  
বলা হয়েছিল তোর বোন অনেকদিন থাকবে।”

—“কেন বলতে গেলে ও-রকম? একেবারে কিছু না বললেই  
ঠিক হ’ত।”

রাজেন ঈষৎ রাগত টোনে বলল—“না ব’লে করি কী?—যেমন  
তোমার বুদ্ধি! এক গল্প কথা লিখতে পারলে, আর, ক’দিন থাকবেন  
এটুকু লিখতে কী হয়েছিল?”

সন্দীপ শুধু একটু মুকুঝিয়ানা চালে হেসে এ-কথায় ‘ডিটো’ করলে।

—“আরে, অত থেয়াল হয়নি আমার। প্রথমে কথা ছিল তোদের কারো ওখানে উঠে একটু বিশ্রাম ক’রেই চ’লে যাওয়া যাবে। মাসগোর ট্রেনের তো অভাব নেই—”

—“সেইটেই ভালো হ’ত—একটা রুম আমরা একবেলার জন্তে স্বচ্ছন্দে ছেড়ে দিতে পারতাম, বিশেষত বসবার ঘর যখন রয়েছেই—”

—“হ্যাঁ, কিন্তু ও ধ’রে বসল যাবার আগে এখানে কি কি সব দেখবে—এই দুর্গ টুর্গ। ইতিহাস নিয়েছে কি না—এডিনবরা সম্বন্ধে ওর ভারি কৌতূহল। সামান্য কিছু দেখতে গেলেও অন্তত দিন দু’তিন লাগে তো—”

—“সে দু-তিন দিনের জন্তে স্বচ্ছন্দে রাগীদিদের ওখানে ঠিক ক’রে দিতে পারতাম। আসলে স্কু, তোমার সব কাজেই ও-রকম—ইয়ে ছেলোহো—”

রাজেন থামিয়ে দিয়ে বললে—“থাক্, থাক্, বুড়িকে বুঝিয়ে বলা যাবে এখন। গতস্র শোচনা—”

\* \*

\*

সারাদিন ওরা স্নজাতাকে সহরের প্রসিদ্ধ জায়গাগুলো দেখিয়ে বেড়ালে। এমন ক’রে বেড়াতে হ’লে লাঞ্চ বা চা খাওয়ার জন্তে বাড়িতে ফিরে যাওয়া চলে না, কাজেই খাওয়া-দাওয়াও ওদের বাইরেই সারতে হ’ল। কিন্তু স্নজাতার দুর্গ ও প্রাসাদ এত ভালো, লাগল যে সে কেবল ঐ দুটো দেখতেই অনেকটা সময় কাটিয়ে দিল। হলিওড প্যাগোস দেখা শেষ ক’রে বিকালের দিকে আর্থার্স সীন্টের শিখরে উঠে, দূরে

সমুদ্রের পানে চেয়ে চেয়ে হঠাৎ ওর খেয়াল হ'ল সমুদ্র দেখতে যাবে। যে কথা সেই কাজ। মেজদাদা ওর চিরদিনই ভালোমানুষ, সন্দীপ সাথে সাথে ঘুরছে মাত্র এবং রাজেন তো ওদের ছুদিন বেশি ধরে রাখতে পারলেই খুসি। উধাও তাই সবাই মিলে—পোর্টোবেলোয়। ট্রামের দোতলায় চ'ড়ে সন্ধ্যার স্নান আলোতে ছধারের বাড়িঘর, বাগান, খোলা মাঠ দেখে স্ফুজাতার মনে হয়—এডিনবরা এক অপূর্ব রহস্যময় জায়গা। একসঙ্গে প্রাকৃতিক দৃশ্যের এত সমারোহ রুটেনের আর কোনো সহরে আছে কি না সন্দেহ। বেড়াবার উপযোগী কি ক্ষুদ্র ক্ষুদ্র আলাদা পাহাড়ে, কি দূর হ'তে দৃষ্ট শ্রেণীবদ্ধ ধূসর শৈলমালায়, বিস্তীর্ণ নদী, সম্পূর্ণ শ্রামল মাঠ, ছোটখাট হ্রদ—সর্বোপরি এই উত্তাল সমুদ্রে, এডিনবরা নগরী সকল রকমে সম্পদময়ী। স্কটের উপস্থাস আর সহরের নিজস্ব ঐতিহাসিক গৌরব স্ফুজাতার মনের সম্মুখ আরো বাড়িয়ে তোলে। প্রিন্সেস স্ট্রীটে ঘুরবার সময় একদল হাইল্যান্ডার দেয়াল—ব্যাগ-পাইপ বাজিয়ে যাচ্ছে। ওদের সেই হাঁটুর উপরে পরা পুরোনো ধরনের পোষাক, একটুখানি পালক গোঁজা মাথার টুপির মধ্যে, ব্যাগ-পাইপের বিচিত্র সুর—সব মিলে স্ফুজাতার তরুণ মনে স্ফুদের সম্বন্ধে ভারি একটা রোমাঞ্চিক ছায়াপাত হয়।

পোর্টোবেলোর পথে যেতে যেতে ও চুপ করে এসব ভাবছে...রাজেন বললে—“আপনার দেখছি এডিনবরা খুব ভালো লেগেছে।”

—“হ্যাঁ”

—“ফিরবার পথে আবার আসবেন তাহ'লে—”

সুকুমার তাড়াতাড়ি হাতের কাগজখানা রাজেনের চোখের সামনে



ধ'রে বললে—“ভাল প্লে আছে আজ—চলো, যেতেই হবে। গলসওয়াদীর ‘স্ট্রাইফ’। কবে থেকে এটা দেখতে ইচ্ছে—এমন জিনিষ না দেখে নড়ছি না এখান থেকে। কুমু, আজ আর নেমে কাজ নেই, সমুদ্র আর একদিন দেখো। চলো, ফেরা যাক।”

রাজেন ঘুড়িটা দেখে মনে মনে হিসাব ক'রে বললে—“কিন্তু ঢের সময় আছে স্কুমার, এত ব্যস্ত হ'য়ো না।”

সন্দীপ এতক্ষণ একটা কথাও বলেনি, এবার অপ্রসন্ন স্বরে বলল—“কিন্তু বুড়িকে যে বলা হয়নি, তার কী? হয়ত খাবার নিয়ে ব'সে থাকবে।”

—“বুড়ি?”

—“ম্যাকফারলেন—”

—“ওঃ—ওকে তো সেই সকালেই বলেছি যে আজ আমরা বাইরে থাকলেও তারি গরজ পড়েছে কি না খাবার নিয়ে ব'সে থাকবার—বরং পরসা বাঁচলে দুহাত তুলে আশীর্বাদ করবে তোমায় এবং যাতে কুমুকে রোজই বেড়াতে নিয়ে যাও সেই উপদেশ দেবে—”

সন্দীপের মুখটা লাল হ'য়ে উঠল। হাজার চেষ্টা ক'রেও বেচারি এ পর্য্যন্ত একবারও মেয়েদের সঙ্গে সহজভাবে মিশতে পারেনি। স্কুমার প্রমুখ বন্ধুরা তাই স্নবিধা পেলেই ওকে চিম্টি কাটতে ছাড়ে না।

পোর্টোবেলো থেকে ফিরে বেশ ভালো মত ডিনার খেয়ে থিয়েটারে যেতে ওদের একটু দেরি হ'য়ে গেল। স্কুমার কিন্তু নাছোড়বান্দা, বেশি দাম দিয়ে হ'লেও টিকিট কিনবে—অর্থাৎ গলসওয়াদীর ডাকসাইটে ‘স্ট্রাইফ’ না দেখে ছাড়বেই না। দলে প'ড়ে সন্দীপের পড়াশুনা ঘুচে গিয়েছে, দু-একবার শেষ চেষ্টা ক'রে সেও হাল ছেড়ে দিলে।

প্রায় রাত এগারোটায় হল থেকে বেরিয়ে আসবার সময় রাজেন গাছের ক'রে দেখল সূজাতার চোখের কোল ভিজ়ে আছে।—“এ কি, আপনি এত ছেলেমানুষ? ছি, ছি। থিয়েটার দেখে কেঁদে ভাসিয়ে দিলেন?—বাঃ, যুদ্ধে হারল তো দুজনেই—বেশ তো শোধবোধ—”

সুকুমার ফিরে চেয়ে বললে—“কে, কুমু? ও ঐ রকম—থিয়েটার দেখে কাঁদে, ছবি দেখে কাঁদে। কোনো ট্রাজেডি হ'লে ওকে কোথাও নিয়ে যেতে ইচ্ছে করে না—অথচ ট্রাজেডি দেখতেই ওর লোভ বেশি।—না, না, চলো ওকে দিয়ে আসি আগে, একসঙ্গে যাওয়া যাবে।”

সুকুমার ফিরিয়ে মার্চমণ্ট রোডের রাস্তা ধরল সবাই।  
বাড়ির সামনে এসে ওরা দুজনে দাঁড়িয়ে রইল, সুকুমার সিঁড়ির কয়েক ধাপ উঠে সূজাতাকে ম্যাকফারলেনদের দরজাটা দেখিয়ে দিয়েই নেমে গেল। সারাদিন হৈ চৈ করা গেছে, এখন সকলেই বাড়ি ফিরতে পারলে বাঁচে।

একটি ছেলে এসে সূজাতাকে দোর খুলে দিয়ে গেল। নিজের ঘরে গিয়ে সূজাতা দেয়াল হাঙড়ে সূইচ টিপে আলো জ্বালালে। পরে সোফায় ব'সে জুতোটা খুলতে খুলতে কত কি ভাবতে লাগল। চোখে ওর তখনো স্বপ্নের মায়া—মনের উপর আবেশ জড়িয়ে আছে। আর্থার সীট্, হলিরুড, হাইল্যাণ্ডার—‘স্ট্রাইক’ প্রে—সুন্দরী এডিনবরা, কোথায় দেশের নাটুকে অভিনয়, আর কোথায় এদের সুন্দর সম্ভাস্ত সংঘত অভিনয়...আহা, অত দুঃখে প'ড়েও স্ত্রীকে হারিয়েও শ্রমিক রবার্ট—

টক্—টক্। দরজার ঢোকা। সূজাতা চমকে ওঠে। টক্—টক্। আর একটু জোরে। ও উঠে দরজাটা খুলে দিল।

—“কে? ও, মিসেস—কী চাই?”

১

মিসেস সোজা ঘরে ঢুকে স্বজ্ঞাতার দিকে কটমট ক'রে তাকিয়ে বললে—“বিল—আমার ঘরের ভাড়া দাও।”

—“সে কি, এত রাত্তিরে?”

—“হুঁ, এত রাত্তিরে ব'লেই তো।” গলাটা আর একটু চড়িয়ে—  
“কেমন মেয়ে গা তুমি? এসেছ সেই ভোরবেলায়—সারাদিন উড়ে উড়ে কোথায় যে রইলে—ফিরলে নিশুৎ রাতে—কোথায় আমার ভাড়া দেওয়া কোথায় কি।”

স্বজ্ঞাতা নরম স্বরে বললে—“বেশ তো, আমি কি রাত্তিরেই পালিয়ে যাচ্ছি, মিসেস—ইয়ে—”

মিসেস ইয়ে কিন্তু ওকে একটুও সাহায্য করলে না।.. বরং ক্রোধে উঠে বলল—“আগাম দিতে হবে—তুমি সুবিধার লোক নও—তো আমি টের পেয়েছি। নইলে এত রাত্তিরে বাড়ি আসো ছেলে সবে ক'রে—”

—“কী?”—নিমেঘে স্বপ্ন ছত্রাকার। হায় সার ওয়ান্টার স্কট।

—“বড় যে তেজ দেখাও আবার? দাও আমার টাকা। টাকা না দিয়ে ও-সব—আমার বাড়িতে চলবে না—”

—“চুপ!”—স্বজ্ঞাতার মাথাটা চন্ ক'রে উঠল। “জানো তুমি কি বলছ? সকালে আমার ভাইকে দেখনি?”

—“আ—আমার ভাই রে! অমন ভাই গুণায় গুণায়—”

মোজা পায়েই স্বজ্ঞাতা ওঠে লাফিয়ে : কম্পিত আঙুল তুলে দরজা দেখিয়ে বললে—“বা—ও, এখনি।”

ল্যাঙলেডি কোমরে হাত দিয়ে মেজ্জেতে গোড়ালি দিয়ে আঘাত ক'রে বললে—“ঘর তোমার যে বাব?”

—“আমি যখন ভাড়া নিয়েছি তখন আমার—এখনই বেরিয়ে যাও। আমি ঘুমব।”

—“ভাড়া দিয়েছ কি যে ঘর তোমার বলছ ?”

—“কাল সকালে পাবে—এখন আমায় বিরক্ত কোরো না।” সূজাতা শাড়ি খুলে ড্রেসিং-গাউন পরল।

—“কাল সকাল পর্যন্ত অপেক্ষা করতে পারব না, এক্ষনি চাই টাকা—নইলে কেমন ঘুমও তুমি দেখব।”

—“কী ? আচ্ছা, এই আমি চললাম ঘুমতে।” সূজাতা খাটের দিকে এগুলো। মিসেস ম্যাকফার্লেন দ্রুত এসে জোরে ওর বাহু টিপে ধরল। ঝাঁকি দিয়ে হাত ছাড়িয়ে নিয়ে দাঁতে দাঁত চেপে সূজাতা বললে—“How dare you ?”—রাগে ওর কথা বেরুচ্ছিল না—“এর পরে একটা পেনিও না—যতক্ষণ—ক্ষমা না চাও।”

—“বটে ?—ভ্যাডি, ভ্যাডি !”

—“কী গো, কী গো ?” রান্নাঘর থেকে ভারি গলায় আওরাজ এলো।

—“এস তো একবার এদিকে। শোনো কথা ব্লাকির—বলছে দেবে না ভাড়ার টাকা। কম বুকের পাটা নয়—এতটুকু মেয়ে, হুমকি কত !” মিষ্টার ম্যাকফার্লেন পাইপ-হাতে উঠে এলেন—“হুম, লোক চেন্ননি এখনো ? ভালো চাও তো টাকা বের কর।”

যতই বাড়াবাড়ি করছে ওরা, ততই সূজাতার মাথাটা আশ্চর্য্য রকম ঠাণ্ডা হ’য়ে আসছে। ধীরে ঘড়িটার দিকে তাকিয়ে বললে—“পোনে বারোটা। মিসেস যেই-হও-না-কেন-তুমি, শোনো—হুপুর রাতে পুরুষ ডাকিয়ে জুলুম করছ বিদেশী মেয়ের ওপর টাকার জন্তে। আমার ভাই থাকতে বলোনি—ভয়ে, আমার বেশি পাবে না ব’লে—”

কথা না ফুরোতে মিসেস ম্যাকফার্লেন কর্তার দিকে তাকিয়ে চোখ টিপে বললে—“ওঁর ভাই—”

সুজাতা ঘাড় বাঁকিয়ে দীপ্ত ভঙ্গীতে একবার তাকিয়ে ধীরে ধীরে জান্‌লার কাছে গিয়ে কাচটা তুলে ধরল।

শ্রীমতী পিছন পিছন এসে জিজ্ঞেস করলেন—“কী করছ শুনি?”

—“পুলিশ ডাকব—বর চড়াও হ’য়ে শাসাচ্ছে তোমার স্বামী—”

—“পুলিশ ডাকবে? খবরদার!” ওর হাত চেপে ধরে আর কি—সুজাতা এক ঝটকায় হাত ছাড়িয়ে সোফার ওধারে স’রে গেল। “বেরিয়ে যা—ও বলছি, নৈলে—”

—“ড্যাভি, এ যে বিষম মেয়ে গো! দাও তো জান্‌লাটার খিল লাগিয়ে—” কর্তার কথাবৎ কার্য্য। তার পর কর্তীর স্মরণ আর এক পর্দা ওঠে।

—“ভালো চাও তো টাকা বের করো, শুনছ গো মেয়ে? নৈলে যা :—হাল করব তোমার—সে আমিই জানি—” স্বর ওর ফুঁসিয়ে ওঠে যেন—

“পুলিশ ডাকবে? পুলিশ?—হা—হাঃ! পুলিশ কোন্ দেশী, সে থেয়াল আছে? ব্লাকির হ’য়ে কথা বলবে নাকি সে? হা—হাঃ!”

—“বেশ তো, খুন করতে পারো, কিন্তু টাকা পাবে না। আগে মাফ চাইবে—তার পর অন্য কথা। এই দেখ, পার্সে আমার কয়েক শিলিং বৈ নেই। আমি চেক না লিখলে তোমাদের সাখ্যিও নেই টাকা আদায় করবে জোর ক’রে। এই আমি বললুম এখানে—যা পারো করো এখন তোমরা।”

—“কী ট্যাটা মেয়ে গো! এতটা বয়স হ’ল, এ রকম তো আর দেখিছি!” বুড়ি তাকায় বুড়োর পানে।

ওরা দুজনে বেরিয়ে গেছে রান্নাবরৈ, পরামর্শ করতে বুঝি……সুজাতা চুপ ক’রে ব’সে……মাইরে থেকে দেখলে মনে হয় ওর এতটুকু ভয় নেই। কিন্তু ভিতরে প্রতি রক্তের কণা অস্ত্রও বটে, মরীয়াও বটে—সেই সঙ্গে স্বপ্নাও হুঃসহ, বিস্ময়ও। হুংপিণ্ডটা ওর ঘেন তোলপাড় ক’রে বেড়ায় প্রতি পঙ্করে হানা দিয়ে দিয়ে। কত কী ভাবনা যে……যুগের আশা হুঃশা……চোখেমুখে খানিক ঠাণ্ডা জল দিয়ে জোর ক’রে নিজেকে একটু শান্ত ক’রে উঠে স্ট্রেকেসটা খুলে একটা বই নিয়ে বসল—রাতটা কাটিয়ে দেওয়া যাক তো কোনোমতে। সবে বইটা খুলে ধরেছে, বুড়ি হাঁ—হাঁ ক’রে ছুটে এসে পট্ ক’রে বাতিটা দিলে নিবিয়ে।

দোরটা খুলে রেখে রান্নাবরৈ গিয়ে ফের ওরা পরামর্শ করতে লাগল বুঝি!—কে জানে—মরুক গে—সুজাতা টেবিলে মাথা রেখে ভাবে।…ভাবে আর ভাবে—অন্ধকারে…

খানিক পরে ম্যাকফার্লেন এসে বাতি জালিয়ে বলে—“কই, দাও তোমার লাভারের—”

—“সাবধান—কাছে এসো না!” গায়ে ওর মদের গন্ধ…

—“তোমার ভাই, না প্রিয় কার ঠিকানা—”

একটুখানি চুপ ক’রে থেকে—“কই, দাও না গা—”

—“কেন?”

—“কেন?” ম্যাকফার্লেন কুংসিত হাসল। “ডেকে আনব তাকে—দেখি সে পয়সা দেয় কি না।”

সুজাতা একটু ভাবলে। না—মেজদার আসাই ভালো। সারারাত এ মতপের ঘরে ঐকান্ত—সবে তো সাড়ে বারোটা বেজেছে। উঠে গিয়ে একটুকরো কাগজে সুকুমারের ঠিকানা দিলে লিখে।

—“তুমি ব’সে থাকো যেমন আছ তেমনি, বুঝেছ ?—খবরদার, দোর বন্ধ করতে পারবে না।”

\*  
\*  
\*

রাতকাপড়ের উপর কোনোমতে দিনের ওভারকোটটা জড়িয়ে সশব্দে স্নকুমার এবং ওর পিছন পিছন সন্দীপ এসে দাঁড়াল। স্নকুমার ঘরে ঢুকে বললে—“কি রে কুমু, কী ব্যাপার?”

সমস্ত শুনে বললে—“ম্যাকফারলেন গিয়ে আমায় বললে কি, তোমার বোন আমাদের একটা পেনিও ভাড়া দেবে না বলেছে। আমি তো শুনে অবাক। তার পর মনে হ’ল নিশ্চয় কোনো গোলমাল হয়েছে।” ফিরে ম্যাকফারলেনের দিকে স্থিরভাবে তাকিয়ে—“আজ রাত্রে একটি পয়সাও পাবে না। কাল হিসেব হবে।—কি রে কুমু, তোর এখানে শুতে ভয় করছে?”

—“বড্ড, মেজদা! এ রকম লোক আমি জীবনে দেখিনি, শুধু বইয়েই পড়েছি—”

—“বইয়ে কি আর শুধু শুধু লেখে রে? সত্যিকার জীবন কত কুৎসিত,—কত রকমারি স্পেসিমেন আছে যে: এ-চিড়িয়াখানায়—দেখ—দেখে শেখ। শিখতেই তো এসেছিস এখানে।”

সন্দীপ বললে—“এসব দেখতে বা শিখতে যে হবেই তার কী মানে আছে, স্নকুমার? সবাইকার এ রকম অভিজ্ঞতা হয়ও না—কি ক’রে ভয়ানক খারাপ লোকের হাতে প’ড়ে গেছেন উনি—তাই তো—”

ওরা দাঁড়িয়ে উত্তত হ’তে ল্যাণ্ডলেডি এসে পথ জুড়ু দাঁড়াল। “যাচ্ছ যে বড্ড ভাড়া না দিয়ে?”

সন্দীপ এগিয়ে এসে বললে—“তোমার সঙ্গে কি চুক্তি হয়েছিল যে, ভাড়া আগাম দিতে হবে?”

—“তুমি কেন কথা বলতে আসো বাপু গায়ে প’ড়ে? তুমি কোথাকার কে শুনি?—তোমার সঙ্গে কোনো কথাও হয়নি।”

—“তা না হ’তে পারে—কিন্তু কাল বাড়ি ঠিক করবার সময় আমিও ছিলাম। সাক্ষী আছি সব কথাবার্তার। মিসেস ম্যাকফার্নেন, তোমাদের ব্যবহার চূড়ান্ত নমুনা বটে। তুমি জানো কার সঙ্গে কি বলেছ? বিশ্ববিদ্যালয়ের একজন গ্র্যাজুয়েট—”

সুজাতা ছাতা নেবাব অছিলায় পিছন ফিরে দাঁড়াল। সুকুমার কেশে গলাটা পরিষ্কার ক’রে নিলে। মনে মনে সন্দীপের মুণ্ডপাত ক’রে জনাস্তিকে সুজাতাকে বললে—“সন্দীপটা এখনও সেই আনাড়ি-ই র’য়ে গেল! কোথায় কার সঙ্গে কি বলেছে দেখ্‌।”

বলতে না বলতে মিসেস ম্যাকফার্নেন গলা সপ্তমে চড়িয়ে ভেঙালে—“আমরা খোড়াই কেয়ার করি তোমার বিশ্ববিদ্যালয় আর তার গ্র্যাজুয়েটকে। এখন যাচ্ছ যাও, কিন্তু একটা জিনিষও নিতে পারবে না। কাল টাকা দেবে, তবে জিনিষ ছাড়ব।”

\* \* \*

রাজেন্দ্রের বসবার ঘরে মস্ত আগুনের সামনে ব’সে ওরা কজনে। সব শুনে রাজেন্দ্র বললে—“আমায় যদি রাগে একবার ডাক্তিস বুকি ক’রে! কাছেই তো ছিলাম, ভাই। হায়রে হায়, দুটো গিনি নাহক দিয়ে দিলি?”

—“বুঝতে পারিনি যে—”



—“সে চালই ওদের যদি বুঝবি তবে আর বোকামি করবে কে ?—  
সুকু”, সুজাতার পানে চেয়ে মূহু হেসে “আপনাকে—ইয়ে—ওরা সত্যিই  
কিছু করতে সাহস পেত না। এটা যে মগের মুল্লুক নয় সেটা ওরা  
ভালো ক’রেই জানে। কেবল ফাঁকতালে টাকাটা নিলে মেরে।  
ঘরভাড়াও দিতে হ’ল না, খাবারও না, না লাইট-থরচ—না কিছু।  
ভয় দেখিয়ে, অপমান ক’রে রাত্রে বের ক’রে দিল ইচ্ছে ক’রেই।  
কিন্তু জিনিষপত্র রেখে দিলে ধ’রে। জানে যে আপনি কিছুতেই আর  
ওখানে যাবেন না, কিন্তু ঘর-ভাড়াটা—চুক্তির সব টাকাটা, তাও সারা  
হস্তার অর্থাৎ পুরো ছোটো গিনি—বাধ্য হ’য়েই দিতে হবে। তুখোড়  
লোক, পাকা চালিয়াং আর ভারি লো-ক্লাস। জানেন, Foxy  
কথাটার বাংলা করেছে আনি শেয়ালিয়ানা—নৈলে এদের ব্যাখ্যানা  
করা যায় না। ষ্টুডেন্টরা যে এই সামান্য টাকা নিয়ে হাঙ্গাম করতে  
চাইবে না, তা ওরা বেশ জানে।—কিন্তু তুই সন্দীপ, কী ব’লে কলকাতা  
ইউনিভার্সিটির গ্র্যাজুয়েটসিপএর দোহাই দিতে গিয়েছিলি, হ্যাঁরে  
ইডিয়টস ইডিয়ট ?”

লজ্জায় সন্দীপের মাথাটা টেবিলের সঙ্গে প্রায় এক হ’য়ে যায়  
আর কি। সুজাতার দিকে সে তাকাতে পারে না। সুজাতার মুখও  
লাল হ’য়ে ওঠে।

সুকুমার হাসে—“কী ভাবছিস কুমু ?”

সুজাতা অধোমুখ সন্দীপের দিকে তাকিয়ে মিষ্টি হেসে বলে—“একটা  
গান শুনেছিলাম মেজদা—

‘বিলেত দেশটা মাটির, সেটা সোনার রূপোর নয়।’”

## নীল রক্ত \*

জ্যোৎস্না বাপের একমাত্র মেয়ে। ওর বাবা সাবেক-কালের অভিজাত নাস্তব, এবং সেরকম লোকদের সচরাচর যা হয়—মনটাও ভারি সাদাসিঁদে। কিন্তু কৌলীন্য-গর্বে একেবারে আকণ্ঠ মগ্ন। ওঁর স্থিরবিশ্বাস, উচ্চবংশের লোকের স্বভাবচরিত্র অতি উচ্চাঙ্গের না হ'য়েই পারে না। তাই জ্যোৎস্নাকে যখন বিলেত পাঠালেন, অভিভাবক ঠিক ক'রে দিলেন এক প্রাচীন বংশের অশীতিপর স্কচ মহোদয়কে, বিশেষ ক'রে ব'লে দিলেন যেন একটু কষ্ট ক'রে দেখে শুনে রেগুকে কোনো মার্জিতরুচি সঙ্ঘশজাতা মহিলার তত্ত্বাবধানে রাখা হয়—যেখানে সে ঘরের মেয়ের মত বৃদ্ধ পাবে এবং ভদ্রপরিবারের ভদ্র ছেলেমেয়েদের সঙ্গে মিলেমিশে ইংলণ্ডের কালচারটুকু নখদর্পণস্থ ক'রে দেশে ফিরতে পারবে। তারজন্তে খরচপত্র একটু বেশি হ'লেও ক্ষতি নেই, কেবল মেয়ে যেন হা-ঘরেদের কবলে না পড়ে। হৃদয়হালিডে সাহেব উত্তরে লিখলেন যে মেয়ের জন্তে চাটার্জির কিছুমাত্র হস্তিষ্ঠা করবার দরকার নেই।

প্রথম দিনের অভিজ্ঞতা জ্যোৎস্নার মোটের উপর ভালোই।

হ্যালিডে-বাড়ির সব-ছোট ছেলে, যোলবছর বয়সের শাস্ত্রদর্শন রবার্ট ওরফে ববী, ভিক্টোরিয়ায় একা দাঁড়িয়ে। জানলা থেকে জ্যোৎস্নার উদ্ভিগ্ন মুখ প্র্যাটফর্মে ঊকি দিতেই কাছে গিয়ে নম্রভাবে বললে, পিতার আদেশে সাউথ কেনসিংটনে নিজেদের বাড়িতে ওকে নিয়ে যেতে

\* "Blue blood"—গুলিতি অভিজাতের দেহে লাল রক্ত বয় না, ওয়া বলে।

এসেছে। দেখে শুনে জ্যোৎস্নার মনে হ'ল—শব্দটা কী? এ তো ঠিক এক কলকাতা থেকে আর এক কলকাতায় আসা। এই যদি বিলেত, তবে লোকে এত ডরায় কেন কালাপানির নামে?

বাড়ি পৌছতেই হ্যালিডে-ঘরগী এসে অতি যত্ন 'ক'রে হাত ধ'রে বসবার-ঘরে ওঠালেন। দুচারাটি খুচরা কথাবার্তার পর—যদিও ভর্তা সেখানে বসেছিলেন তবু তাঁর হ'য়ে কত্নী বললেন,—“তোমার জন্তে আমরা নর্থ-ওয়েষ্ট অঞ্চলে বাড়ি ঠিক ক'রে রেখেছি।”

—“বাবা যেরকম চান সেরকম তো?—দেখবেন—শিক্ষিত, ভদ্র—?”

—“তাতে সন্দেহ নেই, কি বলো হ্যারি?”

হ্যালিডে বললেন—“অবধারিত। যদিও আমরা তাঁদের চিনি না, কিন্তু এত চিঠি-লেখালেখি হয়েছে যে—এই দেখুন না মিস্—”

জ্যোৎস্না সবিনয়ে বললে—“আমাকে জ্যোৎস্না ব'লেই ডাকবেন আপনারা—”

মিসেস হ্যালিডে বিপন্নমুখে শুধোলেন—“জ্যোৎস্না? কিন্তু তোমার বাবা ‘রেগু’ লেখেন কেন? তোমাদেরও দুতিনটে নাম থাকে বুঝি যেমন আমাদের—ইসাবেল লুসি মেরিয়া—ধরণের?”

জ্যোৎস্না হেসে বললে—“না—অত ঘট। নেই আমাদের—আমার ভালো নাম জ্যোৎস্না-রাণী, রেগু শুধু ডাক-নাম—”

—“ওঃ বুঝেছি, এই যেমন রবার্টকে আমরা ‘বব্—ববী’ ব'লে ডাকি—বুঝেছ, হ্যারি? আদরের নাম। কিন্তু তুমি যাদের খাড়িতে যাবে আজ খাওয়াদাওয়ার পরে, তাঁদের কাছে শুধু একটা নামেরই চর রেখে—তোমার বাবাকেও বোলো তা-ই করতে।”

হ্যালিডে বাধা দিয়ে বললেন—“তারপর কি বলছিলাম শোনো। ‘রীড

বাক্ল'রী থাকে হ্যাম্প্‌স্টেড অঞ্চলে—বেলসাইজ্ পার্কে । এককালে খুব অবস্থাপন্ন ছিল । কৌন্ এক কোম্পানীকে অনেক টাকা ধার দিয়ে সেটা হঠাৎ ফেল পড়ার পর থেকে একটু—ওর নাম কি—তাই বাড়িতে একজন পেরিং গেষ্ট্ রাখতে চায়—”

—“আপনাদের চেনা লোক যখন—”

—“না—চেনা লোক—ওর নাম কি, ঠিক নয়, কিন্তু ঐ হ'ল বৈ কি । সব খবর নিয়েছি তন্ন তন্ন ক'রে । আমি বাড়ি থেকে বেরোতে পারলে একবার দেখা ক'রে আসতাম—মিসেস হ্যালিডেও বাতরোগে—কিন্তু তবু এই দেখনা কত খবর নিয়েছি—”

—“শুধুই চিঠি-পত্রে ?”—জ্যোৎস্নার মনটার মধ্যে কোথায় যেন একটা কিন্তু-ভাব আসে ।

—“হ্যাঁ, কিন্তু ইংলণ্ডে তা সামান্য ব'লে মনে কোরো না । রীতিমত ভদ্রলোক—অভিজাত—যাকে জেন্টলম্যান বলি আমরা । কী পরিষ্কার ইংরিজি লেখে দেখ । আমি বলেছিলাম কিনা যে, তোমাকে বিশুদ্ধ ইংরিজি শেখানো চাই—যে-সে বাড়িতে গেলে—ওর নাম কি—যেমন-তেন্নে উচ্চারণ শুনে অভ্যেস যায় বিগড়ে । কেবল তুমি—অর্থাৎ—তোমাদের দেশের স্বাধীনচেতা লেডিদের মত যখন-খুঁসি বাড়ি-টাড়ি বদলাতে পারবে না তা আগে থেকে ব'লে রাখছি । আমাকে জানিয়ে করতে হবে স—ব ।”

শুনে জ্যোৎস্নার কানের কাছটা গরম হ'য়ে ওঠে কিন্তু উপায় নেই কিছু বদলার ।

হ্যালিডে আবার বলতে লাগলেন—“রীড বাক্লিদের পরিচয় শোনো । স্বামী স্ত্রী, তিনটি ছেলে । বড়টি ব্যাক্স অব্ ইংল্যান্ডে কাজ করে—”

নিসেস হ্যালিডে বিশ্বয়স্থচক \*একরকম মনডেসক্রিপ্ট\* শব্দ করে বললেন—“ব্যান্স অব্ ইংল্যাণ্ডে ? তাই’লে সত্যি জেটল্‌ম্যান”

—তা না তো বলছি কি ?—ব্যান্স অব্ ইংল্যাণ্ডে কি আর থাকে-তাকে কাজ দেয় ?—কী বলছিলাম ?—হ্যাঁ, তারপুর, মেজ ছেলে কাজ করে রয়্যাল ম্যারিনে—লেফটেন্যান্ট হ’ল ব’লে ; আর—ওর নাম কি—ছোটটি পড়ে অক্সফোর্ডে । ছেলেরা মাঝে মাঝে বাড়ি আসে, তা না হ’লে বুড়োবুড়ি আর চাকরাণি ছাড়া অন্য কেউ নেই—ঠিক আমি যা চাই, বুঝেছ তো এলিজাবেথ ?”

নিসেস হ্যালিডে ঘাড় নেড়ে জানালেন—আপসা নেই কিছুই তাঁর কাছে । তার পর জ্যোৎস্নার দিকে তাকিয়ে—“তুমি নিঃশব্দে যাও সে বাড়িতে—মাই ডিয়ার—কিছু মনে কোরো না, আমরাও তোমাকে রেগু ব’লেই ডাকব । সবই তো ঠিক হ’য়ে গেল আর কি, আজকের লাঞ্চটা এখানেই সেরে নাও । মাদ্রাস কারি রান্না হয়েছে তোমার জন্তে—আমাদের কুকটা ছিল কি না তোমাদের দেশে—একটা হোটলে ।—খাওয়া-দাওয়ার পরে বব্ রেখে আসবে তোমায় ।”



জ্যোৎস্না বেলসাইজ্ পার্কে এসেছে আজ তিনদিন, বিকেলবেলা উপরে শোবার ঘরের জানলার কাছে ব’সে অন্তমনস্কভাবে বাইরে বাগানের দিকে চেয়ে আছে । থেকে থেকে স্বীত শরীরটা কেঁপে উঠছে, পায়ের উপর পা ব’সে একটু গরম হবার চেষ্টা করছে এক একবার—কিন্তু উঠে গিয়ে বিছানার পাশ থেকে গরম ‘রাগ’-টা এনে ধুতৌ ঢাকা দেবার উত্তম কই মনের মধ্যে ? ব’সে ব’সে আকাশ-পাতাল

ভাবছে। এই খন্দনাতিনেকের মধ্যে এখানে এমন কতকগুলো ব্যাপার ঘটেছে যাতে ওর আটপোরে মনটা যথেষ্ট ধাক্কা খেয়েছে।—বব্‌ হ্যালিডে তো সেদিন ওকে এ বাড়িতে পৌঁছে দিয়েই চম্পট—মিনিট পাঁচেকও দাঁড়াল না, একলাই বাড়ীর কর্তার সঙ্গে আলাপ সারতে, হ'ল ওকে। অতি দীর্ঘ—ছফট?—হবে বৈ কি। শুকনো বটের জটের মতো চেহারা মিসেস রীড বাকুলির। স্বয়ং সদর-দরজা খুলে ভারি ক্লি চলে—সম্ভ্রান্ত গমকে শুধালেন—“কী প্রয়োজন, কাকে চাই?”—

—“মিষ্টার হেন্‌রি হ্যালিডের কাছ থেকে আসছি—আমি—ইনি মিস চার্টার্ড—আজকে য়ার আসবার কথা ছিল—”

—“ও, ভেতরে এসো—রোসো, বাইরে জুতোটা ঝেড়ে নাও আগে; ব্যস্—এবার আসতে পারো। না না—ছাতাটা রাখো ওখানে। মাদলীন!”

—“মাদাম!”—একটি মোটাসোটা হাশুমুখী যুবতী হাঁপাতে হাঁপাতে ছুটে এলো নিচের রান্নাঘর থেকে।

মিসেস রীড বাকুলি জ্যোৎস্নাকে দেখিয়ে বললেন—“তেতলার ঘরে নিয়ে যাও—পেছনেরটায়।” অতঃপর জ্যোৎস্নার দিকে ফিরে—“ওপরে গিয়ে হাতমুখ ধুয়ে তৈরি হ'য়ে এস গে,—ঠিক চারটেয় চা—মিষ্টার রীড বাকুলি একমিনিটও এদিক-ওদিক হওয়া পছন্দ করেন না। নয়ত বলো—মাদলীন চা তোমার ঘরেই দিয়ে আসবে,—কিন্তু সেটা তোমার অভিভাবক টান না—তিনি ~~বলছেন~~ তোমাকে আদব-কায়দা শেখাতে—তবে আজকের দিনটা আমি—”

জ্যোৎস্না তাড়াতাড়ি বললে—“কিছু দরকার নেই চা ওপরে পাঠাবার—আমি এক্ষুনি তৈরি হ'য়ে নিচ্ছি।”

—“সে-ই ভালো—আমি সব বিষয়ে নিয়ম মেনে চলব। ভাঙ্গাবাসি—  
যেমন কথা তেমনি কাজ—ইংলণ্ডের অভিজাত পার্টিবারে কথার নড়চড়  
হবার জো-টি নেই—”

ভয়ে আর ভক্তিতে জ্যোৎস্নার প্রায় দম বন্ধ হয় আর কি ! ডয়—এই  
অভিজাত-গৃহিণীর সঙ্গে সব সময় তাল রেখে চলতে পারবে কি না। ভক্তি  
—এঁদের উচ্চ নীতিজ্ঞান, উচু চালচলনের বহর দেখে। নাঃ—হ্যালিডে  
জ্যোৎস্নাকে নেহাৎ জলে ফেলেননি তাহ’লে—যদিও বুদ্ধবয়স আর বাতের  
দোহাই দিয়ে—না মিষ্টার, না মিসেস কেউ একবারও বাড়িটা বা বাড়ির  
কর্ত্তব্য নিজের চোখে দেখতে এলেন না—তবে এটাও বোধ হয় এপারের  
অভিজাতদের কায়দা—এটিকেট ! ববী হ্যালিডে তো ছেলেমানুষ—চট  
ক’লে চ’লে যাওয়ার ক্ষেত্রে তাকে দোষ দেওয়া যায় না।...যাহোক—  
জ্যোৎস্না কী ভুলটাই করেছিল মনে মনে ক্ষুণ্ণ হ’য়ে যে গুঁরা ওকে না  
দেখেন—একটা আজগুবি জায়গায় একলা পাঠাচ্ছেন। ওর ভেবে  
দেখা উচিত ছিল যে এটা হচ্ছে ইংল্যান্ড—আছে সে জগতের সেরা  
সহর লণ্ডনে, যেখানে তারে-বেতারে বিশ্বভৌম খবরের লেন-দেন হ’তে পারে  
ঘরে ব’সেই—বাত বা বার্কক্য নামজুর। হ্যালিডেরা ঠিকই বলেছেন—  
এরা সত্যিকার জেন্টলম্যান, ঘরদুয়ার তুতক বকবক করছে বটে।  
মাদলীনের সঙ্গে সিঁড়ি দিয়ে উঠতে উঠতে জ্যোৎস্না চম্কে চম্কে ওঠে,  
ভাবে, আর মনটা হান্কা হওয়া উচিত ভেবে প্রসন্ন হ’য়ে উঠতে চেষ্টা করে।

ঘরটা দেখিয়ে দিয়ে আধ-আধ ইংলিশ ভাষা মেড বললে—“তবে আমি  
এখন বাই, মাদমোয়াসেল ?”

জ্যোৎস্না আশ্চর্য্য হ’য়ে বললে—“তুমি ইংলিশ বুও ?”

রক্ত অধর কুলিয়ে হাত নেড়ে চোখ মুখ খুঁসিয়ে, মেড সাফ্ জবাবই

দিল—“ইংরেজ হাতে যাবো কোন্‌ হুঁথে ? ওরা জানে কী ? রান্না যা করে—”

জ্যোৎস্না হাসি চেপে বাধা দিয়া বলল—“থাক—কিন্তু তুমি তবে কোন্‌ দেশী ?”

—“বেলজিয়ান মাদমোয়াসেল—খাঁটি বেলজিয়ান। সাধ ক’রে এইছি এ পোড়া ইংরেজদের দেশে ? পেটের জ্বালায়—” মুখ সামলে নিয়ে বললে—“ঐ কোণে আপুনার মুখ খোবার জল, তোয়ালে, সব সাজানো। ঘটা বাজতে শুনলেই উঠি-পড়ি ক’রে নিচে ছুটবেন কিন্তু, একমিনিট দেরি না হয়, নইলে—” মুখভঙ্গি ক’রে বাকি কথাটা উচ্চ রেখেই বুঝিয়ে দিলে।

জ্যোৎস্না হেসে ফেলল—“আচ্ছা, কিন্তু খাবার-ঘর কোনটা চিনব কী ক’রে ? এখনো তো এ-বাড়ির কিছুই জানি না।”

—“খাবার-ঘরে ! Mon dieu !—দীড বাকুলিরা চা খাবে খাবার-ঘরে ? আপনি বলছেন কি ?”

জ্যোৎস্না অবাক হ’য়ে গেল—“কেন ? এমন কী বেষাশ বললাম—”

—“বেশাশ নয় ?—বাঃ—এঁদের যে সব বনেদি চাল !... শোনেননি ?—কার বংশধর গুঁরা ?”

—“তার মানে ?”

—“শুনবেন আস্তে আস্তে, থাকুন তো দিনকতক !”

জ্যোৎস্না এত আশঙ্কিত হয়েছিল মাদলীনের রহস্যময় কথাবার্তা ধরণধারণ দেখে—এতক্ষণ ওর খেয়ালই হয়নি যে, যে-বাড়িতে থাকতে এসেছে, সে-বাড়ির মালিকের বিরুদ্ধে তাদেরই চাকরাণীর চুকলি-কাটা—ই্যা চুকলি-কাটাই বৈকি—তেনে যাচ্ছে এতটুকু বাধা না দিয়ে। এখন সেটা



স্মরণ হওয়ায় চকিত দৃষ্টিতে ঘড়ির দিকে তাকিয়ে বললে—“এই যাঃ, চায়ের সময় হ’য়ে গেছে, এখনি তো ঘণ্টা বাজবে, কাপড় ছাড়বার সময়—? আচ্ছা, তুমি যাও এখন। কী নাম যেন?”

—“আমার, মাদমোয়াসেল? মাদলীন—মাদলীন বুরিয়েন্।”

—“বিবাহিতা?”

অস্ফুটস্বরে কী যেন ব’লে মাদলীন তাড়াতাড়ি নিচে নেমে গেল।

\* \*  
\*

ড্রইংরুমে পা দিতেই মিসেস রীড বাক্লি ম্যান্টলপীসের ঘড়িটার পানে তাকিয়ে ব’লে উঠলেন—“তোমার কিন্তু পাঁচমিনিট দেরি হ’য়ে গেছে আজ।” মিষ্টার বাক্লি তাড়াতাড়ি উঠে মাথাটা ঈষৎ হেলিয়ে অভিবাদন ক’রে একথানা চেয়ারের ডগায় হাত দিয়ে একটু নেড়ে চেড়ে সেটা আবার সেখানেই রেখে দিলেন; ভাবখানা—এইটাতেই তলুরক্ষা করতে হবে তার। প্রথমটা ও বুঝতে পারেনি—পরে বুঝে সশব্দে বসল। মিসেস বাক্লি তীক্ষ্ণদৃষ্টিতে একবার ওর আপাদমস্তক পরীক্ষকের দৃষ্টিতে দেখে নিয়ে বললেন—“তুমি ড্রেস বদলাওনি?”

—“সময় পাইনি। রাত্রে বদলাব।”

—“চায়ের সময় একটা হাল্কা ব্রুয়ের চিয়ারফুল পোষাক প’রে আস। উচিত ছিল তোমার—এটার বড্ড ড্রীং—নিশ্চয় ট্রাভেলিং গাউন, কি বলা?”

—“গাউন? না তো—এ যে শাড়ি—

—“কী? না—কী বললে?”

—“শাড়ি খান্নে নি ?—আমরা শাড়ি বলি আমাদের এরকম কাপড়কে—”

—“ও—ঈষ্টের কোন বিশেষ ফ্যাশান বুঝি ?”

—“না, ফ্যাশান-ফ্যাশান নেই আমাদের। সব একই রকম কাপড়—পাঁচ ছ গজের পীস্ এক একটা—”

—“ব্লাউজ আলাদা ?”

ওর হাসি পায়—“দেখতে চান আপনি ? বেশ তো, দেখাব একমিনিট—”

মিসেস বাক্লি ভাড়াভাড়ি—বোধহয় নিজেদের অভিজাত্য স্বয়ং ক’রে—বললেন—“না নানা—তোমাদের কাপড়-চোপড় সঙ্ক্ষে অল্প কৌমো কোতুল নেই—আমরা, কেবল, একরকম আউটল্যান্ডি ধরণের পোষাক পরে তো এ-বাড়িতে থাকা চলবে না—”

জ্যোৎস্না কটকিত হ’য়ে বললে—“কী করতে হবে তাহ’লে ?”

—“কালই টেলার ডাকিয়ে পোষাক করতে দেব তোমার জন্যে—”

আতঙ্কে জ্যোৎস্না চেয়ারটা ঠেলে উঠে পড়ল—“বলেন কি ? না মিসেস বাক্লি, না—আমি কিছুতেই ক্রক পরতে পারব না আপনাদের মত—আপনার বাড়ি থেকে চ’লে যেতে হয় সে-ও স্বীকার—”

মিসেস বাক্লি পিঠটা স্পুঁরি গাছের মত সোজা ক’রে উঠু হ’য়ে ব’সে বললেন—“বোসো শান্ত হ’য়ে। উত্তেজিত হওয়াটা অভিজাত্যের নিদর্শন নয়, তোমায় ভারতীয় বনেদি বন্ধু মেয়ে জেনেই রাজি হয়েছি বাড়িতে রাখতে। তোমার অভিজাত্য বলেছিলেন যে ছেলেমানুষ, প্রায় স্কুলগার্ল, গ’ড়ে-পিটে মানুষ ক’রে মিত্তে বেগ পেতে হবে না। তা তুমি প্রথম থেকেই এমন ছটু বোকা হ’য়ে যাও বৈকিয়ে চললে—হঁ, তাহ’লে আমাকে বাধ্য হ’য়ে হ্যালিডে পার্টিতে সব রিপোর্ট করতে হবে।”

জ্যোৎস্না অসহায়ভাবে একবার মিষ্টার বাক্লির দিকে তাকিয়ে দেখল  
ভদ্রলোক যদি ওর হ'য়ে একটা কথাও বলেন ! কিন্তু ওর দৃষ্টির উত্তরে  
কর্তা শুধু একটু ফিকে দ্ব্যর্থক হাসি হাসলেন দেখে কাম্পিত কণ্ঠে বললে—  
“আমি সত্যি বলছি আপনাকে, আমার কেটে ফেন্সেও শাড়ি ছাড়া আর  
কিছু পরতে পারব না—মিষ্টার হ্যালিডে আমাকে জোর ক'রে বিলিতি  
পোষাক পরাতে পারবেন না তো !”

—“মাই ডিয়ার, তোমার কথাবার্তা রা—দার ঝাঝালো, আর একটু  
নরম হ'য়ে কথা বলতে শেখো—আমাদের জেন্টল ব্রাডে সয় না ও-রকম  
—মার্নে অভব্য কথাবার্তা ।”

জ্যোৎস্নার মুখে ঈষৎ লালচে আভা দেখা দিল :

—“আমি শুধু এটুকু করতে পারি যে শাড়িখানা আর একটু উচু ক'রে  
পরব এবং গায়ের দিকে খুব টানটান ক'রে দেব যাতে যতটা সম্ভব ফ্রকের  
মত দেখায়, তার বেশি না ।”

—“আচ্ছা, সে তোমার অভিভাবকের সঙ্গে পরামর্শ ক'রে ঠিক করব  
’খনি তোমার কিছু বলার দরকার নেই। মনে রেখো, তুমি এসেছ  
এখানে উচ্চতর শিক্ষা দীক্ষা নিতে। তোমার থেকে যারা বেশি জানেন  
শোনেন, তাঁদের বিবেচনা মতই তো চলতে হবে তোমার। আর, এই  
দেখ, ওটা কি তোমার কানে ?”

—“হুল বলি আমরা। আপনারা শুভো পেরেন না ? টিংকেট, না  
ইয়ারিং কী বলেন যেন ?”

—“ইয়ারিং ? একে আবার নাকি, আমরা ইয়ারিং বলি ? ছি,  
ছি ! এরকম অসভ্যের মত—বো ক'রে মিষ্টার বাক্লির দিকে ফিরে—  
“দেখেছ জর্জ, কানে নাকি ইয়ারিং পরি; দাঁড়া এত বড় ! ঠিক

কাক্রিদের মতো ক্রি। কাগজে যে পড়ি ইণ্ডিয়ান মেয়েদের রিকট বিকট  
গয়না-প্রীতির কথা সব দেখছি সত্যি। কী বিত্তী! আর কী সখ!"

বেচারি জ্যোৎস্নার সাধের ঝুম্‌কো! কলকাতার সেরা কারিগরের  
তৈরি! রাগে দুঃখে ওর বৃকের ভিতরটায় কী যে করে—! চা আর  
চোখের জলে প্রায় এক হ'য়ে যায়।

—“জর্জ!—বলি, শুনছ?—আঃ!”

মিষ্টার বাকলি তাড়াতাড়ি হাতটা কানের কাছে নিয়ে ঝুঁকি ব'সে  
বললেন—“কী বলছ হ্যারিয়েট?”

—“তোমাকে নিয়ে যা মুক্লি—কানের মাথা একেবারে খেয়ে বসেছ।  
একটা স্নুৎ-দুঃখের কথা বলবার, ঘরগেরস্তালির আলোচনা পরামর্শ  
করবার জো-টি আছে? কানই যজ্ঞটা সারিয়ে এনো। বলছিলুম কি,  
এই মেয়ে এরকম সাজ-পোষাক ক'রে আমার বাড়িতে থাকলে ছেলেরা  
এলে বলবেই বা কী? আর ওর সঙ্গে মেলামেশা করতে দিলেই  
বা পাড়াপড়শীর কাছে মুখ দেখাব কী ক'রে?”

মুখ যথাসম্ভব সম্ভ্রান্তভাবে মেঘলা ক'রে মিষ্টার বাকলি বললেন—“তুমি  
কি ভাবছ এ-কথা আমারও মনে হয়নি নাকি? এম্নিতেই লোকে  
বলাবলি শুরু করেছে পেয়িং গেট্‌ নেওয়ায় আমাদের।” একটু ভেবে—  
“যাক্ এখন আর উপায় কী বলো?—তবে মুক্লি এই যে, ‘জনি’ তো ফি  
শনিবারেই বাড়ি আসে, এবার ক্রিসও আসবে ছুটিতে। দেখো, ছেলেরা  
যেন ওর সঙ্গে কোথাও বাইরে-টাইরে না যায়—এ-ছাড়া আর কী করতে  
পারি বলো—এখন?”

—“বাইরে?—কিন্তু! শুনছ গা মেয়ে? ভালো কথা, তোমার  
ক্রিস্চিয়ান নাম তো বলো না—”

জ্যোৎস্না যথাসম্ভব নিজেকে শাস্ত ক'রে বললে—“জি/চরান নাম টাম নেই, আমার হিন্দু নাম—”

—“কী জালা! আত্মনাম জিজ্ঞেস করছি—তোমার নিজের নাম—”

—“জ্যোৎস্না-রাণী, বাবার নাম—চাটার্জি।”

—“দুটোর একটাও আমি উচ্চারণ করতে পারব না, সে তুমি যতই রাগ করো না কেন। ছোট্ট ক'রে একটা নাম বলো—”

—“জ্যোৎস্না”—ও অতি কষ্টে আত্মসম্বরণ করে।

চোখ কপালে তুলে ভদ্রমহিলা বললেন—

“জট্—না, অসম্ভব। তোমাকে আমরা ডাকতে পারি এমন একটা নাম দিতে হবে...হাঁ, এই ঠিক হবে—জয়—জয়।”

—“আমি এসে খুব তো ‘জয়’ হয়েছে আপনাদের! ও নাম চাইনে রেণু ডাকতে পারেন ইচ্ছা হ’লে। বাড়িতে আমাকে ঐ নামেই ডাকেন নিকট আত্মীয়েরা।” সজোরে ঘাড় নেড়ে নামকরণী বললেন—

“না, না, একটা ভদ্র ইংরিজি নাম চাই, নইলে আমাদের স্মৃতি হবে না।” ব’লে মিসেস বাকুলি এবিষয়ে সমস্ত আলোচনা হাত নেড়ে দাবিয়ে দিলেন।—

জ্যোৎস্না সারা সন্ধ্যাটা ব’সে ব’সে ভাবলে—“এই বুঝি এদেশের অ্যারিস্টক্রেট? আচ্ছা, আমি কি সত্যি তারি উচুদরের ভদ্রপরিবারেই এসেছি? কাকেই বা জিজ্ঞেস করি? একটা জামালোক নেই ত্রিসীমানায়। হ্যালিডেরা হয়ত আরো য়া তা ব’লে বসবে শনৈঃ শনৈঃ।”

সন্ধ্যা ঠিক সাতটায় রীড বাক্লির ডিনার খেতে বসে। আধ-ঘন্টা আগে থাকতে ষ্টার বাক্লি পোষাক পরতে যান। ডিনার স্টপ'রে নেমে আসতে সিঁড়ির নিচে জ্যোৎস্নার সঙ্গে সাম্না-সাম্নি। ওকে দরজাটা খুলে দিয়ে বিজে একটু পরে এলেন।

শাড়ির নিন্দা সহ্য করতে না পেরে জ্যোৎস্না রাগ ক'রে একটা জমকালো ময়ূরকণ্ঠী বেনারসী প'রে নেমেছে। বারবার আড়চোখে সেদিকে তাকিয়ে মিসেস বাক্লি বললেন—“পোষাকের বিষয়ে না হয় পরে বিবেচনা করা যাবে জয়, ফ্রকের ম'ত ক'রে যদি পরতে পার—”

জ্যোৎস্না আশু বিজয়ানন্দ গোপন ক'রে সংক্ষেপে বললে—“দেখি।”

—“তখন কী যে একটা রং পরেছিলে—“ভারি ডিপ্রেসিং!—এটা দেখো তো জর্জ—”

বাক্লি আতঙ্কিত পেয়ে সাহস ক'রে বললে—“রোজ ডিনারের সময় যদি এরকম স্টপ পর, ভারি খুসি হব।”

জ্যোৎস্না মনে মনে বললে—“ব'য়ে গেছে আমার রোজ ডিনারে এত হাঙ্গাম করতে তোমাদের মন পেতে। একদিন পরেছি ঢে—র! এরকম নিদারুণ অভিজাত পরিবারে থেকে আমার কাজ নেই। হ্যালিডে না শোনেন তো বাবাকে টেলিগ্রাম করব।” মুখে বললে—“বিকেলেরটা বাইরে পরবার শাড়ি ছিল কিনা, গাঢ় রং না হ'লে ময়লা হবে যে শীগ'গির!”

—“তুমি কাপড়চোপড় বাড়িতেই ধোয়াতে পার, তার জন্তে অবশ্য একটু দিতে হবে মাদলীকে।”

—“তা তো বটেই—”

ছোট্ট কাচের মাফিন একটা হাল্দি পদার্থ ঢেলে মিষ্টার বাক্লি জ্যোৎস্নার দিকে এগিয়ে দিলেন। জ্যোৎস্না হাসি হেসে।

—“এটা ?”

—“ড্রিংক । খাও, সারাদিনের ক্লান্তি চ’লে যাক্কে।”

—“ম—দ ! কিন্তু ও আমরা সাতজন্মেও ছুই নেই, মিসেস বাক্লি ।”  
শোধ তুলল ও ‘সাতজন্মে’ কথাটা পাণ্টে দিয়ে ।

ঘরনী বিরক্তি চেপে বললেন—“আজ খেতে হয় । তুমি আমাদের অতিথি প্রথম রাতটা ! না খেলে অভদ্রতা হবে ।”

—“আমার অভ্যেস নেই, কিছু মনে করবেন না ।”

মিষ্টান্ন বাক্লির মুখটা ঈষৎ লাল হ’য়ে উঠল, কিন্তু স্ত্রীর দিকে তাকিয়ে কিছু বললেন না । ‘মিসেস বাক্লি কঠিন মুখে বললেন—“তুমি আমাদের আতিথ্যকে অপমান করলে ? জানো—ওয়াইন্ আমরা হাকে-তাকে অফার করি না ?”

জ্যোৎস্না সহজ অথচ দৃঢ় স্বরে বললে—“আপনাদের আতিথ্যকে অপমান করবার আমার এতটুকু ছরভিসন্ধি নেই । শুধু দয়া ক’রে ভেবে দেখুন—আমি একটি বিদেশী মেয়ে, আপনাদের আদব-কায়দা আর আমাদের আদব-কায়দায় এক এক সময় আকাশ-পাতাল তফাৎ থাকতে পারে । না খেলে আপনারা রাগ করছেন, খেলে আমার আজীবন সংস্কারে আর প্রিন্সিপলে আঘাত লাগবে । আমি করতে পারি এমন কোনো কাজ বলুন,—দেখবেন, আপনাদের ভদ্রতার মান রাখতে জানি কি না ।”...

কিন্তু সারা সন্ধ্যাটা বাক্লি-দম্পতীর মৃথের কাঠিন্য ঘুচল না ।

রাত্রে শুতে গিয়ে কাপড় ছাড়বার সময় জ্যোৎস্নার ভারি শীত করতে লাগল । মাদলীনকে ডেকে বললে—“আমাকে একটু আগুন ক’রে দিতে পারো ?”

—“পারব নাকেন ? কিন্তু ঠাকরুণের হুকুম লাগবে।”

—“বেশ তো, যাও না—জিজ্ঞেস ক’রে এসো।”

খানিক পরে মাদলীন এসে বললে—“মাদ্‌মোয়াসেল, ঠাকরুণ বললেন কি, শোবার ঘরে আগুন জ্বালানো তাঁর ইচ্ছে নয়। আপনার যদি এ-ঘর ঠাণ্ডা লাগে, তবে কাল দোতলার একটা ঘরে যেতে পারেন—এরই ঠিক নিচেরটা। সেখানে গ্যাস্‌রিং আছে, একটা শিলিং বাত্রে ফেলে দিলেই দিব্যি আগুন পোয়াতে পারবেন। কিন্তু—”

—“কি ?”

মাদলীন মুখ টিপে হেসে বললে—

—“ভাড়া বেশি লাগবে—”

—“কত ?”

—“এখন যত দিচ্ছেন তার প্রায় আড়াই গুণ।”

—“বলো কি !! আগুনের জ্বলে তো এছাড়া এমনিই বাত্রে শিলিং ফেলতে হবে বলছ—তবু এত ?”

—“নৈলে ভেবেছেন কি ?” ওর তির্যাক হাসি উদার হ’য়ে ওঠে।

—“আর, যদি না যাই ও-ঘরে, তাহ’লে রাতের পর রাত এখানে হিমে ব’সে পড়াশুনো করতে হবে আমাদের—এই না কি ?”

—“সেটা জিজ্ঞেস ক’রে আসছি আবার।”

জ্যোৎস্না ঠাণ্ডায় আর না পেরে বিছানার কম্বল মুড়ি দিল।

মাদলীন এসে দরজায় মূহুটোকা দিকে ঘরে ঢুকে বললে—“ঠাকরুণ বলছেন—ডাইনিংরুমে প্রায় নটা পর্যন্ত আগুন জ্বলতে থাকে। ডিনারের পর সেখানেই ব’সে পড়াশুনো করতে পারেন আপনার ইচ্ছা হ’লে।”

—“ধন্যবাদ মাদলীন। অনেক কষ্ট করেছ তুমি, এবার যাও।”



—“তা তো যাব কিন্তু কী ঠিক করলেন বলব ?”

—“ঠিক কিছুই করিনি এখনো, ভেবে বলব কাল। এত গুণগোলে পড়ব জানলে আমি—”

—“জানলেও কী-ই বা করতেন, মাদমোয়াসে<sup>১</sup> এ বিদেশ বিভূ<sup>২</sup>য়ে  
—আপনি একলাটি—অসহায়—তার ওপর মেয়েমাছুষ।”

—“তাইতো দিনকতক হবেই স’য়ে থাকতে। দেখি বন্ধুবান্ধবকে জিজ্ঞেস-টিজ্ঞেস ক’রে। আমাদের দেশের কত ছেলেমেয়ে আছেন এখানে। কারো নু কারো সঙ্গে দেখা হবেই দুদিন পরে।”

—“সেই ভালো। এখন আমার ষ্টোভটা এনে দেব কি ? ঘরটা একটু গরম হ’লে না হয় নিয়ে যাবো আবার—”

—“তোমার শীত করবে না ?”

—“করলেও আপনার মতন নয়, আমাদের হাড়ে—”

বাইরে মিসেস রীড বাকুলির গুরুগম্ভীর আওয়াজ শোনা গেল—  
“আসতে পারি কি ?”

দোর খুলে দিয়েই মাদলীন ছুটে চ’লে গেল।

ভদ্রমহিলা ধীর-পদক্ষেপে জ্যোৎস্নার কাছে এসে বললেন—“কেমন, আরাম হয়েছে তো ? আর একখানা কম্বল দেব ? সত্যি শীত পড়লে গরম জলের বোতল দেব বিছানায়। এখন থেকেই আগুন পোয়ানো আর গরম বোতল পিঠে দিয়ে শোয়ার অভ্যেস করলে সত্যিকার শীতের সময় তোমাকে চারটে বোতল আর ভারে ভারে কম্বল দিয়েও পার পাব নাকি আমি ?”

—“তাই বুঝি দিচ্ছেন না ? কিন্তু আমার গরম দেশের হাড় যে এই মায়া-শীতেই—”

—“চুপ, বেশি কথা বলে না—এতটুকু মেয়ে বড়দের সঙ্গে সমানে রবাব করে! ওয়েল-ব্রেড মেয়েরা যা বলি তা-ই শোনে। ভালো কথা, ওই দাদলীনের সঙ্গে তোমার মেলামেশা গলাগলি আমার পছন্দ হয় না। ওরা ছাটলোক, চাকরাণী, যা তা ইংরিজি বলে—কালচারের জানে কী যে, আমি ওর সঙ্গে এত রাত্তিরে মুখোমুখি ফিশকাশ করছিলে?”

—“কেন?—ওকে তো বেশ ভালোমাহুষ—”

—“ভালোমাহুষ? ভারি জানো তুমি কি না! ডুবে ডুবে জল খায়। কেন এসেছে এদেশে জানো? ওর ছেলে আছে—ছাদে ছোট্ট মায়রার থাপের মত একটা ঘরে থাকতে দিই—”

—“তাতে কী হয়েছে?”—

—“কী হয়েছে? বাঃ বেশ মেয়ে তুমি—এ-ও ব’লে দিতে হবে নাকি? গালিয়ে এসেছে বেলজিয়ম থেকে। বুঝতে পারছ না?”

—“না।—”

—“হাঁসপাতালে নাস’ ছিল। স্বামী নেই”—মুখে শ্রাবণের মেঘ নিয়ে আসে গুঁর—“কোনোকালে ছিল না। বুঝলে তো এবার?”

—“হুঃ—”

—“হ্যাঁ; তাই ওর সঙ্গে তোমার কোনোরকম ঘনিষ্ঠতা আমি বরদাস্ত রব না।”

এতটা মুরুবিয়ানায় জ্যোৎস্নার গা-র মধ্যে হিমেও উত্তাপ দেখা দিল, ন দীর্ঘ বিরসকণ্ঠে বলল—“কিন্তু, মিসেস বাকুলি, আমার বলবার কথা এই, মাহুষের সঙ্গে মাহুষের যতটা ভদ্রতা আর স্ত্রীল ব্যবহার করা উচিত, তটা করতেই হবে আমাকে—তা সে বেরকম লোকই হোক।”

মিসেস বাকুলির স্বর আরও একটু রুক্ষ শোনাল—“বেশ। কেবল

আমার কর্তব্য আমি করলাম—কথাটা তোমাকে বলেরাখলাম : আমার ছেলেদের ওর ছায়াও মাড়াতে দিই না।—আচ্ছা, তুমি এখন যুনোও। আমি বুঝতে পেরেছিলাম ও তোমার এখানে ব'ল ব'সে অনর্গল ব'কে বাচ্ছে, তাই আসতে হ'ল ওপরে।”

—“আমি ভেবেছিলাম বুঝি আমায় দেখতে এসেছেন।”

—“তার কোনো দরকার আছে কি ? তোমায় তো নিচেই শুভরাত্রি জানিয়েছিলাম।”

জ্যোৎস্না চুপ করে রইল। বলবে কী ও এই বটের জটের মত শুকনো মাহুখটিকে ? হৃদয় বলে কোনো বাংলাই-ই কি ওর আছে সত্যি ?

প্রথম রাতটা জ্যোৎস্নার নানান দুঃস্বপ্নে কাটল। পরের দুদিন গনি আর রবিবার। ‘জনি’ এই দুটো দিন বাপ-মার কাছে থাকতে আসে। ও-ই ওদের বড় ছেলে, মায়ের মত ছফুট লম্বা, কিন্তু চোখেমুখে সে ধূর্তানি আর কুটবুদ্ধির ছাপ নেই। উল্টো—কেমন যেন নির্বোধ ধরণের চেহারা। মনেতে ব'সে যত রাজ্যের আজগুবি গল্প করবে। ডিনারের টেবিলে মাসের পর মাস মদ খেয়ে মুখ লাল করে ফেলবে—তবু থামবার নাম নেই। জ্যোৎস্না উঠেও যেতে পারে না, আবার ব'সে থাকতেও কী যে দারুণ কষ্ট—! এক একবার জনি ওর দিকে এমন করে তাকায় আর হাসে যে, ইচ্ছে করে কিছু একটা ছুড়ে মারে। জনি ওর মদ খেতে আপত্তি করার কথাও শুনেছে বাড়ি এসে, তাই নিয়ে টেবিলে আর ড্রইংরুমে সে কী হাসাহাসি ! জ্যোৎস্না যত শীগ্গির পারে সেই ঠাণ্ডা শোবার ঘরে গিয়ে আশ্রয় নেয়। সেখানে গায়ে কব্বল জড়িয়ে ব'সে ব'সে ভাবে—কী করলে এই পোড়া বাড়ি থেকে উদ্ধার পাওয়া যায় ? সোজা কাঁধকে

লিখবে?—না, সব আগে একবার হ্যালিডেকে সব খুলে বলাই ভালো। হ্যালিডেরা আর যা-ই হোক না কেন—নিষ্করণ নয়। তাছাড়া এরকম ছেলেও ওদের নেই যে প্রতি সপ্তাহের শেষে বাড়ি এসে মদ খেয়ে খেয়ে তিতিবিরক্ত ক'রে মাঝে সবাইকে। সব চেয়ে বিরক্তির কারণ—বাক্লি-দম্পতি ছেলের অভব্য দুরন্তপনায় একটি কথাও বলে না—কোথায় যায় তখন ওদের আভিজাত্য কোথায় বা এটিকেট? আজ দুপুরে ও স্বচক্ষে দেখেছে: জনি ক'র্যনিরতা মাদলীনের পিছন পিছন ঘোঁরাফেরা ক'রে কি সব বিশী 'স্মাটি' রসিকতা করছে—মাদলীন কিছুতেই ওর হাত এড়াতে না পেরে শেষটায় বিকেলে এক ফাঁকে 'ওর ঘরে আশ্রয় নিলে, বললে—“দেখেছেন তো মাদমোয়াসেল? অথচ এর জন্তে সব গালসপ শুনেতে হয় আমাকেই, মিষ্টার জনি চ'লে যাওয়ার পরে। কম বিরক্ত করে আমায়?”

—“ও না কোথায় মন্ত চাকরি করে, মাদলীন?”

—“উ:—ওক গাছের মতন মন্ত!—বাক্লি অব ইংল্যান্ডে একটা কেরাগীগিরির জন্তে উমেদারি করছে আজ কবছর ধ'রে!”

—“পায়নি?”—

—“দেখছেন? ওকে দেবে কে চাকরি? উম্মাদ তো আর নয় তারা। শুনেছি কি-সব ফাই-ফরমাস খাটে মাঝে মাঝে—তাইতেই গোটা দশ বারো শিলিং পায় হপ্তায়। বাকি থরচ সব বুড়োবুড়িকে জোগাতে হয় ঘর থেকে। দেখেননি একটা মোটর-বাইকে ক'রে এসেছে?—মাসের মধ্যে কবার যে জরিমানা দিতে হয় বেকায়দার গাড়ি চালানোর জন্তে, তার ঠিক নেই। সে পয়সাও গর্চা দিতে হয় ওদেরই। ও হ'ল ঠাকরুণের সবার বড় আর সব চেয়ে নেওটো

ছেলে—দেখতে মার মত, তাই বুড়োও ওকে কিছু বলতে সাহস পায় না। থাকুন না কদিন, মাদমোয়াসেল, টের পাবেন সুবই এক এক ক’রে। ওদের অভিমান, ঠাট, ভড়ং সব ওপরকার—তলার পাক যে কত—”  
ব’লে কাছে স’রে এসে এদিক ওদিক চেয়ে বিশ্লেষণ ক’রে বললে—  
“উইক-এও বাড়ি এলে রাত্তিরে ঘুম হয় না আমার—ভাগ্যিস খোকাটা ছিল, কাঙালের ধন!”

জ্যোৎস্না বিবর্ণ মুখে বললে—“বলো কি?—এতটা?”

—“সত্যি বলছি, মাদমোয়াসেল, এই ক্রস ছুঁয়ে—”

—“ব’লে দাও না কেন?”

মান হাসে ও :

—“গরিবের কথা বলুন কানে তুলবে কে—যে বলব? আর, অনির বিরুদ্ধে বলব ওর মাকে!..তাও বলেছিলাম দু-একবার। ঠাকুর কি উত্তর দিলেন জানেন?” মাদলীনের চোখ দুটো ছল ছল ক’রে উঠল;—“বললেন, তোমার বেবিটার বাপের ঠিকানা—”

—“ছি ছি, থাক, আর বোলো না।”

ওরা দুজনে যেন পরস্পরের কত কাছে এসে গেছে হঠাৎ!... মাদলীনের চোখ চিক চিক ক’রে ওঠে। জ্যোৎস্না ওর একটা হাতের পরে খানিক হাত বুলিয়ে ছেড়ে দিয়ে বলল : “কাদে না—ছী।”

মাদলীন চোখ মুছে বাইরের দিকে তাকিয়ে থাকে।

রেণু বলে—“তবু তুমি থাকো কেন এখানে?”

—“থাকতে হবে না আর বেশিদিন। কিন্তু বিদেশী মেয়ে, সহজে কাজ

জ্যোটে কি বিভূয়ে? সবচেয়ে মুক্লি হয়েছে কোলের ঐ একরত্তিটাকে নিয়ে—একলা হ'লে ভাবত কে? একটা পেট চ'লে যেতই, কিন্তু কপাল-দোষে যখন একবার—মুখ রাঙা হ'য়ে উঠল বেচারির—থেমে গেল।

জ্যোৎস্না চোখ না'য়ে নিলে। হৃদয়টা ওর এত ভিজে ওঠে!...

মাদলীন বলল—“একজনের সঙ্গে আমার বিয়ের কথা স্ত্রী ঠিকঠাক। খোকার ভারও সে নিতে রাজি। সে একটা চাকরি পেলেই চলে যাবো এখান থেকে—হাড় জুড়োবে।”

জ্যোৎস্না খুসি হ'য়ে বললে—“সে-ই বেশ হবে। নিজের মক্কার নিজের মর্যাদায় থাকবে, যতই গরিব হও না কেন। ‘কিন্তু থাক’ এখন এসব আলোচনা মাদলীন, মিসেস বাক্লির কানে গেলে তোমায় বকবেন—”

—“ঠাকরুণের ভয় পাছে আমি ভিতরের অনেক কথা দিই ফাঁশ ক'রে।

নি কিনা একটু-আধটু! ওরা বুঝি শুধু শুধু রেখেছে আপনাকে? কেবল মানাদিক দিয়ে আপনার কাছ থেকে বেশি টাকা আদায় করবার ফন্দি। ছিল এখানে আপনার আগে এক রাশিয়ান ছাত্র—”

—“সত্যি? তবে না ওঁরা এর আগে কখনো পেয়িং গেষ্ঠ্ রাধেননি?”

—“রাধেননি আবার! তার আগে ছিল এক আর্মেনিয়ান ইহুদি—কারবারী, ইংরিজি জানে—তাকে ঠকানো সহজ নয়। সে শুধু পয়ত্রিশ শিলিং দিয়ে থাকত, আর তা-ও ঐ দোতলার ভালো ঘরটায়—বেথানে গ্যাস্‌রিং আছে—সেটাই আসলে পেয়িং গেষ্ঠ্দের জন্তে। আপনার অভিভাবককে সে রুমটার কথাই লিখেছিল ওরা, যদিও দেবার সময়ে দিয়েছে ওপরের বাজে ঘরটা, কিন্তু কেন জানেন? যত ভাড়ায় রাজি হ'য়ে এসেছেন, তার চাইতে আর একটু বেশি আদায়ের জন্তে। রাশিয়ান ছাত্রটি দিত আরও কম—বত্রিশ শিলিং। তবু আপনার কাছে সেই একই

ঘরের জন্তে এই যে ছুগুণ চাওয়া—এ-ও একটা চাল : জানে কি না ছুগুণ চাইলে অস্তুত দেড়গুণ দেবেই বেচারি মেয়ে আপনি—না জানেন দর-কষাকষি, না জানেন বড়ঘরের ফিকিরফন্দি । কিন্তু—ইয়ে—এসব কাজ করবে কী ক’রে জানেন ? খুব সাবধানে—ভদ্রভাবে ।”

—“তুমিই’খা এত কথা জানলে কী ক’রে ?”

—“সাবার টেবিলে সব বলাবলি করত মাদমোয়াসেল্ । বড়লোকেরা ভাবে—জানেন তো—যে ছোটলোকেরা ভড়ং, দেখলেই যায় ঘাবড়ে ! জানে, না তো—কিন্তু সে যাক । দেখবেন সব নিজেই—” মাদলীন বাঁকা হাসে—“তাঁছাড়া—এ-ও বুঝলেন না ?—কাল-বিদ্রোহ যে সাদার মজাগত—সেই আশায় ওরা ভেবেছে আমিও লুটপাটে ওদের সঙ্গে যোগ দেব । আপনার কাপড় ধুয়ে—বেশি ক’রে আদায়ের ইসারা—

—“হঁ, শুনেছি”—জ্যোৎস্নার আর ভালো লাগছিল না এসব শুনতে । ভিতরে ভিতরে ওর মন বড় কান্নাটাই কাঁদছিল । ‘জীবনে ইতিপূর্বে কখনো এত প্যাচ, এত কুটিলতার সঙ্গে পরিচয় হয়নি ওর । তাই সামান্য সাধারণ লোভের দৃষ্টান্তেও সংসারটা যেন কালিয়ে ওঠে !—মাদলীনের হঠাৎ ডাক পড়ল । সে চ’লে গেল । ও ভাবে আর ভাবে । ...আজ রবিবার, কালকেই সাউথ কেনসিংটনে যাবে হ্যালিডেদের কাছে । এই ঠাণ্ডা ঘরে ব’সে ব’সে পা ছুটো জ’মে যাবার উপক্রম হয়েছে যে । উঠে বিছানায় ঢুকবে, না কি করবে—ভাবছে, এমন সময় মাদলীন বাইরে থেকে ডেকে বললে—“মাদাম আপনাকে নিচে আগুনের ধারে গিয়ে বসতে বললেন । দ্রুইংরুমে দিবি আগুন জ্বলছে, যান না মাদমোয়াসেল্—অত মম খারাপ করে না, আপনাদের ভাবনা কি, পয়সা থাকলে এদেশে আর সত্যিকার ভয় পাবার কিছু নেই ।”

ওর কর্তৃত্বের এমন একটা সহজ প্রবোধ ওঠে ফুটে...জ্যোৎস্নার এত ভালো লাগে...ভরসাও পায়। বাস্তবিকই তো ও মিছামিছি কেন এতক্ষণ এত দুর্ভাবনা ক'রে মরছে! হ্যালিডে ওকে বিশ্বাস না করলেও, এবাড়ি বদলাতে না দিলেও, মাদলীনের মতন অনাথা তো ও নয়—নিঃসম্বলও নয়।—শুধু একটা টেলিগ্রাম করবার অপেক্ষা। নাঃ, এরকম 'পল্লবিনী লতেব' হ'লে চলবে না, একটু শক্ত হ'তেই হবে—মনটা কঠিন ক'রে গ'ড়ে তুলতে হবে, দাঁড়াতে হবে নিজের পায়ে। চিরদিন মাধবীলতার মত হকার খুঁজে বেড়ায়, পেলে বাঁচে, না পেলে ধুলোয়-কাদায় গড়াগড়ি খেয়ে-জীবনাস্ত করে,—ভারতীয় নারীর এই 'অবলা' অপবাদের ইতি হওয়া দরকার। ভাবতে হবে নিজেকে এখন ছাত্রী—স্কুল অব্ লাইফ-এর, এবং প্রতি কঠোর পরীক্ষায় সম্মানের সঙ্গে হ'তে হবে উত্তীর্ণ।

মুখহাত ধুয়ে পরিচ্ছন্ন হ'য়ে জ্যোৎস্না চলল নিচে। ড্রইংরুমের সামনেই জনির সঙ্গে মুখোমুখি।

—“কি মিস্—ইয়ে—জয়, আমরা যে আপনার দেখাই পাই না! মাঝে মাঝে আসবেন একটু নিচে-পানে কিম্বা এপাশ-ওপাশ—বেডরুমে গিয়ে তো আর হামেশা উঁকি মারতে পারি না—এখনই কি ততটা লিবার্টি—”

—“ধন্যবাদ মিষ্টার জনি, একবার কেন, হাজারবার দেখবেন নিচে—যদি ততদিন আপনাদের বাড়ি থাকি। এখন একটু স'রে দাঁড়ান দেখি, আমি ঘাই ভেতরে—”

—“আহা—হা—অত standoffish কেন গো।” ব'লে একটু কাছে ঘেঁষতে যায়। মদের গন্ধ!—জ্যোৎস্না একটু স'রে গিয়ে তাকায় ওর পানে কটমট ক'রে। জনি সটাং হেসে বললে—“আহা—হা—এত বেরসিক



কেন সুইট—” হাত ধরে আর কি। ও পাশ কাটিয়ে জোরে দরজায় টোকা দিলে। তারপরে জনির দিকে ফিরে চোখ থেকে আগুন ঝিকরে বললে—“সাবধান—এগিয়ে না এক পা-ও আর। ভেবেছ বুঝি এট তোমাদের বাড়ি ব’লে যা-তা ব’লে পার পাবে?—আমরা পথের মেয়ে নই যে তোমার ইতরতা ভয়ে ভয়ে সহ্য করব—”

ড্রিস্টিক্রমের দরজাটা খুলে মিসেস বাকলি বললেন—“কী—কী?—এত গোলমাল কিসের? দরজা তো খোলাই ছিল—”

“মামি, এটা একেবারে আগাগোড়া জিপ্সী মেয়ে—vixen একটা—ছুঁতে না ছুঁতে তড়বড় করে ওঠে। জিজ্ঞেস করলাম মেলামেশা করতে এত নারাজ কেন—একটু ইনোসেন্ট—অমুনি—বাই জোত—শুধু শুধু গেল ফেপে—”

মিসেস বাকলির মুখের ভাবখানা পলকে বদলে গেল—“এসো—জয়! এসো—চল একটু গল্প করিগে ডিনারের আগে। আজ আমাদের কোনে কাজকর্ম নেই, রবিবার—ডের অবসর।”

ঘরে ঢুকে একটু দম নিয়ে যথাসাধ্য সহজ হ’তে চেয়ে জ্যোৎস্না বললে—“রবিবার আপনারা চুপচাপ থাকেন না?—গির্জায়—”

—“ওঃ—সে সব কি জানো—ক্যাথলিকরাই একটু বেশি বেশি ভড় করে। আমরা সাবেকি প্রটেষ্ট্যান্ট, কখনো ধর্ম নিয়ে বাইরে বাড়াবাড়ি করি না, ধর্ম হচ্ছে ভেতরকার জিনিষ—যেখানে-সেখানে জাহির করতে নেই। Exhibitionism is not aristocratic. জাহিরিপন করে—বারা ভালগার।”

“হুঁ।”

—“আমার স্বামী” মিষ্টার বাকলিকে হাত দিয়ে দেখিয়ে—“ভয়ানক  
টু বংশের ছেলে, রাজার নীল রক্ত এঁর শরীরে—”

—“বলেন কি?”

—“অ-বি-ক-ল। অষ্টম হেনরীর কুলতিলক ইনি! আমিও এক  
শাস্ত্রাঙ্ক কণ্ঠের মেয়ে। আমার বাপকে এক কমিশন নিয়ে ভারতবর্ষে  
যতে হয়—”

“ও-

—“শুধু এদেশের নিয়মে বড় ভাইই সমস্ত ধনসম্পত্তির একমাত্র  
উত্তরাধিকারী ব’লে—অন্য সব ছেলেদের খেটে খেতে হয়—”

জ্যোৎস্না মাথা নেড়ে বললে—“পড়েছি বটে ইতিহাসে—”

মিসেস বাকলি সগর্বে বললে—“পড়বে বই কি। তা শোনো—আমার  
বান্ধী আজ পর্যন্ত ডিনারের ড্রেস না পরলে খেতেই পারেন না, ইষ্টায়  
একটা অন্তত টার্কিস্ বাথ গুর চাইই—উপরি—বাড়িতে নিত্য স্নান তো  
আছেই। এককালে বিস্তর টাকা ছিল—এখনো কম নয়—বাপের দিক  
থেকে দেওয়া আমার বিয়ের বৌতুক সব জমা আছে—আমরা তিনবোন  
বিয়ে না হওয়া পর্যন্ত ভারতবর্ষ থেকে পেম্পন পেতাম—”

—“সে কি! আপনারাও চাকরি—”

—“পাগলের মত কথা বলে না। আমরা চাকরি করতে যাবো কোন্  
হুংথে? আমাদের বাপ বড় চাকরে, তাই আমাদের খোরপোষ দিত  
গবর্নমেন্ট—”

—“কই, সে রকম তো কোনোদিন শুনি নি!”

—“তুমি কী-ই বা শুনেছ, কী-ই বা জানো—বলো?”—ব’লে  
উঠলেন ঠাকরুণ ঈষৎ অতিষ্ঠ স্বরে। “তাই শোনো যা বলি :

তখনকার দিনে বাপ পেন্সন পাওয়ার সঙ্গে সঙ্গে ছেলেমেয়েরাও পেত।  
‘আই সি এস’এর বিধবা স্ত্রীকে স্বামীর পেন্সন আজীবন ভোগ করতে  
দেনেছ, না, তা-ও শোনো নি?”

জ্যোৎস্নার একটু ছষ্টমি চাপল, এ প্রশ্নের উত্তর এড়িয়ে গিয়ে  
বলল: “ও—তাই বুঝি ভারত আর ভারতবাসীকে পেয়ার করেন  
এত?”

—“পেয়ার?” শ্রীমতী, বোধহয়, কথাটা ঠিক ঠাউরে উঠতে  
পারলেন না।

—“মানে, আমাদের দেশে প্রবাদ আছে একটা—যার নাকি মুন  
খায়—”

—“তুমি বুঝতে পারছ না কিছই। ভারতবর্ষে যাই-ই-নি কোনোদিন,  
মুন খাব কি? টাকা দিত ওরা সেধে—ডিউটি যে।”

এবার ও হাসিটা চেপে গেল, প্রশ্নটাও—যদিও জ্বিতের ডগায়  
এসেছিল—“দিত টাকা কোন্ খাজানি—আর কার রাজকোষ  
থেকে?” কিন্তু ঠেঁশ দিয়ে হবে কী—যখন অভিজাত-ঘরপীর  
এত ধূর্ত মাথাটাও স্কন্ধ খোঁটা বুঝবার মত তত স্কন্ধ নয়। শুধু  
বললে—“এতই টাকা যদি আপনাদের, মিছে কষ্ট করে পেয়িং গেট  
রাখেন কেন?”

—“কী যে সব প্রশ্ন করো—না আছে মাথা, না মুণ্ড—যেন  
টাকার জন্মেই অতিথি রাখি আমরা। খাঁ খাঁ করে এতবড় বাড়ি,  
ছেলেরা সব বছরের বেশির ভাগ বাইরে বাইরে কাটায়। লোকজন  
থাকলে আমাদের কালচারের ছিটেফোটাও তো পায় তবু—”

—“খুব সাধু হচ্ছে বৈ কি মিসেস বাকুলি। কেবল তাহলে ভাড়া

দৃষ্টিতে কোনো কড়াকড়ি নেই বলুন? লাভের দিকে চোখ তো ওই ন্যাওলেডিদের। আপনাদের ঠিক খরচটুকু দিলেই চ'লে যায়, এই না?”

—“তার বেশি আমরা নেবই বা কেন? নেহাৎ নিজের পকেট থেকে তো আর খাওয়াতে পারি না—সবাই নিজেরটা দেখে।”

—“তাহ'লে ওপরতলা আর নিচের তলায় আড়াই গিনি তফাৎ হ'ল কেন, মিসেস বাক্লি? আড়াই গিনি দর দস্তুরে এসে—এখন পাঁচগিনি চাইছেন সেই একই ক্রমের জন্তে!”

—“তুমি যে এ-হেন অভিজাত পরিবারে স্থান পেয়েছ, তাদের ছেলে-মেয়েদের সঙ্গে সমানে মিশবার, একটেবিলে ব'সে খাবার, আলাপ করবার এমন কি সমান সমান হাসি মস্করা করবার পর্য্যন্ত সুযোগ পেয়েছ, তার কি একটা মূল্য নেই মনে করেছে?”

—“ওঃ—তাহ'লে বাড়তি দাবিটা অভিজাত্যের ট্যাক্স, এই-ই কি?”  
মিসেস বাক্লির মুখ ঈষৎ লাল হ'য়ে উঠল—“একশোবার। যাও না দেখি স্নামে,—সবই খুব সস্তা পাবে—।”

—“এমন কি, সুইটহার্টও”—জনি চোখ টিপে বললে। এতক্ষণ সে কি একটা পিকটোরিয়ালের পাতা উলটোচ্ছিল।

মিসেস বাক্লি একথায় একটু হেসেই গম্ভীর হ'য়ে ব'লে চললেন—  
“তা ছাড়া পাবে কোথায় এমন ড্রইংক্রম, এমন কাঠের আঙুন, ডিনার-টেবুলে কচি মুর্গি আর গরুর বাচ্চা, যখন ঘণ্টা বাজাবে—চাকরাণী—বিশুদ্ধ ইংরিজি উচ্চারণ, রিফাইনমেন্ট—অক্সফোর্ডের ষ্টুডেন্ট ছেলে—রয়েল ম্যারিনের লেফটেন্যান্ট—”

—“থাক” জ্যোৎস্নার মুখ লাল টকটক করছে। ঐ চাষা মাতাল

জনিটার অভদ্র ব্যঞ্জে ওর মাথায় রক্ত চ'ড়ে গেছে এক ঝলকে। মিসেস' বাকলি বাধা পেয়ে চমকে গেলেন।

—“বর খুঁজতে আসিনি এদেশে, ভারি দুঃখিত। তা নইলে পাঁচ পিঁড়ি—কেন, দশগিনিও দেওয়া যেত। কিন্তু ঢের হয়েছে—আর না। আমি, চুল্লুম আমার ঘরে, দয়া ক'রে মাদলীনকে দিয়ে আজকের খাবারটা ওপরেই পাঠাবেন।”

—“কি!—টেবিলে থাকে না?”

—“মিসেস বাকলি, আমার দেহে রাজ-রক্তের অভাব, নেহাত প্রিভিয়ান মেয়ে—আপনাদের মুগি-পবিত্র রয়্যাল টেব্ল আর কলুষিত করব না—”

মিসেস বাকলি পাড়িয়ে উঠে বললেন—“তুমি তাহ'লে আমার বাড়িতে থাকতে চাও না?—এই মৎলব, কেমন?”

—“অ-বি-ক-ল।”

মিসেস বাকলির মুখচোখ ঝলকে উঠল খানিক আগের তাঁর কথার এই প্রতিধ্বনিতে। বললেন—“আমি কিন্তু সহজে ছাড়ব না তাহ'লে। তোমার অভিভাবকের কাছে সমস্ত রিপোর্ট ক'রে মজাটা টের পাওয়াব—”

—“অভিভাবকের উপরও অভিভাবক আছে। আচ্ছা, গুডনাইট—সবাই!”

—“অবাধ্য উদ্ধৃত মেয়ে! তুমি ইচ্ছে করলেই যেতে পারো না হ্যালিডের অল্পমতি ছাড়া—তা জানো?” ততক্ষণ ও দোরের হাতল ঘুরিয়ে—

জনি ঝট্ ক'রে এসে হাতল চেপে ধ'রে বললে—“এত চটো কেন মাই স্প্যারো? ফি শনিবারে আমি আসি, বাইকের পাশে টুকটুকে ক্রেডল-সিটটা দেখেছ? মাইলকে-মাইল স্প্যারোকেও হারিয়ে হাওয়ার বেগে উড়ে যাব আমরা। একটু টায়াল দিয়েই দেখ না গো—”

ও পাশ কাটিয়ে দরজা খুলে দ্রুত উপরে ছুটল।

তারপর, কোনো মতে উপরে গিয়ে—ভাঙল বাঁধ—নামূল বান—  
কান্না আর কান্না !...এতকরার কি সয় ওর স্বভাবে ?

বাইরে মিসেস বাক্লির গলা শোনা গেল—“আমর সিনেমার  
বাচ্ছি, আসবে তুমি আমাদের সঙ্গে ?”

—“না।”

—“কেন ? এসো না, বেশ ভালো ছবি আছে।”

—“ধন্যবাদ, আমি এখন বেরব না।”

—“আচ্ছা, থাকো তাহলে, আমি জনিকে নিয়েই চললাম।”

সিঁড়িতে মিসেস বাক্লির পায়ের শব্দ মিলিয়ে গেল।

\* \*  
\*

চোখের জল চোখেই শুকিয়ে গেছে...কখন যে ও ঘুমিয়ে পড়েছে !  
...কি একটা শব্দে হঠাৎ চোখ খুলে দেখে ঘরের ভিতর ওর বিছানার  
একেবারে কাছে—কে যেন দাঁড়িয়ে। ধড়মড় ক’রে উঠে ত্রস্তকণ্ঠে বললে  
—“কে ? কে ওখানে ?”

—“আমি—আমি ভয় নেই গো !”

—“মিষ্টার বাক্লি ?”

—“হ্যাঁ গো হ্যাঁ, অমন করো কেন ?” খাটটার কিনারায় ধপ্ ক’রে  
ব’সে প’ড়ে সাস্থনার পুরে—“বাস্তবিক আমি ভারি দুঃখিত জয়, যে  
মিসেস বাক্লি তোমায় যখন-তখন যা-তা ব’লে এত কষ্ট দেয় মনে। কিন্তু  
কিছু বলতে তো পারিনা ওদের সামনে !”

—“এই কথা বলবার জন্য এত ব্রান্তিরে আমার শোবার ঘরে—”

বুড়ো ওর হাতখানা প্রায় ধরে ফেলে আর কি—“শুধু সজ্ঞাতো নয়, প্রথম থেকে তোমাকে আমার সত্যি কী যে ভালো—”

বিস্ময়ে ভয়ে ওর প্রায় শ্বাস রুদ্ধ হয়ে আসে। অতর্কিতে মুখ দিয়ে বেরিয়ে গেল—“মাগো!” ধড়মড় করে উঠে বসে।

বাকলি হঠাৎ ওর হাতখানা বজ্রমুষ্টিতে চেপে ধরল, বললে—“যাবে ডিয়ার, আমার সঙ্গে একটু বেড়াতে? এই অঞ্চলেই ভালো ‘শো’ আছে, কফি হাউসে—”

বুদ্ধের দেহে সাতটা জোয়ানের বল এখনো। মুখেও ব্যাণ্ডির তীব্র গন্ধ...একলা, অসহায়!—জ্যোৎস্নার সমস্ত দেহ-মন পক্ষাবাত-গ্রস্তের মত স্তম্ভিত, প্রায় নিঃস্বিৎ!...

হঠাৎ ঘরের দরজা গেল খুলে। মাদলীন এক সেকেণ্ড নিঃশব্দে ব্যাপারটা চেয়ে দেখে চোঁচিয়ে উঠল—“যা ভেবেছি তা-ই!”—ছুটে এসে হতবুদ্ধি জ্যোৎস্নার অন্য হাতখানা ধরে টেনে তুলে বললে—“ভয় কি মাদমোয়াসেল? কিছু ভয় নেই, একটু শক্ত হোন দেখি এখন। কী করবে ও? এ স্বাধীন দেশ,—আশেপাশে মানুষও আছে।”

এতক্ষণে বাকলির মুখে কথা ফুটল—“কে এমন করে আসতে অধিকার দিয়েছে তোমায় এখানে? মিস চার্টারজির শরীর ভালো নেই, তাই আমি—”

—“শ্-শ্ বেশি গোলমাল করলে চোঁচিয়ে সাতটা পাড়ার লোক জড়ো করব।” জ্যোৎস্নার দিকে ফিরে—“ওঁকে এখানে অমম পা-টিপে-টিপে চুকতে দেখেই সন্দেহ হয়েছিল আমার।”

—“খবরদার মাদলীন!”

‘মাদলীনের চোখে আশ্রন জ’লে উঠল—বৃদ্ধ দু’পা হ’টে গেলেন।  
ও জ্যোৎস্নাকে টেনে বাইরে নিয়ে এলো। দুহাতে ওর একখানা হাত  
চেপে ধরে স্থলিত কণ্ঠে সে বললে—“এখনই একখানা ট্যাক্সি—”

—“ডেকে দিচ্ছি মাদমোয়াসেল, জিনিব পত্তরও গুছিয়ে রাখুন।  
কালই লোক এসে নিয়ে যায় যেন—কোনো ভয় নেই।”

পাঁচমিনিটের মধ্যে ট্যাক্সি এলো। উঠে ব’সে জ্যোৎস্না মুখ বাড়িয়ে  
ছলছল চোখে বললে—“বোনের বাড়ি হ’লে তুমি আমার মাদলীন, এই  
বিদেশে। তুমি না থাকলে আজ—, কিন্তু এর পর তোমারই কি আর এ  
বাড়িতে থাকা চলবে?”

হাসিমুখে মনের চিন্তা ঢেকে মাদলীন উত্তর করলে—“কালই বিদায়  
ক’রে দেবে, কিন্তু তাতে কি—যে কোনো রকমে—”

—“বেশি কথার সময় নেই এখন। কিন্তু কাল নিশ্চয় এঁসো একবার,  
—এই নাও বাড়ির নম্বর, সাউথ কেনসিংটন। আমার অভিভাবকের  
বাড়ি, তাঁরা সত্যি ভদ্রলোক। তোমার যতদিন না ভালো কাজ জোটে  
একটা—”

—“ধন্যবাদ, মাদমোয়াসেল। মেরীর দিবি, আসবই আমি।”

—“জানো তো আমার টাকা আছে যথেষ্ট। বেকার অবস্থায় কোনো  
কষ্ট হ’তে দেব না তোমার—আর—আমাকে পর মনে কোরো না মাদলীন,  
কেমন?”

মাদলীনের চোখে জল উপ্ছে পড়ল—“না, করব না মাদমোয়াসেল—  
দেখা করব কালই। গুডবাই মাদমোয়াসেল!”

—“গুডনাইট মাদলীন! মনে থাকে যেন।”



হ্যালিডে গৃহিণী মিটার দেখে চমকে উঠলেন, “কী সর্বনাশ, তুমি তো ফিউরক্ষরন দেখছি তোমার বাপকে—এমনি ভাবে ট্যান্সিতে ঘোড়দোড় খেললে।”

জ্যোৎস্না বললে—“এর দশগুণ মিটারে উঠলেও দিতে হ’ত আজ—”

—“ওমা—সে কি গো ? কী ব্যাপার ?”

সব কাহিনী শোনা হ’ল শেষ।—অতঃপর কৰ্ত্তা তাকালেন গৃহিণীর পানে, গৃহিণী তাকালেন কৰ্ত্তার পানে।

কতক্ষণ পরে—“হ্যারি !”

—“উ !”

—“রাজার নীল-রক্ত—নীল ব’লে নীল !—ঘোরতর নীল—মস্ত ঘরের অভিজাত্য ! কথা নেই যে মুখে ? কি ?” মুখে তাঁর বিজয় হাস্ত !—জ্যোৎস্নার মনে পড়ে যায়—প্রথম দিন গুঁদের এখানে লাঞ্ছন্যে বিদায় নেবার একটুখানি আগে হঠাৎ মিসেস হ্যালিডের হয়েছিল সন্দেহ—ছেলেমানুষ মেয়েটিকে না দেখে শুনে কোথায় কার বাড়ি পাঠানো হচ্ছে কে জানে ! তা-ই নিয়ে কথা কাটাকাটি—শ্লেষ—অবশেষে সেই কী বলে যেন ? সেই—দাম্পত্য “বহবারস্তে ?—”

হ্যালিডে অধোমুখে নতুনকেনা চশমাখানি মুছতে ব্যস্ত হ’য়ে উঠলেন। জ্বর সব বান্ধ-বিজ্ঞপে কান দিতে গেলে পুরুষের যদি চলত ! কেবল, আজ কিসে যেন বড্ড নাড়া দিয়ে গেছে তাঁর অভিজাত্যের আজন্ম-লালিত ধারণায়,—উপলক্ষ—একটি তরুণী বিদেশিনী !

## রাশিয়ান ক্যাট

আমার সাত-বছরের ভাই-পো টুহুর বেড়াল পুষবার মত হয়েছে। আমি বাড়িতে বেড়াল আনতে দিই না, তাই ও পাশের বাড়ির মাসিমার আঁচল ধরে টেনে আমার কাছে নিয়ে এসেছে ওকালতি করতে ওর হ'য়ে। আমি পড়ছিলাম, মুখ তুলে বললাম—“কি টুহুর, কি চাই?”

—“মিনি, কাকাবাবু।”

চমকে বললাম—“মিনি?”

মাসিমা ব্যাপারটা বুঝিয়ে বললেন। তাঁদেরই হ্যাম্পস্টেডের বাড়ির একটা বেড়ালছানা—আম্বার ধরেছে ওর চাই-ই। এরই মধ্যে নামটামও দেওয়া হ'য়ে গেছে। অন্তমনস্কভাবে বললাম—“আচ্ছা, দেখি।”

\* \*  
\*

হাতের বইখানা মুড়ে রেখে কত কথাই ভাবতে লাগলাম। মনে হ'ল—যখন ‘—’ ইউনিভার্সিটির জমকালো ডাক্তারি ডিগ্রি নেবার জন্তে প্রথম বিলেত যাই, সঙ্গে ছিল অপর্ণা। ও তখন বেড়াল মোটে দেখতে পারত না। ছোট থেকে নাকি এই প্রাণীটার ওপর ওর দারুণ বিতৃষ্ণ। তার কারণ আমাকে যা বলেছিল তা সংক্ষেপে এই :

ছেলেবেলায় ও ছিল বড় কাঁচুনে, একবার কাঁদতে আরম্ভ করলে থামায় কার সাধ্য? কোনো থাবারের লোভে তুলবে না, ধমকানিতে দমবে না। ভাবি একরোখা জেদী মেয়ে। একদিন-তেমনি কৈদে চলেছে

—ওর এই একঘেয়ে এ—এ—স্বরের কান্না মা, খুড়ি, জ্যেষ্ঠাই সকলের কানে স'য়ে গেছে। যতক্ষণ ইচ্ছে প্রাণভ'রে কান্দবার সুযোগ দিয়ে ওকে মাটিতে ফেঁকে রেখে যে যার কাজ ক'রে যায়। কে একটা মেয়েকে নিয়ে দিনরাত ম'ল্লের মত কুস্তি লড়বে? মস্ত একারবর্তী সংসার, ছেলে-মেয়ে আরো আছে—হাদেরও তো দেখতে হয়। কেবল, বড় বেশি অসহ্য হ'লে এক একদিন মা কাজ থেকে উঠে এসে পিঠে ক'ষে একটা চড় বসিয়ে দিয়ে যান; কিন্তু ঠাকুরমার জন্তে—হু-এক ঘা দিয়ে যে বিমল সুখ, তা-ও পাবার জো নেই। মেয়ের দ্বিগুণ জোরে চৌচামেচি শুনলেই বকতে শুরু করেন—“মেয়ে কি বানের জলে ভেসে এসেছে লা? বড় যে মনের মতন হাতের জোর পরখ করছিস পিঠের ওপর? ঘর-সংসার আমরাও করেছি, ছেলেপুলেও বে মানুষ করিনি তা নয়। তাই ব'লে যেখানকার যত ঝাল কই—কচি পিঠের উপর তো ঝাড়িনি!”—মা রাগে মুখ কালো ক'রে গৌজ হ'য়ে থাকেন, কিন্তু শাসন করবারও আর কোনো উপায় খুঁজে পান না। যাহোক, কি বলছিলাম—হ্যাঁ, একদিন ওম্নি কান্নার সময় রান্নাঘরের পেছনে আঁস্তাকুঁড়ের পাশে ছোটো বেড়াল সংলাপ করতে করতে ভয়ানক জোরে ‘ফ্যাশ’ ক'রে ওঠে। যেই সে ডাক শোনা, অম্নি ঠাকুরমার আদরিণী দোদুপ্রতাপ খুকীর অত যে কান্না—সব মুহূর্তে ঠাণ্ডা। মায়ের আঁচলখানি চেপে ধ'রে কতক্ষণ যে ভয়ে কঁপেছিল, এখন সে-কথা বলতে গেলে অপর্ণা হেসে গড়িয়ে পড়ে।—তখন থেকে কিন্তু হলো ডেকে ওর কান্না থামানো বাড়ির সকলের অভ্যাস হ'য়ে গেল। বেচারি একটু জেদের সুর ধরতে না ধরতে চারদিক থেকে সবাই—“ডাকব তবে হলোকে?—অনিলা, ডাক ত ওটাকে—ম্যাও ম্যা—ওঁ—ওঁ—” অপর্ণা তখন চুপ।

ছ-সাত বছরের মেয়ে হ'য়েও ও খাটি হলোর ডাক আর নকল হলোর

ডাখে তফাৎ বুঝতে পারত না। মাষ্টারের কাছে পড়া সারা করে বাইরের ঘর থেকে অন্তরে আসবার পথে সন্ধ্যায় ছোট ভাইটিও “হ্যাঁ—ম্যাও” করলে অপর্ণা রুদ্ধশ্বাসে ছুটে রান্নাঘরে কর্মনিরতা মায়ের ঘাড়ের উপর হুমড়ি খেয়ে পড়ে যা বকুনি খেত—! বড় হ’লে সমবয়সী মেয়েদের কাছে এর জন্তে কত হাসাহাসি টিটকিরি, কিন্তু বেড়ালের ভয় ওর আর ঘোচেই না। জলজলে চোখ দুটোকে অন্ধকারে ওর নাকি ভূতের চোখ মনে হয়; আমাকে বারবার বলে—“তুমি জানো না—বেড়ালের সঙ্গে সঙ্গে নিশ্চয় ভূত-পেঙ্গি থাকে—নইলে আমরা কেউ দেখতে পাই না, আর ওরা অমন পষ্ট দেখে ঘুরঘুটে আঁধারে?”

শুনে আমার হাসি পায়, কিন্তু এসব বেশি আমল দিলে তো চলে না, অথচ সে—ই কবেকার ছেলেবেলার ভয় আর সংস্কার ওর মনে এমন বন্ধমূল হয়ে গেছে যে, সব জেনে-শুনেও বেড়ালকে ভূতের সামিল ভেবে এড়িয়ে চলে! মুখে ধমক দিয়ে বললাম—“কী ছেলেমানুষি করছ—লোকে শুনলে বলবে কি? বেড়াল কেন দেখতে পায় আর তুমি পাও না, সে কি জানো না?”

—“আহা, তা কি আর জানি না? কিন্তু ভাবো দেখি, রাত্তিরে উঠেছ, কালো কালির মতন অন্ধকারে তুমি কাউকে দেখছ না অথচ আলোর দেয়ালি জলছে ওর চোখে, ও দেখছে তোমার স—বটা—খুব ভালো করেই দেখছে—আমার ভাবতেও কেমন লাগে, কি আনুন্ধ্যানি!”

—“যাও, যাও—আনুন্ধ্যানি না ছা—ই। যত সব অনাস্থি কথা! আমি কিন্তু বেড়াল একটা আনবই তা ব’লে রাখলুম—ইহরের উৎপাতে রাত্তিরে কেবলই ঘুম ভেঙে যায়, কাবার্ডে একটা খাবার জিনিষ রাখা দায়—”

—“সেটা সারিয়ে নিলেই পারো? তাহ’লে তো আর ঢুকবে না—”

—“ঢুকবে না, কিন্তু ইঁহর তো থেকে যাবে? তাকে নির্বংশ করে কে?”

—“কেন, ফাঁদ বসালেই পারো—”

—“হ্যাঁ, সায়াদিন খেটে খুটে এসে রোজ আমি ফাঁদ পাততে বসি,—তোমার যেমন কথা! ওসব চলবে না—বেড়াল একটা রাখতেই হবে ঘরে! জেসি বলছিল পাশের মুদির দোকানে তিন-চারটে বাচ্চা হয়েছে—চাইলেই আমাদের একটা দেবে। আমি কালই মিষ্টার উইলিয়াম-সনকে ব’লে রাখব—”

অপর্ণা কাঁদো কাঁদো হ’য়ে বলে—“ইঁহর-টিঁহর সব তোমার অছিল—আসল কথা—তুমি আমাকে ভয় দেখিয়ে চাও মারতে। এখানে নোংরা ক’রে রাখবে, ওখানটায় গন্ধ করবে, রাত্তিরে একা পথ চলতে পারব না ঘরের মধ্যেও বেড়াল একটা সঙ্গে সঙ্গে পায় পায় ঘুরবে—যখন-তখন গলায়—পাশ-ম-পাশ-ম্।”

আমি ওর হাত-তুথানি ধ’রে আদর ক’রে বললাম—“আচ্ছা অহু, এই মিথ্যে ভয় ভাঙাবার জন্তেও তো একটা বেড়াল পুবে দেখা উচিত তোমার—”

—“বরং একটা কুকুর আনো তুমি—”

—“বাস্, দরকার বেড়ালের—আনতে হবে কুকুর!”

—“বেড়াল যা নেমকহারাম—”

—“নেমকহারাম কিসে?”

অপর্ণা রাগ ক’রে বললে—“নয়? বলো কি তুমি? বাড়িতে তো বেড়াল কম ছিল না!—এই একরাশ এঁটোকাটা সামনে ধ’রে দিয়ে, সব

পাট তুলে মা একটু শুতে গেছে, কিন্তু ছুচোখের পাতা এক, করবার জো কি ? কোনোদিন দুধের ডেক্‌চি, কোনোদিন-বা মাছের কড়ার ঢাকনি উন্টিয়ে মুখ ডুবিয়ে—যার খায় তারই লোকসান। আবার একটু পরে—  
দিব্যা এসে কোল ঘেঁষে কাপড়ে মুখ গুঁজে শোয়—যেন কিছুই হয়নি।  
নেমকহারাম না তো কি ?—কিন্তু দেখেছ কখনো কুকুরকে ও-রকম করতে ? যাকে ভালোবাসে, সে মারা গেলে দুঃখে প্রাণটাই দিয়ে দেয়—”

আমি হাসতে লাগলাম।—“তোমার ভালোবাসার আদর্শটা বড় উচু, অল্প—সাধারণ লোকে নাগাল পাবে না। যে বেচারি তোমায়—”

—“হয়েছে, থামো। আবার ওই নিয়ে শুরু করোঁ না এখন। কিন্তু বেড়াল তুমি কিছুতেই আনতে পারবে না, তা ব’লে রাখছি। তোমার কি, তুমি তো সারাদিনই বাইরে বাইরে ঘুরবে। একলা বাড়িতে একটা অদ্ভুত জাঁনোয়ারের হাঙ্গাম পোয়াতে হবে তো আমাকেই।”

অগত্যা বেড়াল আনবার প্রস্তাবের এখানেই ইতি করতে হয়। ওই বিদেশে কুকুর-বেড়াল পুষে ঘর-সংসার ফেঁদে বসাই যে আমার মতলব ছিল, তা নয়। বাস্তবিক, ফ্ল্যাটে ইঁহরের উৎপাতের জন্তেই আমাকে বাধ্য হ’য়ে ও-কথা তুলতে হয়। তারপর অপর্ণার এই অনর্থক বেড়াল-বিদ্রোহ দেখে আমার কেমন একটা জেদ এসে গিয়েছিল যে, এটা ভাঙতেই হবে। কিন্তু চোখে জল দেখে, ওর দুর্বলতা ঘোচাবার মন্ত উৎসাহ আমি নিজের মধ্যে আর খুঁজে পেলাম না। আমাকে সকাল সাতটার আগে প্রাতরাশ সেরে একটা পর্য্যন্ত হাঁসপাতালে, লাইব্রেরীতে, ক্লাসে—যখন যেখানে ডাক পড়ে, যেতে হয়। সারাদিন মড়া ঘেঁটে রোগী দেখে বেড়াই। একটায় বাড়ি ফিরে লাঞ্চটি কোনোমতে গলাধঃকরণ ক’রে আবার ছুটতে হয়। আসতে যেতে মাঠটা পার হ’তেই আমার অবসর-

ঘণ্টার অর্ধেকটা যায় কেটে। বিকেলেও পাঁচটার আগে কদিনই বা বাড়ি ফিরতে পারি? সারাদিনটা অপর্ণাকে একলা থাকতে হয়, সেকথা ঠিক। বেড়াল যদি ভালো লাগত, সেটা সঙ্গে থাকলে খুসি হবার কথা ওরই, কিন্তু ভালো যখন বাসেই না, নিঃসঙ্গ বাড়িতে সেটা ওকে অতিষ্ঠ ক’রে তুলবে মাত্র। সাত-পাঁচ ভেবে মনে মনে বললাম—যাক্গে, একটা ফাঁদই না-হয় কিনে আনব।

দিন-দুই পরে দুপুরে খাবার সময় অপর্ণা একটু ইতস্তত ক’রে বললে—  
“জেন্সি বলছে, দেখাশুনা যা করবার ও-ই করতে পারবে। আর, প্রথম থেকেই অভ্যেস করালে নাকি তেমন বিরক্তও করে না—রান্নাঘরেই আগুনের ধারে থাকবে চুপচাপ শুয়ে—”

অল্পমনস্কভাবে বললাম—“কে থাকবে শুয়ে?”

অপর্ণা মিছামিছি রেগে উঠে বললে—“বা রে, এরই মধ্যে ভুলে গেলে নাকি?”

—“তা, তুমি আর একটু বিশদ ক’রে না বললে স্মরণ তো হচ্ছে না—সুশীল নাকি?”

অপর্ণা শাসিয়ে বললে—“আমার দাদার তো ভারি দায় পড়েছে তোমার রান্নাঘরে এসে শুয়ে থাকতে। সাধে কি তোমার সঙ্গে কথা বলতে চাই না খাবার সময়? এদিকে খাচ্ছ আর মনে মনে হাঁসপাতালের কথা ভাবছ।—যখন-তখন যাকে তাকে নিয়ে—”

—“আচ্ছা, আচ্ছা—আর বলব না। বাপ, যেন আগুনের ফুল্কি, খপ ক’রে এত গরম হ’য়ে উঠতেও পারো তুমি!”

—“গরম হহ সাধে ? আমি এলুম কাজের কথা বলতে—যাক এখন তোমার মত আছে কি না বলো ।”

—“জান না তো ডাক্তারি পড়ার হাঙ্গাম কত ! একটু-আধটু ঠাট্টা-তামাশা করতে না পেলে একেবারে যে ‘শুষ্ক কাষ্ঠঃ’ ব’নে বাই।”

—“কেন পড়তে এলে ডাক্তারি ? কেউ তে মাথার দিবি দেয়নি—”

—“কী ক’রে জানলে দেয়নি ? কিন্তু—কার কথা বলছিলে তুমি ?”

—“বেড়াল গো বেড়াল ! তোমার সাধের ম্যাক্সট । পুষতে চাও তে নিয়ে এস গে এবার—”

আমি আশ্চর্য্য হ’য়ে বললাম—“তাই বলতে হয় এতক্ষণ ! কিন্তু সে তো চুকে-বুকে গেছে—”

অপর্ণা কথাটা কানে তুলল না ।—“জেসি বলছে উইলিয়ামসন আর রাখতে চায় না—হয়ত কাউকে দিয়ে দেবে—”

—“আচ্ছা, আজ কলেজ থেকে ফেরবার পথে ব’লে আসব এখন ! কিন্তু দেখো, তোমার অমতে আমি জোর ক’রে কিছু করতে চাই না—”

অপর্ণা একটা বিতৃষ্ণা ঝেড়ে ফেলে দিয়ে বললে—“নাঃ, এনো । ওটা নিশ্চয় আমার ধার দিয়েও যাবে না, দেখো তুমি । জেসি বলে যে, ওরা নাকি ডিস্লাইক বুঝতে পারে ।”

মুদি উইলিয়ামসনের ছোট মেয়ে লরা বেড়াল-বাচ্চাটিকে নিয়ে এলো । আমরা দুজনেই তখন বাড়িতে । লরা বেড়ালটাকে অনেকক্ষণ আদর ক’রে চুমো খেয়ে, বারবার গায়ে-মাথায় হাত বুলিয়ে শেষটা যেন নিতান্ত



অনিচ্ছায় চ'লে গেল। বেচারি বোধ হয় নেহাৎ বাপের ভয়েই বাচ্চাটিকে দিয়ে দিতে বাধ্য হয়েছে। ও যেতেই অপর্ণা নাক-মুখ সিঁটকে ব'লে উঠল—“মাগো, ইংরেজ মেয়েরা যেন কী! ওই নোংরা কালো বেড়ালটার মুখে মুখ দিয়ে চুমো দেয়! দেখতে মোটাসোটা সুন্দর হ'লেও না-হয় বুঝতাম—এই, যা, পালা: এখান থেকে—ওগো, তোমার বেড়াল সামলাও তুমি, নইলে ছুড়ে ফেলে দেব।”

আমার একটু রাগ হ'ল। এ কী রকম নিষ্ঠুরতা! গম্ভীরভাবে জেসিকে ডেকে বললুম—“ওকে নিয়ে যাও এখান থেকে। আর দেখো, রোজ তুমি বাড়ি যাবার আগে ওটাকে রান্নাঘরে বন্ধ ক'রে যেয়ো, এঘরে বা শোবার ঘরে যেন ঢুকতে না পায়।”

জেসি ধরতে যেতেই বেড়ালটা ছুটে সোফার নিচে গিয়ে লুকোল। জেসি এদিকে যায় তো ওটা যায় ওদিকে। শেষটা হায়রান হ'য়ে মুখ লাল ক'রে রুগ্ন স্বরে বললে—“এতটুক দেখতে বটে, কিন্তু এরই মধ্যে সয়তানি শিখেছ খুব। এটা ভোগাবে, ম্যাডাম—”

অপর্ণা এতক্ষণ চূপ ক'রে ব্যাপার দেখছিল। আমার দিকে একবার আড়চোখে তাকিয়ে উঠে এসে বললে—“সোফাটা সরাও দেখি জেসি, ধরো তুমি ওদিকটা, আমি এদিকে আছি।—শুনছ, এবার তুমি গিয়ে ওটাকে নাও।” সোফা সরাতেই বেড়াল ছুটে কাবার্ডের পেছনে গিয়ে ঢোকে। সেখান থেকে ওকে বা'র করে সাধ্য কার? লাঠি, ছাতা, ‘পোকার’—হাতের কাছে যেখানে যা পাই তাই দিয়ে খোঁচাখুঁচি ক'রে দেখা গেল, কিন্তু ভয় দেখিয়ে কিছুতেই ওটাকে বের করা গেল না। জেসি ঘণ্টাকয়েকের জন্তে কাজ করতে আসে, যথাসময়ে চ'লে গেল।

পরদিন সকালে বসবার ঘরে ঢুকেই তাড়াতাড়ি বেরিয়ে এলাম। দাঁড়ানো যায় না—এমন!—বাড়িতে আমিই সকলের আগে উঠি—জেসির আসতে এখনো ঘণ্টাখানেক। এই এতক্ষণ ওই—না, অপর্ণা উঠলে—আর রক্ষা থাকবে না। তাছাড়া আমিই বা আজ ওখানে এককোণ্ট খাই কী করে?—না রান্নাবরে গিয়েই বসি; কিন্তু হঠাৎ মনে পড়ল ওটা তো কাল থেকে কিছুই খায়নি—দুধের লোভেও বেরিয়ে আসেনি, এত ওর ভয়। একবার গিয়ে দেখতে হচ্ছে—নইলে অতটুকু বাচ্চা—ক্ষিধেয় আর শীতে ম’রে যেতে কতক্ষণ?—শেষে সক করে প্রাণিহত্যা করব?—ফিরন্ত দেখি অপর্ণা বাথরুমের দিকে চলেছে। আমাকে দেখে জিজ্ঞেস করলে—“কি, জেসি তোমার খাবার ঠিক করে রেখে যায়নি ও-ঘরে?” ব’লে উত্তরের জন্তে অপেক্ষা না করেই ব্যস্ত হয়ে দেখতে গেল, কিন্তু দোরের চৌকাট থেকেই ছিটকে বেরিয়ে এসে তীক্ষ্ণকণ্ঠে বললে—“এক করে বারণ করলুম—কিন্তু গরিবের কথা কলে বাসি হ’লে—নাও, সামলাও এবার ঠেলা—আমি বাপু চললাম সোজা স্নানের ঘরে।”

অপরোধী আমিই কাজেই বাধ্য হ’য়ে ঠেলা সামলাতে চললাম। এদিক-ওদিক তাকিয়ে বৃক্শ, ছেঁড়া শ্রাকড়া যা পাই নিয়ে নাকে কাপড় দিয়ে চললাম। অপর্ণা পেছন পেছন এসে বললে—“ও কি, তুমি কি সত্যিই নিজের হাতে ও-সব পরিষ্কার করতে চললে নাকি?”

—“তা না তো কি?”

—“কেন, জেসি রয়েছে কী করতে?”

—“তোমার যেমন কথা! আজ ওক দিয়ে এসব করালে কালই ভাগবেনা ও? মেড বদলে বদলে এমনিতেই তো হায়রানি—”

ওই আবহাওয়ার মধ্যে বেশিক্ষণ আর বাদামুবাদ না করে লেগে

গেলাম । অপর্ণা খানিক চুপ ক'রে থেকে আমার সামনে এসে হাত ধ'রে বললে—“দাও আমায় ।”

অবাক হ'য়ে বললাম—“সে কি ?”

—“কিছু না—ক্লাসের দেরি হ'য়ে যাবে, যাও তুমি—”

—“কিন্তু অমু—”

অপর্ণা অসহিষ্ণু হ'য়ে বললে—“বলছি যাও, কেন মিছে বকাচ্ছ আমাকে এই গন্ধের মধ্যে ?”

অগত্যা আমি রান্নাঘরে গ্যাস-রিং জালিয়ে চায়ের জল গরম করতে গেলাম । মনে মনে এত মায়া হয়—!—অপর্ণা চিরকালই ঐরকম—সেই ছেলেবেলা থেকে জানি তো ওকে ! মুখে ঝগড়াঝাঁটি, চোখা চোখা কথা—যেন কত রাগ করেছে, কিন্তু ভেতরটা একেবারে ফুলের ম'ত কোমল । আমার ক্লাসের দেরি হ'য়ে যাওয়া ওর ছিল, ও-কাজ আমাকে করতে দেবে না—এই হ'ল আসল কথা । কিন্তু সে মনোভাবটা চাপা দিতে না পারলে ওর ভারি লজ্জা ।—উছনে মস্ত দুই কেতলী জল চাপিয়ে সাতপাঁচ নানান কথা ভাবছি এমন সময় ও-ঘর হ'তে ডাক এলো—  
“সুনে যাও—”

—“ব্যাপার কি ?”

—“বেশি নোংরা করেছে এই কাবার্ডের পেছনে—ওটা না সরালে কোনো উপায় দেখছি না সাফ করবার—”

—“তাই তো তাহ'লে জেসি আসা পর্য্যন্ত অপেক্ষা করতেই হয়—”

—“কিন্তু বেড়ালটা গেল কোথায় ? পালিয়ে-টালিয়ে যায়নি তো ?”

—“পালাবে কোথায় ? আছে ওইখানে কোথাও—”

—“কিন্তু দেখতে হবে না ? সারাদিন কোণে কোণে লুকিয়ে থাক্—

তারপর রোজ রাত্তিরে যতসব সম্ভব-অসম্ভব জায়গায় এই কাণ্ড ক'রে বেড়াব আর কি। লোকজন এলে বসাবে কোথায়? দুদিন পরে তোমার বাড়ির ছায়াও মাড়াবে নাকি কোনো ভদ্রলোক?”

—“তুমিও যেমন পাগল! ক্ষিদের জালায় ওটা আপনাই বেরিয়ে আসবে—”

—“মনে তো হয় না। আচ্ছা, দেখাই না বের করতে পারো কি না—”

এদিক-ওদিক খুঁড়ে দেখা গেল, বেড়ালটা পিয়ানোর নিচে পাদানির কাছ ঘেঁষে জড়োসড়ো হ'য়ে ব'সে। হাত বাড়াতেই শুড়ুৎ ক'রে সোফান, নিচে ঢুকে পড়ল। আর তাড়া না ক'রে বললাম—“থাক গে এখন, যত ছোটোছুটি করবে, ওটা ততই ঢুকবে কোণে গিয়ে।”

দুপুরে খেতে এসে দেখি বাচ্চাটাকে তখনও বা'র করতে পারা যায়নি। চিন্তিত হ'য়ে বললাম—“তাই তো, না খেয়েই মারা যাবে নাকি?”

অপর্ণা হেসে বললে—“বিলিতি বেড়ালও ‘কালো আদমী’ চেনে না কি গো?”

—“অসম্ভব নয়। যা মজ্জাগত প্রেজুডিস এদের।—কুকুর-বেড়ালেও ছোঁয়াচ লাগতে কতক্ষণ?—আমি বলি কি অম্ব, বরং লরাকেই ডেকে ফিরিয়ে দেওয়া যাক—তুমিও তো আর সত্যিই বেড়াল ভালোবাসো না—”

—“তা'লে তো আপদ যায়। ওটা বিদায় হ'লে বাঁচি। কিন্তু জেসি বলছিল কি জানো? আস্তে আস্তে নাম ধ'রে ডাকলে নাকি বার্গ মানতেও পারে—”

—“হয়েছে, ওর নাম জিজ্ঞেস করবার জন্তে ছুটতে হবে না কি আবার সেই মুদির দোকানে?”

অপর্ণার মুখে দুষ্টুমির হাসি।—“কেন, বেড়াল পোষার মজাটা একটু টের পেতে হবে না? হায়রান হ’লে চলবে কেন—এরই মধ্যে?”  
তারপর গম্ভীর হ’য়ে বললে—“আচ্ছা তুমি খেতে বসো। আমি দেখি, যদি কোনোমতে বের করতে পারি।” মনে মনে হাসলাম। কেন—বলছি পরে।—

অপর্ণা একখানা প্লেটে খানিকটা দুধ ঢেলে নিয়ে মেজেতে ব’সে বেড়ালছানাকে আহ্বান করতে লাগল—“পুসি, পুসি—টনি—ববী—ফ্রিটিং ফাঁক—?—নাঃ—কোনো নামেই তো সাড়া দেয় না—ভালো বিপদেই পড়া গেছে! এই লস্কীছাড়া বেড়াল কোথাকার—বেলেলামি  
• রেখে আসবি তো আর বলছি—জলদি—নইলে দেবো হাড় গুঁড়ো ক’রে—

—“থাকগে অম্ম, তুমি খেতে এসো এখন—”

—“দাঁড়া। আয় মিনি—মিনি—মিমু!”

—“মি-উ!”

—“ওমা—সাড়া দিচ্ছে—দেখেছ? মিমু—মিমু—আয়, আয় মিন্—মিন্ মিমু!” প্লেটখানা সোফার কাছে রেখে আবার আরও নরম সুরে ডাকল—“মি-মু!”

—“মী—উ!”—ভয়ে ভয়ে মাথাটা একটুখানি বের ক’রে প্লেটে মুখ দিতেই থপ ক’রে ধ’রে অপর্ণা বললে—“বাস্, ধরেছি। হ’ল তো এবার? নাও তোমার বেড়াল—”

—“আমি হাতটা ঠেলে দিয়ে বললাম—“চাইনে এমন দুষ্টু বেড়াল—বলো জেসিকে ফিরিয়ে দিতে—”

—“একুনি তো আর ফিরিয়ে দিতে পারছ না? ধরো ততক্ষণ—দেখো ছেড়ে দিও না যেন। আমি দাড়ি নিয়ে আসি ও-ঘর থেকে।”—



বিকলে পার্কে বেড়াতে বেড়াতে অপর্ণা হঠাৎ বললে—“কোনো নামেই সাড়া দিল না—মিছ ডাকতেই বেরিয়ে এসেছে—ভারি মজা! ওটার নাম মিছ নয় তো?”

—“হবে।”

থানিকক্ষণ পরে অপর্ণা আবার বললে—“তা হ’লে মিছই থাক ওর নাম?”

কোটের বোতামের দিকে চোখ রেখে নিরুৎসুক কণ্ঠে বললাম—  
“নামটামে আর কাজ কি? দিয়েই যখন দেব—”

—“হুঁ—”

দিন-দুই পরে একটু শীগগির ছুটি পেয়ে বাড়ী ফিরে দেখি—অপর্ণা সামনের সিঁড়ির রেলিংএ ভর দিয়ে দাঁড়িয়ে প্রতিবেশিনী মিসেস হল-এর সঙ্গে কি যেন বলছে। আমাকে দেখেই চুপ। মিসেস হল হেসে শুভ-সম্ভাষণ জানিয়ে বললেন—“আপনার স্ত্রীকে বলছিলাম, বেড়ালকে এখন থেকেই সব অভ্যাস না করালে পরে ভারি বেগ পেতে হবে—”

—“ও, তাই নাকি? ধন্যবাদ—”

অপর্ণার চোখে চোখ পড়তেই সে মুখ ফিরিয়ে নিল।

ভেতরে আসতে বেশ একটু ঝাঁঝের সঙ্গে ব’লে উঠল—“আমি তখনই জানতুম যে, এ বেড়ালের ঝক্কি সব পড়বে শেষটা আমারই ঘাড়ে।

মিস্ট্রু হুকে জিজ্ঞেসা না ক'রে করি কি ? ' কোণে কোণে নোংরা ক'রে রাখাটা কি খুব ভালো কথা ?”

—“নিশ্চয়ই না। কিন্তু ওটাকে যে ফিরিয়ে দেবার কথা ছিল ? জেসি গেলনা কেন ?”

ও মুখভাঙ্গ ক'রে বলে—“সে তুমি জানো, আর জানে তোমার জেসি। উইলিয়ামসনের তো ভারি ব'য়ে গেছে কি না একবার দিয়ে আবার ফিরিয়ে নিতে। একটার বেশি বেড়ালকে খাওয়াবার খরচ গায়ে লাগে না ওদের ? যা কুপণের জাতি সব—”

আমাকে বাধ্য হ'য়ে রোজ অনেক রাত জেগে পড়াশুনা করতে হয়। মাঝে মাঝে অপর্ণাও জাগে। এটা ওর খেয়াল, কিন্তু বারণ ক'রে দেখেছি—নিশ্ফল। অগত্যা আমি হাল ছেড়ে দিই। খাবার ঘরে আঙনের কাছাকাছি টেবিল আর দুখানা চেয়ার টেনে নিয়ে যে বার কাজ করি। এগারোটা না বাজতেই অপর্ণা ঢুলতে শুরু করে এবং আস্তে আস্তে টেবিলে নাথা রেখে ঘুমিয়ে পড়ে। রো—জ। রাত জেগে পড়তেই পারে না ও—তবু—জেদ।—সেদিনও এমনি ঘুমিয়ে পড়েছে। আমারও সারাদিনের পরিশ্রমের পর ক্লান্তিতে এক-একবার চোখ বুঁজে আসে। হঠাৎ চেয়ে দেখি, মিস্ত্রু অপর্ণার চেয়ারের নিচে লুটিয়ে-পড়া লম্বা বেগীটা নিয়ে থাবা দিয়ে দিয়ে খেলা করছে। বেগীর আগায় বাঁধা দোহুলামান রঙীন রিবনের ফুলটাই ওর কোতুহল উদ্রেক করেছে। এরকম খেলা করতে দেখতে খুব ভালো লাগে কিন্তু ভয় হ'ল পাছে ও জেগে ওঠে—তাই আস্তে ক্লাসরখানা দিয়ে এক তাড়া করতেই মিস্ত্রু কিন্তু ভয়ানক ভয় পেয়ে তড়াক ক'রে একেবারে অপর্ণার ঘাড়ে। ও চমকে জেগে বেড়ে ফেলে দিতে যায় : কিন্তু মিস্ত্রু ভয়ে চারখানা

পায়ের সব কথানি ধারালো নখ'র ক'রে অপর্ণার কাঁধ আঁকড়ে ধ'রে রইল।

—“কি এত হাসছ বলো তো? ভা—রি মজা—না? শীগ'গির ছাড়িয়ে দাও, নইলে কিন্তু খুন ক'রে ফেলব তোমার বেড়ালকে।”

—“বেড়াল আমার, না তোমার? আমার কোলে চুড়তে দেখেছ একদিনও? ওটা তোমাকেই ভালোবাসে বেশি—”

—“চাইনে অত ভালোবাসা”—জোর ক'রে নামাতে গিয়ে মিস্স আরো ভয় পেয়ে ওর ড্রেসিং-গাউন ধ'রে ঝুলতে থাকে।

শুতে যাবার আগে অপর্ণা মিস্সকে আগুনের ধারে একটা কাঠের বাস্কে রেখে দিল।

বললুম—“ইস্ এ যে রাজশয্যা! এই-না তুমি বেড়াল ভালোবাসো না?”

—“ভালোবাসার জন্তে তো এত কাষ্ট করিনি! বেড়াল যদি রাখতেই হয়—”

আমি নিরীহভাবে বললাম—“তাহ'লে লরাকে আর খবর দিয়ে কাজ নেই—রাখবেই যখন—কি বলো?”

অপর্ণা হেসে ফেলে বললে—“হ্যাঁ গো হ্যাঁ—রাখব। তুমি যে কতই খবর দিতে লরাকে তা কি আমি এ'চে নিইনি মনে করো নাকি? স—ব তোমার চালাকি—আমার ঘাড়ে চাপাবার জন্তে বেড়ালটাকে।”

যাক—ফাঁড়া তো কেটে গেছে উপস্থিত।

বাস্তবিক আমি জানতাম যে, অপর্ণা যখন দেখবে একটা প্রাণী বোবা—অসহায়—কেউ বরদাস্ত করতে পারছে না—যেন বাড়ি থেকে বিদায় করতে পারলেই বাঁচে—তখনই ওর দরদ হবে—দুর্ভাগ্যের উপর দয়ার্জ শক্তিমানের দরদ। বুদ্ধিমতী জেসিকে একটু ইঙ্গারা করতেই সেও



ব্যাপারটা ঠিক বুঝে অনাদর আর তর্জিহাল্য দেখিয়ে মিছকে দূরে রেখেছিলেন। বেড়ালটাও কম শেয়ানা নয়। ক্ষিপে পলে অপর্ণার কাছে গিয়েই মি মি করে—তুলেও আমার কাছে আসে না। ওরই পায়ের উপর মাথা ঘ'বে, পার্‌স্‌—পার্স্‌—পার্স্‌; সাম্নে শুয়ে প'ড়ে ডিগবাজি খেয়ে, কখনো বা চিৎ হ'য়ে চারটি পা উপরদিকে তুলে—ছোট্ট ষাড়টি বঁেকিয়ে নরম ছোট্ট দেহে নানান ভঙ্গি ক'রে আদর কাড়বার সে কী হাজারো চেষ্টা! অপর্ণার যখন-তখন-দোহুল্যমান বেগীখানি আর কোমল উষ্ণ কোলটির উপর মিছর সব চেয়ে লোভ। সুবিধা পেলেই এই প্রিয় জিনিষ দুটি আক্রমণ ও দখল করবার আগ্রহের ওর সীমা নেই। ফলে, গোলাপী নাকের উপর তর্জনির তাড়নায় খানিক ক্ষণের জন্তে ওর সেই প্রথমদিনকার দুর্গ কাবার্ডের নিচে গিয়ে আশ্রয় নেয়। আবার একটু পরে নিজেই বেরিয়ে আসে। আজকাল আর ওকে বের করবার জন্তে নানান ফন্দি-ফিকির খুঁজে বেড়াতে হয় না।

দেখতে দেখতে মিছর গলায় বাঁধবার জন্তে রঙীন রেশমি ফিতে, লোম পরিষ্কার করবার বুরুশ, গায়ে মাথাবার পাউডার, খেলা কুরবার ছোট ছোট বল—কত কী যে আমদানি হ'তে লাগল! দেখ-শুনে আমি তো অবাক! একদিন থাকতে না পেরে বললাম—“এতও তোমার মাথায় আসে! কী শোরগোলই তুলেছিলে প্রথম দিন যখন ওটাকে আনবার কথা বলেছিলাম—শুধু কঁাদতে বাকি—আর এখন এসব কী হচ্ছে?”

—“দেখতেই তো, পাচ্ছ। তুমি যখন বাড়ি থাকো না তখন ওটাই

আমার একমাত্র সাথী বলতে শাখী, দোসর বলতে দোসর ;—পরিষ্কার পরিচ্ছন্ন না রাখলে ভালো লাগে কখনো ?”

—“তাই বলে পাউডার !!”

—“পাউডার মাথালে মিষ্টকে কী সুন্দর যে দেখায়—দেখবে ? মিষ্ট, মিষ্ট—আয় এদিকে ।……বাস্, এই দেখ এখন কেমন দিব্যি দেখাচ্ছে—এই, নড়িস্ নে—হুঁষ্ট্ !”

যতবার পাউডার মাথায়, মিষ্ট ততবারই গা ঝাড়া দিয়ে ফেলে দেয়, নয়তো তাড়াতাড়ি জিভ দিয়ে চেটে লোম পরিষ্কার ক’রে ফেলে । কিন্তু অপর্ণারও জেদ—মিষ্টকে পাউডার মাথিয়ে, গলায় লাল রিবন পরিয়ে সাজিয়ে শুছিয়ে ফিটফাট পটের বিবিটির মত ব’সে থাকতে শেখাবেই—তা মিষ্টর যতই কেননা আপত্তি থাক্ ।

—“ওগো, দেখছ, কান ম’লে দিলে ও ঠিক বুঝতে পারে যে, এমন একটা কিছু করছে যা আমি পছন্দ করি না । এমন শাস্তি আর আদরের ভেতর দিয়েই আস্তে আস্তে সব অভ্যেস করাতে হয়—জানো ?”

—“জানি, কেবল কপালে একটা টিপ পরিয়ে দিতেই বা বাকি কেন এইটেই যা জানি না । ওটাকে তো বালগোপালের বিগ্রহের সামিল ক’রে তুললে । আসল কথাটা কি বলব ?—তোমার মত মেয়েরা বড্ড এক্সট্রিমিষ্ট্ । এই খেলার অন্ত নেই তো একটু পরে ভালোবাসায়ও নাজেহাল ।”

—“তুমি বোঝ হয় ভুলেই গেছ যে, ছোট থেকে বাড়িতে ওরা বেড়াল নিয়ে আমাদের কেবল ভয়ই দেখিয়েছে—কখনো কি একটু খেলা করবার সুযোগ পেইছি ? গায়ে হাত বুলিয়ে একবার আদর পর্য্যন্ত না । অন্ত কিছু করলে—যেমন, আমার বোন চিষ্ট—জানো তো ওর পেছন পেছন হায়ে-মায়ে একপাল বেড়াল চলত দিনরাত ? বেচারি কি ভালোই বাসত

হর বেড়ালকে!—আমার কিন্তু ভারি আশ্চর্য লাগত যে, কী পায় লোকে বেড়ালের মধ্যে অত আদর করবার! হয়েছে কি—” অপর্ণা দম নিয়ে বলল, ওর খেই হারিয়ে—“আমার ঘেমাটা স্বাভাবিক ছিল না।”

—“কোনো ঘেমাই, স্বাভাবিক নয় অনি। কোনটা ঠিক স্বাভাবিক আর সত্যিকার বৃত্তি আমাদের, তা যদি বলতে যাই, তুমি এখনই ব’লে বসবে—ঐ গো গুরুমশায়ের মত কপিবুক্ ম্যাক্সিম আওড়াচ্ছে দেখ! বাক্, তুমি যে খুসি হয়েছ, তাতেই আমি নিশ্চিন্তি! কিন্তু দেখো, যত্ন আদর সবটার দখলী যেন একা তোমার মিত্রর ভাগে না পড়ে—এই বেচারার—”

অপর্ণা ধমক দিয়ে বললে—“আচ্ছা আচ্ছা, হয়েছে—আর ফাটলানো করতে হবে না মশায়। তুমি পড়ো এখন, আমি মিনিকে নিয়ে ঔষধুরে যাচ্ছি।”

তারপরে—কত বছর হ’ল দেশে ফিরে এসেছি। বয়সের নদীতে জোয়ার ক্রমেই আসে ঢিমিয়ে, ভাঁটাই বুঝি বা একটুনা হয় শেষে—তবু সেদিনের কথা মনে হ’লে আজও বুকের ভিত্তরটা কেমন ক’রে ওঠে। মনে হয়, মিথো এ জীবন, ভূয়ো, জীবনের আলমশলা, কাণ্ড-কারখানা সবই বুঝি বা ভোজবাজি—মরুভূমির মরীচিকার মতই ক্ষণস্থায়ী। সেই অপর্ণা, সেই মিত্র—আজ কে কোথায় যে! সেই আমিই কি আছি? অন্তরে বাইরে কত পরিবর্তন!—হঠাৎ দেখলে অনাটন হয়ই আজ ওর স্বামীকে ঠিক চিনতে পারত না—কে বলতে পারে?

তবু, চোখ বুঁজলে আজো মনের মধ্যে স্পষ্ট দেখতে পাই ‘—! সন্ধ্যায় আমাদের সেই ছোট্ট স্ল্যাটখানা, তার প্রতি কক্ষ, প্রত্যেকটি আসবাব-পত্র ; জেসি, মিসু ; অপর্ণার দুটি কাজল কালো অতল চোখ, হাসোচ্ছল তীক্ষ্ণ কণ্ঠ, স্নেহ মধুর পরশখানি । ছোট্ট একটা বেড়ালছানা নিয়ে দুজনের সেই আমাদের ছেলেমানুষি ঘরকন্না, কথায় কথায় হাদি-ঠাট্টা, অপর্ণার হাদর-আস্বার, মান-অভিমান ; ছুটির দিনে মাঠে-মাঠে, পাহাড়ে, নদীর পারে—দূরে সমুদ্রের তীরে গিয়ে পিকনিক ।—ঝরণার জলের ম’ত গান গেয়ে গেয়ে স্বচ্ছ সুন্দর অবাধ-গতিতে ব’য়ে চলেছিল জীবনের ধারা । থেকে থেকে ভবিষ্যতের জন্তে কতই জল্পনা-কল্পনা—ভার একটা জীবন্ত কুরোও কি আজ রইল না ?—

জার্মান না কী গ্রহবৈগুণ্যে আমার খেয়াল হ’ল যে, নিউইয়র্কের কাছে দক্ষিণতীরে একটা ছোট্ট গ্রামে দিনকয়েকের জন্তে বেড়াতে যাবো । তখন আগষ্টের শেষ, ইংলণ্ডের গ্রীষ্ম ( বা বসন্ত ) অবসান-প্রায়, গাছের ডক্কনো পাতা ঝরা’র সবে শুরু, হাওয়াতে পরিবর্তন টের পাওয়া যায়, কিন্তু শীত আসবার এখনো দেরি । এখনো সারা সেপ্টেম্বরটা সামনে, অক্টোবরের আগে তেমন ঠাণ্ডা কি আর পড়বে ? আকাশ এখনো সুনীল, সূর্য্যের কিরণ প্রায় তেমনিই উজ্জ্বল, ফোঁটা ফুলের গাঙ্গির লয়ে ‘সম’ জায়গা নি গৃহস্থদের উত্থানে উত্থানে । এই তো ওদের হুমস্ত—মোটো শুরু—যাওয়া ঠিক ক’রে ফেললাম । অপর্ণার তখন দারুণ ভাবনা হ’ল—ও মিসুকে নিয়ে করা যায় কী ? সঙ্গে নেওয়া তো অসম্ভব । বাড়িতে ফেলে যাওয়া মানে জ্যাস্তে কবর দিয়ে রেখে যাওয়া—না খেতে পেয়ে মারা যাবেই । বাংলা দেশ নয় এ—যে পড়শীরা মাছের কাঁটাটুকুও জোগাবে !

—দুজনে মিলুর একটা আশ্রয় খোঁজবার জন্তে একবার উইলিয়ামসনের দোকানে, একবার বন্ধুদের বাড়িতে ঘোরাঘুরি ক’রে বেড়াতে লাগলাম। অবশেষে আমারই এক সহপাঠী বন্ধু—ডাক্তার সাইগল—খবর দিলেন যে, ওঁর ল্যাণ্ডলেডি মিলুকে রাখতে রাজি—যদি তার খোরাকি দেওয়া হয়। অর্পণা শুনে হেসে গড়িয়ে পড়ে আর কি! —“ডক্টর সাইগল—মিলু—মাগো মা! এমন কথা শুনেছেন কোথাও? বেড়ালের ল্যাণ্ডলেডি! হি, হি—আবার খোরপোষ চায়—Board and Lodging for a Cat.—কুম দেবে মিলুকে—একটা কাঠের বাস—হো:, হো:—খেতে দেবে কি? না, একপেনির হেরিং—ডক্টর—”

বেচারি সাইগল অগ্রস্তুতভাবে মূহ মূহ হাসতে লাগলেন। আমি অর্পণাকে একটু ধমক দিয়ে বললাম—“কী এত হাসো? হেরিং কেন খেতে দেবে? হেরিংএ কাঁটা কত ওরা জানে না?—আর পয়সা নী দিলে রাখবেই বা কেন শুনি—বেড়াল পুষতে খরচ নেই মনে করো নাকি? ভুলে যেও না যে—”

“এটা বিলেত দেশ”—ধমক খেয়ে অর্পণা হাসি চেপে চোখমুখ মুছতে মুছতে বললে—“না, ভুলব কেন? ভুলিনি যে, এখানে পয়সাই হচ্ছেন সর্কার্থসাধিকা। ভুলতে কি পারি? তা, চেষ্টা—গিয়ে মিলুর ভবিষ্যৎ আবাস দেখে আসি গে। এই মিলু, চলবে—দেখবি তোর নতুন আস্তানা—মনে ধরলে তবে তো। কিছু মনে করবেন না ডক্টর—”

—“বা, আমি কেন কিছু মনে করব মিসেস রায়? এদেশে সব ব্যাপারেই এমন, জানেনই তো।”

আমি প্রাঞ্জল সুরে বললাম—“পয়সা না হ’লে ওরাই বা দুধ, মাছ

এসব পাবে কোথেকে ? এক পেনিই হোক বা দু পেনিই হোক, কিন্তই পকেট থেকে দিতে সবারই গায়ে লাগে ।”

অপর্ণা কি বলতে গিয়ে থেমে গেল ।

ডাক্তার সাইগলের ল্যাণ্ডলেডির বাড়ি কাছেই । গেলাম তিনজনে মিনিকে নিয়ে । বরাবর তেতলায় ফ্ল্যাটে থেকে এসেছে—ইঠাৎ রাস্তায় নেমে মিছুর যা ভয় !—লম্বা লম্বা নখ বার ক’রে অপর্ণাকে আঁকড়ে ধরে রইল । মোটর চললে বা অন্য কোনো শব্দ হ’লে ঘাড় বেয়ে মাথায় চড়বার উপক্রম করে । ওর আঁচড়-কামড় সহ্য ক’রে কোনোনতে টম—মিসেস টমের বাড়ী পৌছানো গেল । বুড়ি মিছুকু দেখেই বললে—“এ যে রাশিয়ান-ক্যাট, তাই লোম অত লম্বা আর নরম—একেবারে ‘ফার’-এর মত ।”

অপর্ণা বললে—“তাই নাকি ? আমি তো জানতুম পার্শিয়ান ক্যাট ব’লে এক জাত আছে—রাশিয়ান তো কখনো শুনিনি—”

—“হ্যাঁ মিসেস, আমি সব জানি—ছেলেবেলা থেকে—”

মিসেস টমের কথা শেষ হ’তে পেল না—ইঠাৎ ঘরের মধ্যে ফোঁশ ফোঁশ শব্দ ! ফিরে দেখি, মিছু সজারু হ’য়ে পিঠ উঁচু ক’রে ষোড়শে লেজ নেড়ে একটু কালো বেড়ালের পানে এক দৃষ্টে চেয়ে আর সে বোচারা ভরে জড়োসড়ো হ’য়ে কোথায় লুকোবে ভেবেই পাচ্ছে না । মিসেস টম তাড়াতাড়ি সেটাকে কোলে তুলে নিয়ে সোফার এককোণে দিলে বসিয়ে । ডাক্তার সাইগল জনান্তিকে বললেন—“মিসেস টমের বেড়াল, মিষ্টার রায় । বুড়ি আপনাদের মিছুর ওর ‘ব্ল্যাক্-

ফুটবল ওপর নিষ্করণ ব্যবহার দেখলে আর ওকে ঘরে ঠাই দিতে চাইবে না।”

কিন্তু মিস্ত্রিকে কিছুতেই ঠেকিয়ে রাখা গেল না, যতবার ঠাঙা করা হয়—ততবারই ও গিয়ে কালো-বেড়ালকে আক্রমণ করে আর কি। অবশেষে ডাক্তার সাইগল যা ভয় করেছিলেন, তা-ই হ’ল। টমদের ঘরে মিস্ত্রির ঠাই হ’ল না।

এদিকে আমাদের আর দেরি করবার উপায় নেই। অগত্যা কুকুর বিড়ালের “হোম”-এ (Cats’ and Dogs’ Home) টেলিফোন করতে হ’ল। সেইখানে হারিয়ে-যাওয়া কুকুর-বেড়াল যেমন রাখে, তেমনি—সপ্তাহে কয়েক শিলিং ক’রে দিলে—কোনো বাড়ির কর্তা বা কত্রীও কোথাও যাবার দরকার হ’লে, তাদের পোষা জানোয়ারও রেখে দেয়। একটা লরিতে অনেকগুলো খাঁচা নিয়ে “হোম” থেকে লোক এলো। ওদেরই একটায় মিস্ত্রিকে ঢুকতে হবে। মিস্ত্রি কিছুতেই খাঁচায় ঢুকতে রাজি নয়, শেষটা ড্রাইভার হর্ণ দিতে ভয় পেয়ে ঢুকে পড়ল। তারপর লরি চলার সঙ্গে সঙ্গে মিস্ত্রির সে কী কাৎরানি আর চোঁচামেচি! অপর্ণা দুঃখিত হ’য়ে গার্ডকে ডেকে বিশেষ ক’রে ব’লে দিলে যেন সাবধানে রাখে ও ভালো ক’রে খেতে দেয়। সে তো খুব আশ্বাস দিয়ে চ’লে গেল।

অপর্ণা বললে—“দেখ, মিস্ত্রিটা গিয়ে ঘর যেন খালি হ’য়ে গেছে। সারাদিন বাড়িতে ছোট্ট ছেলের মত দ্রুতপনা ক’রে বেড়াত।—আমরা আজ দুপুরের গাড়িতে গেলেও পারতাম।”

—“না, বড় তাড়াহড়ো হবে। কিন্তু একটা বেড়ালের ওপর এত মায়া, যখন—”

অপর্ণা হাত নেড়ে থামিয়ে দিয়ে বলল—“থাক সেদিন আমার কখনো হবে না। কিন্তু মমতা মাত্রেই কত মারাত্মক দেখছে তো? আমার কেন জানি না, ভারি মন কেমন করছে—মনে হচ্ছে, না গেলেও হ’ত।”

\* \*  
\*

তারপর ?—

তারপর আর কি! নিউহেভনের কাছে সেই গ্রামে শুধু দশটা দিন আমাদের নিশ্চিন্ত আরামে কেটেছিল। আমরা একলা ছিলাম না—সঙ্গে আরো দু-একজন বাঙালী ছেলে মেয়ে। তাঁরা সকলে মিলে একটা আলাদা বাড়ি ভাড়া ক’রে থাকতেন—শুধু আমি আর অপর্ণা সমুদ্র-তীরবাসিনী এক বৃদ্ধার কুটীরে দুখানি ঘর নিয়ে একটু দূরে থাকতাম। সারাদিন দলের সঙ্গে এখানে ওখানে—কখনো ব্রাইটন, কখনো নিউহেভনে বোরাফেরা ক’রে সন্ধ্যার আবছা অন্ধকারে স’রে পড়তাম এবং নির্জনে সমুদ্রতীরে গিয়ে চুপ ক’রে শুনতাম তার নীল কল্লোল। অন্ধকারে কখনো বা ঝড় মতন উঠলে সমুদ্রের গর্জনে ও মাতাল হাওয়ার শোঁ শোঁ শব্দে ভয় পেয়ে এক একদিন অপর্ণা ব্যাকুল বাহু দিয়ে আমাকে জড়িয়ে ধরত। স্বপ্ন ভেঙে আমি ওকে কাছে টেনে নিতাম!—“ভয় কি অহু, ভয় কি—”

—“ওগো—”

—“সত্যেন বলো—সত্যেন—এখানে তো আর কেউ শুনছে না।”

—“দেখ—দৈখ, সমুদ্র ঠিক যেন আমার গিলতে আসছে—কী ভয়ানক!”

—“সব কল্পনা, অহু। এখানে সমুদ্রতীর প্রকাণ্ড প্রকাণ্ড পাথরে



ভরা—চেউগুলো তারই উপর আছাড় খেয়ে অতটা লাফিয়ে উঠছে।  
আচ্ছা, চলো বাড়ি ফেরা বাক।”—

এমনি এক সন্ধ্যার কনকনে হাওয়ায় ঠাণ্ডা লেগে অপর্ণার শরীরটা একটু খারাপ হয়! আমাদের ল্যাণ্ডলেডি ওকে বললে আগুনের ধারে চুপচাপ ব'সে থাকতে এবং আমাকে বারণ ক'রে দিলে আজ যেন ওকে বাইরে টেনে নিয়ে না বাই—সময়টা ভালো যাচ্ছে না, এই-রোদ-এই-মেঘ—বারা প্রকৃতিদেবীর এই খানখেরালিতে অভ্যস্ত নয়, তারা অসুখ-বিসুখ ক'রে বসতে পারে।

লাঞ্চ-এর পর হঠাৎ বন্ধু সতীশ এসে হাজির। বললে—আমাকে ওর সঙ্গে একবার ব্রাইটনে যেতেই হবে—সেনের বাড়িতে! দরকারটা কি শুনে অপর্ণা বললে—“বাবো না? মানে? আমি মিসেস না'রের সঙ্গে বেশ থাকবো, ভয় নেই—একটু বৈচিত্র্য দরকারও তোমার।”

—“আপনিও চলুন না অপর্ণা দি, ডাক্তার সেন কত খুসি-বে হবেন—! প্রায়ই আপনার কথা বলেন।”

অপর্ণা আমার মুখের দিকে তাকাল, আমি বললাম—“না, কাজ নেই। তুমি আজকের দিনটা বিশ্রাম করো—”

সতীশ জিজ্ঞেস করল—“কেন, কি হয়েছে?”

—“একটু সর্দি মতন হয়েছে কাল থেকে—”

—“ওঃ—কিছু এসে যাবে না ওতে—অমন একটুখানি সর্দি—”

অপর্ণা একটু ভেবে বললে—“থাক্গে—আজকের দিনটা না-ই বেকলাম। তুমি শীলাকে বোলো আমার কথা।

ডাক্তার সেন শীগগির আমাদের ছাড়লেন না। বিকেলের দিকে বেরোতে যাব, এমন সময় বেশ খানিকটা বৃষ্টি হ'য়ে গেল, তাই সেন-জায়া ধীরে বসলেন গরম গরম হালুয়া খেয়ে বেতে আর এক এক কাপ চা। বলা হালুয়া, বিলেতে এমন স্বাদু প্রস্তাব ছেড়ে সহজে কেউ ঠাইনাড়া হ'তে গাইল না।

সবে আমাদের “বর্ষার” আসরটা জমে এসেছে এমন সময় বাইরে ঘণ্টা বজে উঠল—মিনিটখানেক পরেই ঘরে এসে ঢুকল—অপর্ণা। জামা-জুতো ওর ভিজে শপ্ শপ্ করছে। ডাক্তার সেন ভাড়াভাড়ি উঠে মাগুনের ধারে একখানা চেয়ার টেনে এনে দিলেন, সেন-জায়া এক-জাড়া গরম বনাতের শ্লিপার এনে জুতো মেশজা গুলে ফেলতে ব'লে ধোলে, শাড়ীখানা আর ব্লাউজটাও ছাড়বে কি না।

—“কিছু দরকার নেই শীলা, সিকের জিনিষ—এফুনি শুকিয়ে পাবে সব। শুধু মোজাটা ছাড়া দরকার।” পরে আমার তিরস্কারভরা চাখের দিকে তাকিয়ে—“আমি মিছামিছি আসিনি, এই দেখ।” ব'লে একখানা টেলিগ্রাম দিল আমার হাতে। পু'ড়ে দেখি, “হোম” থেকে এসেছে। ওরা লিখেছে, মিস্তর ভারি অসুখ, আর একটা বেড়ালের সঙ্গে ঝগড়া ক'রে ভয়ানক কামড় খেয়েছে, পেছনে পায়ে কাছে খানিকটা চামড়া ছিঁড়ে গিয়ে লাল দগ্‌দগে মাংস বেরিয়ে গেছে—বিনামেঘে বজ্র—বলে না?

অপর্ণা বললেন—“তুমি এফুনি একটা টেলিগ্রাম ক'রে দেবে চলো, লিখে দাও যে, আমরা এলাম ব'লে এর মধ্যে ওরা যেন একটুও অস্বস্তি

না করে।” তারপর শীলার দিকে ফিরে—“বেচারী কী কান্নাটাই কাঁদছিল খাঁচার মধ্যে ঢুকে! সখের কুকুর-বেড়ালকে কখনো ওসব হোম-টোমে পাঠাতে আছে? একটা-না-একটা গোলমাল হবেই হবে।”

সেন-জায়া বললেন—“কিন্তু একটা বেড়ালের জন্তে একেবারে এখান থেকেই চ’লে যাবে, অপর্ণা? খরচ দিলে ওরাই তো ডাক্তার ডেকে মিছর দেখাশুনো করতে পারত—”

—“না ভাই, যাওয়াই ভালো। তা ছাড়া এখানে এত আগে থাকতেই যে-ঠাণ্ডা পড়তে শুরু হয়েছে—সমুদ্রের হাওয়াটাও এসময় ভালো নয়। যেতামই তো আর দিন-দুই পরে!—শরীরটাও আমার মোটেই ভালো ঠেকছে না।”

রাগত সুরে বলান—“তবু কেন হুড়মুড় ক’রে বাড়িঘাপটায় ভিজতে ভিজতে এখানে এলে শুনি—এই খারাপ শরীরে?” তুমি একটা কাণ্ড না বাধিয়ে ছাড়বে না দেখছি।—মিসেস সেন, ওকে একজোড়া গরম মোজা এনে দিন তো।...চলো সতীশ, টেলিগ্রাফ-অফিসটা হ’য়ে বাড়ি।”

পথে যেতে যেতে সতীশ জিজ্ঞেস করলে—“তাহ’লে কবে যাবেন আপনারা?”

অপর্ণা বললে—“কালই। আমার আর একটুও ভালো লাগছে না—”

আমি বললাম—“দেখছ সতীশ, একদিন এই বেড়ালই ছিল ওর চক্ষুশূল—”

হেসে বললে—“আপনারা বুঝবেন কী বলুন—অস্ত্রের জুতোয় কোথাও উঠল পাহাড়প্রমাণ ছোট্ট পেরেক—” সতীশ এমনিভাবেই ইংরিজি প্রবচনকে তর্জমা না ক’রে ছাড়বে না। ‘আই সি এস’এর ছেলে স্বদেশী হয়েছে সবে—হবে না?

রাত্রে অপর্ণার বেশ একটু অর হ'ল। তবু ও কিছুতেই আর দুদিনও থাকতে রাজি নয়—মিসেস মারে' কত ক'রে বললেন, কিন্তু ওর সেই এক দুঃস্বপ্ন—দেরি হ'লে মিলু যদি না বাঁচে ?

ট্রেন থেকে নেমে আমাদের ফ্ল্যাটে যখন পৌঁছলাম, ততক্ষণে অপর্ণার নামান্ত সর্দি-অর রীতিমত ইনফ্লুয়েঞ্জায় বঁকে দাঁড়িয়েছে। বিপদের উপর বিপদ—সমস্ত সেপ্টেম্বরটা সমুদ্রতীরে কাটা'ব ভেবে জেসিকে এক মাসের ছুটি দেওয়া হয়েছিল। এখন খোঁজ ক'রে দেখা গেল, সে গ্রামে কোন্ এক মেসোর বাড়িতে মাসখানেকের জন্তে বেড়াতে গেছে। অত অল্প সময়ের জন্তে অল্প মেড পাওয়া মুশ্কিল। ওর মাকে বললাম চিঠি লিখে জেসিকে ঝটিতি আনাতে। ইতিমধ্যে সতীশ আর আমি নিজের হাতে সমস্ত কাজ করতে লাগলাম। দেখে অপর্ণা এক-এক সময় গোপনে উঠে নিজের দরকারি কাজগুলো নিজেই ক'রে রাখত। দুর্বল শরীর আর সইবে কত ? দেখতে দেখতে ইনফ্লুয়েঞ্জা পুরিসিতে—পুরিসি নিউমোনিয়ায় দাঁড়াল।

বলতে ভুলে গেছি বাড়ি ফিরে অপর্ণার আর তবু সয়নি—এসেই মিলুকে হোম থেকে আনিয়ে নেয়। পালিনীকে ফিরে পেয়ে মিলুর যা মানন্দ—! বেচারা এই কদিনেই কী রোগা হয়ে গেছে—! অপর্ণা পায়ে হাত বুলিয়ে ছল ছল চোখে বললে—“আহা, খেতে দেয়নি মোটে।—দেখেছ কী হালকা হয়ে গেছে ?”—যেন শোলা !

—“হাঁ। কিন্তু দোষটা ওরই ; জিজ্ঞেস করেছিলাম গার্ডটাকে, সে বললে যে, মিলুই সারাদিন প্রায় কিছুই খেত না, ডাকলে সাড়া দিত না, মাছ দুধ যেমন তেমন নাকি প'ড়ে থাকত।”

—“সত্যি ?—কেন ?”

—“জিজ্ঞেস করো না মিনিকেই—বুঝতে পারছ না ওর কাণ্ড দেখে ?”

অপর্ণা হাসল। বাস্তবিক, “হোম” থেকে এসে পর্য্যন্ত মিলু পারংপক্ষে অপর্ণার বিছানা ছেড়ে কোথাও যায় না। অভ্যাসমত এক একবার বাইরে গিয়ে কাঠের বাক্সে মখমলের উপর ব’সে আবার সোজা ওরই ঘরে ফিরে আসে। চুকতে না দিলে বা দরজা খোলা না পেলে কাতরভাবে মি-মি করে, নয়তো দরজার কাছে চুপ ক’রে ধর্ষা দিয়ে ব’সে থাকে। তবু আর কোথাও যেতে চায় না।

তারপর—যেদিন অপর্ণাকে হাঁসপাতালে নিয়ে গেল—আঃ কিদ্ব থাক—থাক সে দিনগুলোর কথা—স্মৃতিও অতটা সহিবে না, যদিও আজ আয়ুর অর্দ্ধেক এসেছে ফুরিয়ে।

চৌদ্দদিন পরে অপর্ণাকে চিরদিনের মত বিদায় ক’রে সতীশকে বললাম—“ভাই, আমি দিনকতক অন্ত কোথাও ঘুরে আসি গে। এই নাও এ-চেকখানা—ফ্ল্যাটটা ছেড়ে দিও যত শীগ্গির পারো। আর, ভালো কথা—জেসিকেও একবার খবরটা দিও।”

—“কিন্তু এটার কী ব্যবস্থা করলি’রে সত্যেন ?”

—“কার কথা বলছ ?”

—“এই যে তোদের—মিলুর—”

—“ওঃ”—আমি চোখ সরিয়ে নিলাম—

—“কোরো যা হয়—”

ওরই জন্তে অম্লর সামান্য সর্দিকাশি প্লুরিসির দিকে মোড় নেয়—  
একটা সামান্য—উপলক্ষ্য—বেড়ালের জন্তে !!

• \* \*

অক্টোবরের মাঝামাঝি সেশন আরম্ভ। সেই ক্লাস, লাইব্রেরি, হাঁসপাতাল—গতানুগতিক দিনগতপাপক্ষয়! ধারও ধারে না সে মানুষের অন্তর্জগতে স্রব্ধং পরিবর্তনের—বহির্জগৎ সেই একইভাবে একটানা ব'য়ে চলেছে। আবার ছুটি নিয়ে চললাম দর্শনমুখে। এখানকার আকাশে-বাতাসে ওর স্মৃতি মাথানো—অসম্ভব, অসম্ভব এখন এখানে থাকা।—

যাবার আগে কি জানি কেন—হঠাৎ মনে হ'ল—একবার মিনিকে দেখে যাই। সতীশ ওর বাড়িতে নিয়ে রেখে দিয়েছে। ওর ল্যাণ্ডলেডি এসে বললে—“বড় লক্ষ্মী বেড়াল, আর এ—ত সুন্দর! আমার ছেলেমেয়েরা ভারি ভালোবাসে, কিন্তু দুঃখের বিষয় মিষ্টার রান্ন, ~~মিষ্ট~~ যে আপনার কিছুই খেতে চায় না!—আদর ক'রে ডাকলেও সাড়া দেয় না—কেমন যেন মনমরা হ'য়ে থাকে। দেখবেন একবার আপনি?”

ওর পেছন পেছন রান্নাবরে গিয়ে দেখি মিষ্ট জানলার উপর চুপ ক্ল'রে ব'সে। ভালো কে লাগছে না ওর, দেখলেই বোঝা যায়।

—“মিসেস রীড, আমি এক্ষুনি আবার আসছি।” ব'লে বেরিয়ে গেলাম: কাছেই এক মাংসের দোকানে গিয়ে ছুপেনির কিমা-করা মাংস কিনে এনে মিষ্টকে নিয়ে এলাম সতীশের বসবার ঘরে। সামনে ধ'রে দিয়ে সোফায় ব'সে ওর খাওয়া দেখতে লাগলাম। মিষ্ট দু-একবার মাংস শুঁকে দেখে আমার কাছে এসে পায়ের ওপর গা-মাথা ঘষতে

লাগল! চিনেছে ও। একটু 'আদর' ক'রে পিঠ চাপড়ে বললাম—  
“খা না'মিনি!”

ফিরে আসবার সময় মিহু দোর পর্যন্ত সঙ্গে সঙ্গে এল। মিসেস  
রীডকে ডেকে বললাম নিয়ে গিয়ে দোরটা বন্ধ ক'রে দিতে।

—“কিন্তু না খেয়ে আপনার বেড়াল যদি মারা যায় মিষ্টার রায়?  
আমরা যে কোনোমতেই বাগ মানাতে পারছি নি ওকে।”

আমি জবাব দেবার আগেই সতীশ বললে—“আচ্ছা, সে আমিই  
দেখব'খন, মিসেস রীড”—

সমস্ত শীতটা দক্ষিণে কাটিয়ে বসন্তের আগমনের সঙ্গে সঙ্গে ফিরে  
এলাম সেই পুরোণো সহরে। নতুন বাড়িতে ছোটো ঘর নিয়ে গুছিয়ে  
ব'সেই মনে পড়ল মিহুর কথা। দেখতে হচ্ছে একবার—এতদিন  
বঁচে আছে কি নেই—যা মনমরা হ'য়ে থাকতে দেখেছি মাস কয়েক  
আগে।

সতীশ সে বাড়ি থেকে উঠে গেছে আমি দক্ষিণ-দেশে থাকতেই।  
মিসেস রীডের খুঁকি পলি এসে, দরজা খুলে দিল।

—“মা কোথায় এ্যান? ডেকে দাও তো—”

—“মিষ্টার রায়! আপনি?—আছেন ভালো?”

—“মিহুকে দেখতে এসেছি মিসেস রীড—আছে তো সে?”

—“আছে ব'লে আছে?—আসুন আসুন”—আমাদের ঘরে  
বসিয়ে “এমন চমৎকার বেড়ালকে কি আমি হাতছাড়া করতে  
পারি? ও-ই যে দেখুন না—ও-ই বাইরে রান্নাঘরের বাগানের

দেয়ালে ধ্যানস্থ। কত বড়টি হয়েছে দেখেছেন? আজকাল বাড়িতে ঢুকতেই চায় না—সঙ্গিনী জুটেছে কিনা! মিল্ল এখন মস্ত লোক, পাড়ার বেড়ালদের সর্দার-গোছের!”

একটুখানি দাঁড়িয়ে দেখে চলে এলাম।

হায় অপর্ণা, এই তো জগতের ভালোবাসা!—তোমার অভাবের দুঃখ স’য়েও আমাদের প্রাণের ধারা তেমনি টেনে চলেছে আপন শ্রোতের জের!



## অকারণ ?

ষ্টেশনে নেমেই দুখানা ট্যাক্সিতে ছুজনে ছুদিকে । আগের বন্দোবস্ত ম'ত দাদাকে সাউথ কেনসিংটন ক্লাবে এবং আমাকে বোর্ডিংএ নিয়ে যাবার ভিন্ন ভিন্ন লোক এসেছে । দাদার ইচ্ছে 'আমাকে পৌঁছে দিয়ে তবে নিজের ডেরায় যান, কিন্তু অন্তঃসহযাত্রীরা বলল তার কোনোই দরকার নেই । এ কলকাতা সহর নয়,—ওরা আমাকে ঠিকই নিয়ে বাবে যথাস্থানে—যথাপর্য্যায় ।

নটার পরে বোর্ডিঙে পৌঁছলাম । মেড ওপরে একটি অফিসমত ছোট ঘরে বসিয়ে গেল কত্রীকে খবর দিতে । একটু পরেই পাতলা ছিপছিপে মিস ইয়ং হাজির : “এই কি মিস গাঙলি ? ও মা, এ যে দেখি নেহাৎ ছোটটি । পথে কোনো কষ্ট হয়নি তো ?”—অথ নানা সরস সন্তাষণে বোধ হয় আমার পথশ্রম লাঘবের যথারীতি চেষ্টা ।

—“এক গ্লাস গরম দুধ ?—না ? এখনই শুতে যাবে ? আচ্ছা আচ্ছা বেশ, এতটা পথ এসেছ, কিন্তু কিছুই কি খাবে না ?”

—“ভাত তরকারি পাওয়া যায় কি ?” সুরুষ্ঠে শুখোলাম—

—“ভাত তরকারি ? না বাছা, 'সে সেই, তিন বছর পরে দেশে ফিরে 'খেয়ো'খন—এখানে তো ও-সব জুটবে না । বড় মন কেমন করছে তোমার, না ? এসো দেখি আমার সঙ্গে, তোমাদের দেশের আর একটি য়েয়ে আছেন এ বাড়ীতে, তাঁর সঙ্গে আলাপ করিয়ে দিই চলো ।”

মিস ইয়ং লোক ভালো, বয়সও বেশি নয়। ভারতীয় মেয়েরা তাঁর এখানে প্রায়ই আসে। কেউ দিনকতক, কেউবা মাস দুই-তিন থেকে অল্পতর চ'লে যায়। তাঁর ইচ্ছে—লগুনেই যারা পড়বে তারা এখানেই থাকে। সেজঙ্গে ভারতীয় মেয়েদের সাধারণ বোর্ডারদের চাইতে অনেকটা আরাম ও সুবন্দোবস্তে রাখতে চেষ্টার ক্রটি নেই তাঁর। কিন্তু বেশি দিন বড় কেউ থাকে না এখানে। আমার বার সঙ্গে সে রাত্রে পরিচয় হ'ল, এ-পর্যন্ত একমাত্র সে-ই বছরখানেক টিকে গেছে। পাশী মেয়ে, বয়সে আমার অনেক বড়, ভারি সহৃদয়। দাদা বার্মিংহামে চ'লে যাওয়ার পর প্রথম প্রথম ওরই সঙ্গে যাওয়া-আসা করতাম। মনে মনে স্থির করলাম খসে'দের সঙ্গে আমিও এখানেই বরাবর থেকে যাব।

মাসখানেক পরে যখন লগুন সহরে একটু কায়মি হ'য়ে এসেছি—ছুটির দিনে খসে'দের সঙ্গে এদিক-ওদিক দেখে-শুনে বেড়াচ্ছি, এক রবিবারে ওর এক বান্ধবী—আসামী মেয়ে—এসে প্রস্তাব করলেন Y. M. C. A.-তে “শেফ'পীয়র হাট্”—এ যাওয়া বাক, শুধু থাওয়ার জন্তে—Conan Doyle-এর বক্তৃতাও শোনা হবে। উভয় প্রস্তাবেই বিশেষ উৎকুল হ'য়ে উঠলাম বৈ কি। একে তো এ-বিদেশে ভাত পাওয়া ঘটে শুধু পূর্বজন্মের স্মৃতির গুণে, তার ওপর কোনান ডয়েলকে দেখা—একেবারে জলজ্যান্ত—চোখের সামনে! সেই কোনান ডয়েল যার বই পড়বার সময় কল্পনাও করিনি যে তাঁকে চাক্ষুব দেখতে পাব। স্বনামধন্যদের সঙ্গে একেবারে এই মর-জগতে এমনভাবে সাক্ষাৎকার আমার তখনকার অনতিজ্ঞ কল্পনা-বিতোর মনে যে কী অত্যাশ্চর্য ব্যাপার ব'লে মনে হ'ত, ভাবলে এখন হাসি পায়।

সুনলাম শনি রবিবারে এমনিতেই ভারতীয় আহারার্থী আসে লগুনের

দশদিশি থেকে। তার ওপর আজকের বিশেষ বন্দোবস্ত : সন্ধ্যা না হ'তেই রেস্টোরাঁয় আর তিল ধারণের স্থান নেই। আমরা তিনটি মেয়ে মহা অগ্রস্তুতভাবে এদিক-ওদিক তাকাচ্ছি এবং চ'লে যাব, না একটু ধৈর্য ধরব স্থির করতে না পেরে 'ন যবৌ ন তস্থৌ' অবস্থায় ইতস্তত করছি, এমন সময় সামনের টেবিলেরই এক ভদ্রমহিলা ইঙ্গিতে আমাদের দেখিয়ে তাঁর পাশের ছেলোটিকে জনাস্তিকে কি বললেন। সে অম্নি উঠে থর্সেদের কাছে এসে বললে—“আপনারা এই টেবিলে বসুন,—আমি আরো দুখানা চেয়ার এনে দিচ্ছি এক্ষুনি। আজ বড় ভিড় কিনা, কিছু মনে করবেন না অনেকক্ষণ দাঁড়িয়ে থাকতে হয়েছে আপনাদের।”

পরে 'হলে' ও আমাদের সেই মহিলাটির সঙ্গে স্তম্ভুথের দিকে বসতে দেওয়া হ'ল। কোনান ডয়েল সেদিন ঠিক কি নিয়ে বক্তৃতা দিয়েছিলেন আজ আর মনে নেই। কিন্তু এটি বেশ স্পষ্ট মনে আছে যে, বক্তব্য শেষ হওয়ার পর ইউনিয়নের এবং বাইরের অভ্যাগত ছেলেরা তাঁকে ভৌতিক ব্যাপার নিয়ে সম্ভব-অসম্ভব নানান প্রশ্ন ক'রে এবং 'সাদা-কালো' নিয়ে কি-একটা বেকাস কথা ব'লে ফেলার জন্তে শেষের দিকে দারুণ উদ্বাস্ত ক'রে তুলেছিল। মেঝে পা ঘষা, শিষ দেওয়া, অযথা কাশি এইসবে এমন গোলমালের সৃষ্টি হ'ল যে এর পরে আর সভা জমতে পারে না। ডয়েল চ'লে যাওয়ার সঙ্গে সঙ্গে যে বেদিকে পারল উঠে পড়ল।

থর্সেদ আমার হাত ধ'রে একটু নিরালায় টেনে এনে বললে—“যুথিকা, মিনিট কয়েক অপেক্ষা করো, আমি একবার ঐ বক্তৃতির সঙ্গে দুটো কথা ব'লে আসি।” আসামী মেয়েটির ভাই এখানেই থাকতেন—তাঁরাও কি প্রয়োজনে উপরে গিয়েছেন। আমি একা অপেক্ষা করছি এমন সময় পূর্ব-দৃষ্টা সেই মহিলা এসে উপস্থিত। আমাকে দেখে

শুধোলেন—“তোমার সঙ্গিনী?” আমি বললাম—“ওদিকে গেছে—একুনি আসবে।”

—“ওঃ, তুমি বুঝি নতুন এসেছ? এখানে কোথায় থাকো? আত্মীয়-স্বজন?”

আমি যথাযথ উত্তর দিলাম।

—“পড়তে এসেছ নিশ্চয়?—কী পড়ো?”

এবার একটু আশ্চর্য লাগল। ইংরেজরা তো ‘গায়ে-প’ড়ে’ আলাপ করে না ব’লেই শুনেছি। ইনি যেন আমাদের দেশেরই একজন। মনে পড়ে, ছুটি ফুরুলে কলকাতায় যাবার পথে ষ্টীমারে ইন্টারে যে কয়জন মহিলা থাকতেন—বুঝা থেকে যুবতী পর্য্যন্ত—সবাই বড়জোর মিনিট-দুই নীরবে আমাদের দেখে নিয়ে, সেই যে প্রাশ্নের পর প্রাশ্ন ক’রে যেতেন—“কি করো বাছা? যাবে কোথা? এত বয়েস পর্য্যন্ত বাপ-মা বয়ে না দিয়ে রয়েছে কেমন ক’রে গো—তোমরা কি কলকাতার স্কুলের মাস্টারগী নাকি?”—সমাপ্তিহীন জিজ্ঞাসাবাদ থামত শুধু তখন, যখন আমরা স্থানাভাব সত্ত্বেও বাইরে থার্ডক্লাসে ডেক্-এ এসে দাঁড়াতে বাধ্য হতাম এমনি এক-আধবার নয়। ঠুঁদের না আছে এতটুকু সংকোচ, না জিজ্ঞাসিতের বিরক্তির ভয়। ঘণ্টা-কয়েকের জলযাত্রা বা ট্রেনযাত্রার পরেই যে-যার পথে চ’লে যাবে, এ-জীবনে কারোর সঙ্গে কারোর আর দেখাই হবে না, এত-শত মনে রাখে কে?—এত অন্তরঙ্গ হ’য়ে এমনসব ঘরের ও ভিতরের কথা জানতে আগ্রহ দেখানো—যেন ওই জানাটুকুর উপরে তাঁদের কত-কী-ই নির্ভর করছে। উত্তর না দিয়ে মুখ ফিরিয়ে ব’সে দেখেছি—তাতেও রাগ : অহংকারী মনে করেন। উত্তর দিলে আরো মুক্তি—কত যে অযাচিত উপদেশ শুনতে হয়, সেসব এখানে না বলাই ভালো।

• আমাকে নীরব দেখে মহিলাটি একটু থেমে বললেন—“কিছু মনে কোরো না মা, আমার একটু বাচাল স্বভাব—তা ছাড়া সেকেলে বুড়োমানুষ, দেখছ তো—তোনাদের বয়সী ছেলেমেয়েদের সঙ্গে অত আদব-কায়দা মেনে চলতে পারি না।” আমি বড় লজ্জা পেলাম : থর্সে'দ ও তার বন্ধু ফিরে আসতে আসতে বৃদ্ধার সঙ্গে আমার আলাপ বেশ সহজ হ'য়ে এল। সেক্রেটারি এতক্ষণ ওদিকে ব্যস্ত ছিলেন, এবার কাছে এসে বললেন—“মিস টমাস, আপনাকে টিউব স্টেশনে পৌঁছে দেব ?”

—“ধন্যবাদ মিঃ পাল, আমি একাই যেতে পারব। এতক্ষণ চ'লেও যেতাম, কেবল ভিড় কমবার আশায় এদিকে একটু দাঁড়াতে এসে এই বন্ধুটির সঙ্গে আলাপে কখন যে সময় কেটে গেল !”

সেক্রেটারির কাছে আমরা মিস টমাসের পরিচয় পেলাম—ইউনিয়নের অনেক দিনের মেম্বর, প্রায়ই না কি এখানে আসেন। ভারতীয় ছেলে-মেয়েরা গুঁকে খুব ভালোবাসে, তিনিও ওদের জন্যে যথাসাধ্য করেন। এর পরে আরো কয়েকবার এখানে এসেছি এবং প্রায় প্রতিবারেই গুঁর সঙ্গে দেখা হয়েছে। এমন মিষ্ট স্বচ্ছ স্নেহশীল স্বভাবের মানুষ আমি কমই দেখেছি। অল্পদিনেই আমরা পরস্পরের প্রতি বিশেষ আকৃষ্ট হ'য়ে পড়লাম।

একদিন কথায় কথায় বললাম—“আমি শীঘ্রই বোর্ডিং থেকে অগ্রত্ৰ চ'লে যাচ্ছি। থর্সে'দের ভিয়েনায় পড়তে যাওয়া ঠিক—আমি আর একলা বোর্ডিঙে থাকতে চাই না।” মিস টমাস জিজ্ঞাসা করলেন—“কিন্তু কোথায় যাবে, তা ঠিক করেছ কি ? হাজার হোক এটা চেনা জায়গা এবং নিরাপদে আছে, —নতুন জায়গায় অসুবিধা হবে না ?”

—“আমি এবার কোনো ইংরেজ পরিবারে গিয়ে থাকতে চাই ; বাবারও তাই ইচ্ছে । আপনার জানা-শোনা সে-রকম কেউ আছেন কি ?”

মিস টমাস একটু ভেবে বললেন—“ঠিক সে-রকম আর আছে বলি কী ক’রে ? তোমরা ভদ্রঘরের মেয়ে, যে-সে বাড়িতে তো আর পাঠানো যায় না না । আবার এদিকে এদেরও বর্ণবিদ্বেষ যথেষ্ট—সহজে কি ঘরে নিতে বিদেশীকে চায় ? নেহাৎ দারিদ্র্যের জন্তে বা সে-রকম কোনো দায়ে ঠেকেই পেয়িং গেস্ট রাখে ।” শুনে ভারি হতাশ হলাম ।

মিস টমাসকে ও-কথা বলবার দিন পাঁচ-ছয় পরে টেলিফোনে আমার তলব পড়ল । টেলিফোনে তিনিই আমাকে ডাকছেন—সামনের শনিবার অবশ্য তাঁর ওখানে চা-এ যেতে ।

হ্যাম্পষ্টেডে তাঁর বাড়ি । চা-পানাস্তে নির্জন ড্রইংরুমটিতে এসে আঙুনে আরো কয়েক টুকরো শুকনো কাঠ ফেলে দিয়ে আমাকে ডেকে তিনি সোফায় নিজের পাশে বসালেন এবং অনেকক্ষণ একথা-সেকথার পর বললেন—“যুথি, তুমি যদি ইচ্ছা করো আমার এখানেই থাকতে পারো ।” আমি এতটা আশা করিনি, খুসি হ’য়ে বললাম—“এ যে আশাতীত সৌভাগ্য মিস টমাস, আপনি আমার উপর বড় সদয় ।”

—“না যুথি, ইঠাৎ কিছু ঠিক ক’রে ফেলো না । আগে সব শোনো । আমার এখানে লোকজন বেশি নেই—দেখতেই পাচ্ছ । থাকবার মধ্যে আমি আর আমার ছোট বোন । মেড সকালে আসে,—শুধো—সন্ধ্যায় চলে যায়, মালীর বাড়িও কাছেই । তুমি ছেলেমানুষ, এত নির্জনতা হয়ত ভালো লাগবে না—আমি বেশির ভাগ সময়ই বাইরে থাকি কি না ।”

একটু থেমে, আমি কিছু বৃণবার আগেই—“শুধু এ-ই নয়। আসল কথা বে জন্ম বাড়িতে লোকজন রাখতে পারি না, এমন কি চাকরাণিও নয়—কেউ থাকতেও চায় না, দুদিনেই চ’লে যায়”—ব’লে আগুনটা উষ্ণিয়ে দিয়ে একটু নড়ে চড়ে বসলেন।

—“সব খুলেই বলি তোমাকে”—ব’লেই হঠাৎ আবার কি ভাবতে লাগলেন।

আমি শুধু উৎসুকনেত্রে চেয়ে রইলাম—মনে মনে আশ্চর্য্য হ’য়ে ভাবি: কী এমন কথা থাকতে পারে যা বলতে মিস টমাসের এত সংকোচ বোধ হচ্ছে—স্নেহমণ্ডিত সদা হাসি মুখখানি এমন বিষন্ন দেখায়! বড় কৌতূহল হ’তে লাগল। তবু তাঁকে ইতস্তত করতে দেখে বললাম—“আমাকে না বললেই নয় কি?”

—“না যুথি, বলাই ভালো। আমার বাড়িতে থাকাই যদি ঠিক হয়, আমার ইচ্ছে তুমি সব জেনে-শুনে তবে এসো। কথাটি এই—আমার বোন—সুস্থ নয়। ঠিক পাগলও বলা চলে না—অথচ, অর্থাৎ—সহজ অবস্থাও নয়। বেশি কি আর বলব না, তুমি স্বচক্ষেই সব দেখবে। কেবল এই অনুরোধ, সে যদি কখনো অভদ্রতা করে বা কোনো কঠিন কথা বলে, তাকে ক্ষমা কোরো—এর বেশি উপদ্রব সে আজকাল বড়-একটা করে না।”

—“ও, এই! এ আর বেশি কথা কি? আমার ও-রকম লোক দেখা অভ্যেস আছে, একটি আত্মীয় ছেলেবেলা হ’তে আধ-পাগল—”

—“এ ঠিক সে-রকম নয়, যুথি। তবু তোমাকে জানিয়ে রাখলাম। আমি—কেন জানি না, তোমার প্রতি ভারি একটা আকর্ষণ অনুভব করি, তাই এই বাধা সত্ত্বেও তোমাকে এখানে থাকতে বলছি—জানি না ভালো করছি কি না। তোমাকে দেখে মনে হয়—নিতান্ত অনভিজ্ঞ...

অপরিত্ত লোকের বাড়িতে পাঠাতে ভয় করে—নিঃসন্তান নারীর আসক্তি! বুঝে ফমা কোরো মা।”

—“ছি, ছি, মিস টমাস, আপনি এ সব কি বলছেন বলুন দেখি? আপনার মত এমন স্নেহময়ীর আশ্রয় পাব, এ কি আমি কখনো কল্পনাও করেছিলাম? বাড়িতে লিখে দিলে কত খুসি হবেন সবাই—দাদাকেও আমি কালকেই জানাচ্ছি সব।—আর, আপনার বোনের কথা—দেশে বৃহৎ একাদলবর্গী পরিবারে আমাদের কত রকম লোকের সঙ্গে কত যে গোলমালের ভিতর থাকতে হয়, সে আপনি জানেন না বলেই অত ভাবছেন। সাংসারিক অভিজ্ঞতা আমার কম তো বটেই,—সেজন্তেও আপনার বাড়িতে স্থান পেলে নিশ্চিন্ত হব।”

—“বেশ মা, তবে তা-ই থেকে দেখ দিনকতক। কোন বাধ্যবাধকতা নেই, ভালো না লাগলেই চ’লে যেতে পারবে।”

সপ্তাহান্তে নতুন বাড়িতে উঠে এলাম। মিস টমাসের কটেজটি বড় সুন্দর, ট্রাম লাইনের থেকে দূরে—একেবারে “হীথে”র ( Hampsted Heath ) কাছেই। সে পল্লীতে সবই প্রায় একই ধরণের বাড়ি—সামনে পিছনে বাগান। যেমন নির্জন তেমনি মনোরম। সহরের গঙ্গাগোল থেকে এসে মনটা স্নিগ্ধ শান্তিতে ভরে যায়। এখান থেকে কলেজে যাতায়াতে কিছু বেশি সময় লাগলেও, অপর সব রকমে এত সুবিধে যে, আমি মিস টমাসের কাছে বড়ই কৃতজ্ঞ বোধ করতে লাগলাম। এই বিদেশিনী মহিলার মায়ের মত সদাসজাগ স্নেহে পরের বাড়ি ছদ্মিই আমার আপন গৃহতুল্য প্রিয় হ’য়ে উঠল।

আশ্চর্য্য এই যে, ঝাঁর ভয়ে এ-বাড়িতে লোকজন থাকে না, আমি এসে কিছুদিন তাঁর কোনো উদ্দেশ্যই পেলাম না। মিস টমাসকে জিজ্ঞাসা করতে



নাথে, কারণ এ-বিষয়ে তাঁর সংকোচ কত, তা প্রথম দিনই সেই প্রসঙ্গে বুঝেছি। তার পরে তাঁর নীরবতা থেকেও। চাকর-বাকরকে প্রশ্ন করা তো চলেই না।

যাহোক্‌ ক্রমে আমার ভয় কেটে গেল। মাঝে মাঝে কৌতূহল হ'ত, তা-ও প্রায় নিভস্ত।

এমন সময় একদিন খুব ভোরেই উঠতে হ'ল। ভাইনে ঘ্রানের ঘরের দিকে যেতে দেখি, কে একজন পাশ কাটিয়ে দেয়াল ঘেঁষে দাঁড়িয়ে। ভয় পেলাম একটু : “কে ওখানে ?”

“কোনো উত্তর, নেই। সেখানে তখনও রীতিমত অন্ধকার—ফিরে সিঁড়ির কাছে গিয়ে আলোটা জালিয়ে দিলাম। দেখি—মিস টমাসেরই যেন একখানি দ্বিতীয় সংস্করণ। আমার মুখের দিকে একটুখানি তাকিয়ে হঠাৎ কেমন-যেন হেসে বললেন—“গুড্‌ মর্নিং !”

—“গুড্‌ মর্নিং” ব'লে আমি ফিরবার উপক্রম করতেই খুব কাছে এসে বললেন—“তোমার নাম কি, মেয়ে ?”

বললাম। তার পর সেই যে প্রাপ্ত-বর্ষণ শুরু হ'ল—একটার পর একটা—সে আর থামেই না। অবশেষে কাতর হ'য়ে ভাবলাম, ইনি বোধ হয় আমাকে যেতেই দেবেন না—অথচ... চ'লে গেলেও যদি রাগ করেন ! ঠিক কী ধরণের ব্যবহার করলে বা কী বললে যে খুশি হবেন তাও তো ঠাউরে পাওয়া দায় ! ভয়ে ভয়ে তাই কেবল যথাসম্ভব সত্য উত্তরই দিতে লাগলাম। কিন্তু ঠুর আর নড়বার নাম নেই—পথ আগ'লে দাঁড়িয়ে এক একটা কথা জিজ্ঞাসা করেন আর মুখের দিকে তাকিয়ে অসংকোচে হাসেন। হঠাৎ বললেন—“কে বললে তুমি বাঙালি ? মিছে কথা, তুমি জাপান থেকে এসেছ—জাপানী মেয়ে !”

—“না মিস. সত্যি কথাই বলেছি •

—“সত্যি কথা ? কক্ষনো না—আমি বলছি তোমাকে—তুমি জাপ, নিশ্চয় জাপানী মেয়ে—”

ভালো বিপদেই পড়া গেছে ! কুড়ি বছর পরে আজ হঠাৎ এক কথায় প্রমাণ হ'য়ে গেল নিজেকে যা ব'লে জানতুম তা অগাগোড়া ভুল ! কী করি এখন এ'কে নিয়ে ? উদ্ধারের কোনো পথ আছে কি না ভাবছি, এমন সময় মিস টমাস পাশেরই শোবার ঘর থেকে বেরিয়ে এসে বললেন, “রিণা, মেয়েটিকে যেতে দাও,—ওর ক্লাস আছে আজ খুব সকালেই।”

—“ওঃ ডোরা, ডোরা, দেখ কী আশ্চর্য্য—একেবারে জাপানী মেয়ে, তেমনি চোখের কোণ, তেমনি ভুরু—হানলে অবিকল জাপ। এ নীল গাউনটাও তো জাপানী।—তবু বলবে তুমি বাঙালী ?”

কী গ্রহবৈগুণ্যে জানি না—ঠিক সেইদিনই একটা ‘কিমোনো’ প'রে উঠেছিলাম। মিস টমাস চোখ টিপে আমায় ইসারা করলেন। হেসে বললাম, “বেশ তো মিস টমাস আমি জাপানী হ'লেই যদি আপনি খুসি হন, না হয় আমি তা-ই।”

—“তাই-ই তো—আমাকে ফাঁকি দিতে পারো কখনো ? মাহুষ চিনি না আমি ? কিন্তু কী নাম বললে তোমার—নাঃ, ও-তো ঠিক নাম নয়—ডোরা, এর নাম বেবি—হ্যাঁ—বেবি-ই তো, নিশ্চয় বেবি।”

—“আচ্ছা, তুমি ওকে না হয় ‘বেবি’ ব'লেই ডেকো, রিণি। লক্ষ্মী বোন, এখন ওকে যেতে দাও, আছেই তো বাড়িতে, কত দেখবে রোজই।” মিস টমাস সন্নেহে বোনের হাত ধ'রে টেনে নিয়ে গেলেন।

এই আমাদের প্রথম সাক্ষাৎ ও আলাপ। তার পর থেকে রিণাকে যখন-তখন দেখি। বাড়ির একেবারে উপরের তলায়—চিলেকোঠার মতন একটা

ছোট্ট ঘরে থাকেন তিনি। সেখানে কারো যাবার উপায় নেই, সোকজনের ছায়াও তিনি মাড়াতে পারেন না যে। খুব ভোরে উঠে দোতলায় নিজের বিশেষ দরকারি কাজগুলো সেরে এক পেয়ালা কফি হাতে সেই যে উপরে চ'লে যান, তার পর সেখানেই সারাদিন থাকেন—সেখানেই খাওয়া শোওয়া স—ব। সন্ধ্যার সময় কোথাও কেউ না থাকলে আবার একবার নেমে আসেন। বাড়ীতে অতিথি অভ্যাগত এলে রিণা সেই অত উপরেও জান্না দরজা বন্ধ ক'রে ব'সে থাকেন—জনতায় তাঁর এতই বিরাগ। অথচ আশ্চর্য্য এই যে সেদিন থেকে আমাকে কি ব'লে কাছে কাছে রাখবেন, কি দিয়ে খুসি করবেন, এই হ'ল গুর সারাক্ষণের ভাবনা। আমি কোথাও বেড়াতে যাব বললে গুর চোখে নেমে আসে এক ভীক্ৰ ব্যাকুল দৃষ্টি—নানা রকমে বাধা দিয়ে বাড়িতে ধ'রে রাখতে চেষ্টা করেন। আমি তো এ রকম অদ্ভুত ব্যবহারের কোনো কারণই খুঁজে পাই নে।

মিস টমাস ভয় করেছিলেন পাগলের বিদ্রোহকে—কিন্তু তার অমূহুরক্তিও যে কী ভীষণ হ'তে পারে তা বোধ হয় তিনিও জানতেন না। ক্রমে আমার অবস্থা এমন হ'ল যে বাড়ি ফিরতে ভয়-ভয় করে। সন্ধ্যার সময় কলেজ হ'তে ফিরে অতি সন্তর্পণে চাবিটি লাগিয়ে ততোধিক সন্তর্পণে দরজাটি খুলি—তবু, যেন হাওয়ায় খবর পেয়ে রিণা এসে ধরে জড়িয়ে : “বেবি, বাচ্চা—মণি আমার”—আদরে আদরে আমাকে উদ্ভ্রান্ত ক'রে দিয়ে ছাতা, কোটি, ব্যাগভুল টেনে নিয়ে যাবে বসবার ঘরে।

সেখানেও পরিচর্য্যার কী ঘটনা! থাবারের সে কী আয়োজন! থেতে থেতে এবং গুর আদেশমত একবার শরীরের এদিক, আবার ওদিক আগুনের তাপে শুকোতে শুকোতে চোখে আমার জল আসে—মনঃকোভে

কেবলই মনে হয়, মিস টমাস এই পাগলের হাতে এমন ক'রে আমায় সঁপে দিয়ে কেন যে এত বাইরে বাইরে ঘোরেন—!

খাওয়ার পরেও ছুটি নেই; তার পর সেখানেই গ্নগনে আগুনের ধারে সোফাটার ওপর শুয়ে থাকতে হবে—গায়ে একটা গরম কসল চাপা দিয়ে। হাতের কাছে আরো বা গরম কাপড়-চোপড় পাওয়া যায়, রিণা সে সমস্তই আমার পায়ের উপর বিছিয়ে ভালো ক'রে ঢেকে ঢেকে দেয়। কোনো বই পড়বার জো কি?—সারাদিনই তো পড়েছি—অতএব এখন থেকেই হয় ঘুমোতে হবে, নয়ত চুপ ক'রে শুয়ে ওর গল্প শুনতেই হবে।—অত আগুনের তাপে সেই গরমেও একটা মোটা কসল জড়িয়ে শোওয়া, সেই ভয়ে ভয়ে জোর ক'রে খাওয়া, অনেক রাত পর্যন্ত একটি বিকৃত-মস্তিষ্ক লোকের অনিমেঘ মেহ-ক্ষুধিত দৃষ্টির সামনে একলাটি থাকা—সেঁ সব মনে হ'লে আজও আমার মন অস্থিত কালো হ'য়ে ওঠে।

কিন্তু উপায় নেই। রিণা কোনো আপত্তিই কানে তোলে না। মিস টমাসও ওকে রীতিমত ভয় ক'রে চলেন। রাত্রে বাড়ি ফিরলে তাঁর অনেকদিনকার অভ্যস্ত ও প্রিয় এক পেয়ালা চা-এর পরিবর্তে রিণা যখন-তখন আপন খেয়াল মত কফি এনে দিলে যতই অরুচি হোক, ফেলবার উপায় নেই। কেউ বিরুদ্ধে কিছু করলে বা বললেই রিণার পাগলামি বেড়ে যায়। এতটুকু আপত্তির সূত্রপাতে এমন ভয়ঙ্কর রাগারাগি করে যে সে এক কুরুক্ষেত্র!

মাস তিনেক থাকবার পরে মনটা এমন বিদ্রোহী হ'য়ে উঠল যে, ইচ্ছে করতে লাগল যত শীগ্গির পারি এখান থেকে চ'লে যাই। এমন সুবিধামত বাড়ি আর কোথাও পাব না বটে, কিন্তু সুখের চাইতে আমার সোয়াস্তিই ভালো। সমস্ত কথাটা প্রাণ ধ'রে মিস টমাসকে বলতে পারি কই?

হুঁতমধ্যে হঠাৎ ঠাণ্ডা লেগে আমার হ'ল অল্প জ্বর। আর যাবে কোথায়?—রিণার যত্ন ও আদর রোগের যত্নপার চেয়েও আমাদের বেশি অতিষ্ঠ ক'রে তুলল। মনে মনে ভাবলাম—আর নয়, এবার যেমন ক'রে হোক মিস টমাসকে বলতেই হবে।

সেরে উঠে আমি জান করতে চাইলাম। কথাটা রিণার কানে যেতেই সে ব'লে দিল যে জানের সব বন্দোবস্ত সে-ই ক'রে রাখবে এবং ঠিক সময়ে আমায় ডাকবে। মিস টমাস বারবার সাবধান ক'রে দিলেন যেন জ্বল খুব গরম থাকে।

—“সে তুমি নিশ্চিত থাকো, ডোরা—আমি ‘বাথ’ও ঠিক করতে পারি না নাকি?”

যথাসময়ে আমার ডাক পড়ল—“বেবি, জানের জল তৈয়ার, চট্ট ক'রে এসো।”—তৈয়ারই বটে। গরম জলের ধোঁয়ায় জানুলা দরজার কাচ ঝাপসা, চোখে কিছুই দেখা যায় না। আমি ঘরে ঢুকতেই রিণা দরজাটি বন্ধ ক'রে দিয়েছে পাছে একটুও হাওয়া ঢুকে জল ঠাণ্ডা হ'য়ে যায়, এবং বাইরে থেকে ঘন ঘন তাগিদ দিচ্ছে—“শীগ'গির জলে নেমে পড়ো, আর দেরি না।”—দেরি করলাম না।

মনে এক এক সময় ভাবি অহুতাপ হয় যে আমি বড় অকৃতজ্ঞ : একটু আধটু পাগলামীর অপরাধে এত আদর যত্নেও বিরক্ত হই। কতবার প্রতিজ্ঞা করি—হাসিমুখে সব সহ্য করব। কিন্তু আজ ‘বাথে’ নেমে আমার ধৈর্য্যচ্যুতি হ'ল। টবের অর্ধেকটা সাবান-জলে ভর্তি, যেমন কাপড় কাচবার জন্তে তৈরি ক'রে রাখলে হয়। গন্ধে বুঝলাম—লাজ রিণা একদিন কথায় কথায় বলেছিল যে ও নিজে অমনি ক'রে জান করতে খুব ভালোবাসে। সে কথা আমার মনেই ছিল না। আদর্শ টয়লেট সোপই

কম ব্যবহার করি, তার ওপর এই সাবান ! আগে দুঃখে চোখে জল এল ।  
— সেখান থেকেই মিস টমাসকে একটা হাঁক দিয়েই জল থেকে উঠে পড়লাম ।

তিনি তাড়াতাড়ি দরজার কাছে এসে বললেন, “ব্যাপার কী যুথি ?”  
আমি দোর খুলে নীরবে টবটা দেখালাম । তিনি গরম কাপড় দিয়ে  
ঢেকে তাড়াতাড়ি আমাকে নিজের ঘরে নিয়ে গেলেন এবং গা-হাত মুছিয়ে  
বিছানায় শুইয়ে দিয়ে পাশে বসে বললেন—“রিণার অত্যাচার যে এই  
মুখে মোড় নেবে তা আমি তোমায় এখানে আসতে বলার সময় কল্পনাও  
করিনি । ভেবেছিলাম সকলের সঙ্গে যেমন করে, তোমার সঙ্গেও তেমনি  
করবে বুঝি—অর্থাৎ দৈবাৎ দেখা হ’য়ে গেলে মুখ ফিরিয়ে চলে যাবো, গালিগালাজ করা, কখনো একটুখানি গোলমাল কানে এলেই বাড়ি থেকে  
দূর হ’য়ে যেতে বলা—এতদিন এই রকমই ও ক’রে এসেছে । আগে ও  
নাশিং হোমে ছিল । কিন্তু সব সময় এত বিষন্ন হ’য়ে থাকত যে দেখা করতে  
গেলে আমার ভারি কষ্ট হ’ত । পারৎপক্ষে এটুকু স্বাধীনতাও হরণ  
ক’রে জীবনের ওর শেষ আনন্দটুকু রুদ্ধ ক’রে দিতে আমার ইচ্ছে করে না,  
তাই বাড়িতেই রাখি ওকে । কী যে করি ওকে নিয়ে !”

শুনে আমার বড় দুঃখ হ’ল । মিস টমাসের হাতখানি হাতে নিয়ে  
আদর ক’রে বললাম—“আমারই অন্ডায় হয়েছে এমন অসহিষ্ণু হ’য়ে  
ওঠা ; সাবানজলে বড় গা-কেমন করে, তাই হঠাৎ—”

—“না, না, যুথি, তোমার কোনো দোষ নেই । নিজেই আমি ভুক্ত-  
ভোগী, দেখতেই তো পাও । তোমার ওপর অত্যাচার বে লক্ষ্য করি নি  
তা-ও নয় । কেবল—ভেবেছিলাম—খুব বেশি যদি বিরক্ত না করে তোমায়,  
তবে ক’দিন এতে একটু আনন্দ পায় তো—” বলে দীর্ঘনিশ্বাস ফেলে জ্বিনি  
চুপ করলেন ।

আমার হঠাৎ কি মনে হ'ল, জিজ্ঞাসা করলাম—“আচ্ছা, রিণা কি চিরকালই এই রকম ? জন্ম থেকেই ?”

মিস টমাস একটু চমকে উঠে উত্তর করলেন—“সেই কথাই আজ তোমাকে বলব কি না ভাবছি। বললে হয়ত অনেক কিছুই বুঝতে পারবে। কিন্তু শুনতে চাও কি না সে-সব—”

—“বলুন না, অবশ্য যদি বলতে আপনার খুব কষ্ট না হয়—”

—“কষ্ট বা হবার তা হ'য়েই গেছে, মা।—কিন্তু একটু অপেক্ষা করো, আমি রিণাকে ব'লে আসি তুমি শুয়ে পড়েছ আমার ঘরে—নইলে আবার গোলমাল করতে আসবে।” মিস টমাস উঠে গেলেন। আমি শুয়ে শুয়ে আকাশপাতাল ভাবতে লাগলাম না জানি কি রহস্য প্রচ্ছন্ন আছে ওই অভাগিনী নারীর জীবনে !

একটু পরেই তিনি ফিরে এসে একখানা ইঞ্জিচোর টেনে নিয়ে আমার খুব কাছে বসলেন এবং ধীরে ধীরে বলতে লাগলেন—“তুমি আমার মেয়ের মত। সময়ের মাপে পরিচয় আমাদের বেশি দিনের নয় ; কিন্তু অন্তরের পরিচয়ে আমরা পরস্পরের অন্তান্ত নিকট, অতি ঘনিষ্ঠ হ'য়ে গিয়েছি, নয় কি যুথি ?” আমি নীরবে তাঁর হাতখানি কোলে টেনে নিলাম।—

মিস টমাস বললেন—“সে জন্তেই আজ তোমার কাছে এ কথা বলতে পারছি। যদিও জানি সংসারের সঙ্গে তোমার এখনও সত্যিকার কোনো পরিচয়ই হয়নি, তবু অপরের জীবনের জটিলতাকে কোনো দরদী প্রাণই খুব কঠোরভাবে বিচার করে না,—জীবন-যুদ্ধে শতবার ক্ষতবিক্ষত হ'য়েও এ বিশ্বাস আমার আজও অটুট আছে। যাবু—প্রথমেই শোনো আমার পুরো ইংরেজ নই। আমার বাবা ছিলেন ইংরেজ, মা—সুইস্‌ মেয়ে—”

## অকারণ

আমি ব'লে উঠলাম—“ও, তাই—”

—“কী তাই?”

—“বলতে গিয়েছিলাম, তাই আপনার স্বভাব ঠিক ইংরেজদের মতন নয়—এই আর কি।”

—“তার মানে?”

—“ইংরেজরা সাধারণত একটু চাপা নয় কি? সহজে, বা যাকে বলে ‘গায়ে-প’ড়ে’, কারো সঙ্গে আপাত অথবা বন্ধুতা করতে পারে না—অন্তত আমি তো দেখিনি আজ অব্ধি। বিশেষত ভারতীয়দের সঙ্গে ওদের এত শীগ্গির এতখানি বনিষ্ঠতা হয় না। তাছাড়া আরও দু-একটি কারণ আছে, সেসব আপনাকে এখন না-ই বা বললুম—আপনি কি বলছিলেন বলুন তার চেয়ে।”

তিনি হেসে বললেন—“আচ্ছা, তোমার অন্ত কারণগুলো আর ঐকদিন শুনব।—কি বলছিলাম—হাঁ, আমার মা ছিলেন সুইন্স মেয়ে। এ দেশে বেড়াতে এসেছিলেন। কিছু দিন কোনো ইংরেজ-পরিবারে থেকে ইংরিজি ভাষাটি ভালোমতে আয়ত্ত ক’রে স্বদেশে ফিরে ছোট ছোট ছেলেমেয়েদের ইংরিজি শেখাবেন, এই ছিল তাঁর ইচ্ছা। আমার দাদামশায়ের অবস্থা মন্দ ছিল না। মেয়ের এই খেয়াল তাঁর ভালো লাগেনি, তবু বাধাও তিনি দেননি। যাক সেসব কথা, পারিবারিক ইতিহাস দীর্ঘ ক’রে তোমাকে অতিষ্ঠ ক’রে তুলব না। সংক্ষেপে—মা’র রোমান্সের সঙ্গে প্রথম মুখোমুখি হয় এ দেশেই। তিনি ছিলেন ভারি সুন্দরী। আমার পিতৃ-বংশ নামজাদ অভিজাত, অতি গম্ভীর লোক। ঠাকুরদা কিছুতেই এ বিয়েতে মত দিলেন না—হাজার সুন্দরী হোক, কৃষকের মেয়ে, এই ছিল তাঁর আপত্তির মূল কারণ। কুলগৌরব অক্ষুণ্ণ রাখবার জন্তে কৃষক মেয়েকে অভিজাত



কুলতিলকের চোখের আঁড়ালে রাখবার যথেষ্ট চেষ্টা করা হয়। কিন্তু—  
নিয়তি : বাবা লুকিয়ে বিয়ে করলেন মাকে।”

মিস টমাস মূহু সুরে ব'লে চললেন : “এত অমত সম্বন্ধেও বিয়ে  
করায়, যতদিন বাবা বেঁচেছিলেন ঠাকুরদা আর কখনো তাঁর  
নামও নেননি। তাঁরই ছেলে—chip of the old block  
তো—বাবাও বাড়ির লোকের সঙ্গে সমস্ত সম্পর্ক ত্যাগ করলেন :  
পৈতৃক নামটি পর্য্যন্ত ছেড়ে দিলেন। মার কাছে শুনেছি বিয়ের পরে  
তাঁদের বড় কষ্টে দিন গুজরান হ'ত। কিছুদিন পরেই সামান্য অসুখে  
বাবা হঠাৎ মারা যান। অমৃতপ্ত ঠাকুরদা মাকে তখন থেকে নিজের  
কাছে নিয়ে যেতে অনেক চেষ্টা করেন, কিন্তু শত অমুরোধেও মাকে রাজি  
করানো গেল না। আমার ঠাকুরদার নাম বললে চিনতেও পারো, তাঁর  
অনেক দান-ধ্যান আছে।”

“আমরা ভাই-বোনে তিনটি, আমিই বড় ; মাঝের ভাইটি টাইফয়েডে  
শৈশবেই মারা যায়। ফলে, আইরিশ হ'য়ে উঠল মার নয়নের মণি।  
ছেলেবেলায় সে যে কাঁ সুন্দর ছিল এখন আর বুঝবার জো নেই—”

—“কেন, এখনই কম কি ? এই তো অবস্থা, বয়সও এত—তবু—”

—“হাঁ—কিন্তু তখনকার চেহারার সঙ্গে কি কোনো তুলনা হয় ওর ?—  
সুগন্ধী রেশমের ম'ত নরম চুলের রাশ, মখমলের ম'ত স্বক, গোলাপের  
পাপড়ির ম'ত পাতলা রাঙা ঠোঁট দুখানি, লীলায়িত তলু দেহখানি—  
সবার ওপর ওর চোখ দুটি, সে যে কী ছিল সুখি, তোমায় কী ক'রে  
বোঝাব বলা ? ওর সেই অদ্ভুত শাস্ত্র কোমল চাহনি আজও ঝিকমিকিয়ে  
ওঠে কখনো কখনো—ওর চোখ দুটির দিকে চেয়ে। সেই আইরিশ আর  
এই ? সকালবেলার স্বচ্ছ স্বয়ং-সোণালি আকাশ—অমর কালো জলে তার

ছায়া ?” মিস টমাস চোখ মুঁছলেন।—“কিছু মনে কোরো না, মা। এখন স্মৃতি নিয়েই বেঁচে থাকা ছাড়া আর কী বলা ? এখনও সে-সব দিনের কথা মনে হ’লে—” একটু থেমে আত্মসংবরণ ক’রে—“যাক আইরিণের চোখের উল্লেখ একটি কথা মনে পড়ল। ছেলেবেলা থেকে ও-ধরণের অকারণ বিষাদ-কোমল দৃষ্টি বাদের, প্রায়ই দেখেছি পরবর্তী জীবনে তারা কোনো-না-কোনো স্তরে বিশেষ আঘাত পায়, যা তাদের চির-দুঃখের হেতু হয়। যেন ওরা জন্ম থেকেই জেনে এসেছে—এ-সংসারে ওদের বাথা পাওয়াই হবে সার এবং সেই জ্ঞানের অঞ্জনেই যেন চোখ দুটি তাদের নিত্য এত করুণ—ছায়াময় ! এমনি চোখ ছিল আমার আইরিণের, আর আবার বলছি, কিছু মনে কোরো না, মা—প্রথন সাক্ষাতে তোমারও চোখে এই ধরণের একটা বিষন্ন-কোমল ভাব দেখেই আমি অত আকৃষ্ট হই।”

—“তাই নাকি ?”—আমি একটু হেসে গুঁর একটি হাত নিজের হাতের মধ্যে টেনে নিলাম।

মিস টমাস বললেন : “যাক, যা বলছিলাম—কী বলছিলাম যেন ! —ও হ্যাঁ—আইরিণ আমার একমাত্র বোন, তাকে এক রকম কোলে-পিঠে ক’রেই মানুষ করেছি। বাবার মৃত্যুর পর মা’র মন একেবারে ভেঙে পড়ে। এ সময় ঠাকুরদা নানা কোণলে অর্থসাহায্য না করলে হয়ত দারিদ্র্য ও মনঃকষ্টে অচিরেই আমরা মাকেও হারাতাম। আজীবনের যে সচ্ছলতা থেকে বঞ্চিত হ’য়ে জীবিকা-উপার্জন-অনভ্যস্ত পিতা দুঃখে চিন্তায় উৎকর্ষায় অকালেই মারা যান, মা’র আমার কেমন জেদ হ’ল—সেই ধনসম্পদের এক কানাকড়িও নেবেন না। সম্ভান দুটির জন্তে অপ্রত্যাশিত বৈধব্যের প্রথম অবস্থায় বাধ্য হ’য়ে কিছু নিলেও তা যেন

দিনরাত তাঁকে শেল হ'য়ে বাঁজছিল। একটু স্থস্থির হ'য়েই সব সাহায্য প্রত্যাখ্যান ক'রে তিনি আপন ভার আপনিই নেবেন বললেন। কিন্তু নিঃসম্মল অনাথা, তার উপর শারীরিক শ্রম সয় না বেশি। কে তাঁকে চাকরি দেবে?

“অবশেষে—অনেক খোঁজাখুঁজির পর একটি ভদ্রপরিবারে ছোট শিশুদের দেখাশোনার কাজ পাওয়া গেল। তাতেও তিনজনের বেঁচে থাকার মত যথেষ্ট অর্থাগম না হওয়ায় আমাদের বাড়ির সবচেয়ে ভালো দুটি ঘর ভাড়া দিতে বাধ্য হলেন। এর পরে কিন্তু আর ঠাকুরদা আমাদের মুখ দেখলেন না। তাঁর অল্প পুত্রসন্তান কিম্বা আমাদেরও কোনো ভাই না থাকায় পৈতৃক সমস্ত সম্পত্তির উত্তরাধিকারী হয়েছিল তাঁরই কোন্ এক দৌহিত্র।

“দিনের বেলায় মা কাজে চ'লে যেতেন—আইরিগকে দেখাশুনা ও বাড়ি আগুলাবার ভার আনার ওপর দিয়ে। ভাড়াটেরা শুধু দুটি ঘর নিয়ে থাকত, পাওয়ারাদাওয়ার ব্যবস্থা তাদের নিজের হাতেই। এমনি স্থখে দুঃখে অনেক দিন কেটে গেল : আইরিগ হ'য়ে উঠল ১৬।১৭ বছরের তরুী মেয়ে। আমি তার বছর ছয়েকের বড়—প্রতিদিন ঘণ্টা হিসাবে এক রুপা মহিলার সহচরী ও প্রাইভেট সেক্রেটারির কাজ করি। আইরিগ প্রায়ই একলাই বাড়িতে থাকে।

“একদিন কি একটা কাজে কাছেই দোকানে ঘাবার জন্তে ফটক খুলে বাইরে আসতে দেখি একটি যুবক দরজার পিতলফলকের উপর আমাদের নাম পড়বার চেষ্টা করছে। আমি জিজ্ঞাসু ভাবে তাকাতাই বললে—  
‘মিসেস টমাসের—?’

“বললান, ‘এই বাড়িই। কি দরকার, আপনি কাকে চান?’

—‘আমি তাঁর আত্মীয়, বিশেষ কাজ আছে।’

—‘মা বাড়ি নেই, সন্ধ্যার আগে আসবেন না—আমাকে বলতে যদি আপত্তি না থাকে—’

—ও, আপনি তাঁর বড় মেয়ে ?

—‘হ্যাঁ।’

“পরিচয় পেলাম—ছেলেটি জন রবার্ট, আমাদের পিসতুতো ভাই, যে এখন ঠাকুরদার ধনসম্পত্তির একমাত্র উত্তরাধিকারী। বাড়িতে ওকে সবাই ‘জন’ ব’লে ডাকে। এমনি আলাপ-পরিচয়ের পর বললে—‘কিন্তু কাজের কথা তো আপনার মার সঙ্গে ছাড়া হ’তে পারবে না। আমি না হয় সন্ধ্যার পরে আবার আসব।’

“রাত্রে মার সঙ্গে জনের দেখা হ’ল। ঠাকুরদাই পাঠিয়েছেন। মার জীবিকা-অৰ্জনের ধারায় তিনি মগ্ন। বর্তমানে কঠিন রোগে শয্যাগত, দিন ফুরিয়ে এসেছে। জীবনে যে মন্ত ভুল করেছেন তার অন্তত খানিকটাও শোধরাবার অবসর কি তাঁকে দেওয়া উচিত নয়? মা না হয় তাঁর বংশমর্যাদার কথাটা না-ই ভাবলেন, কিন্তু তিনি কি তাঁর পৌত্রী ছুটিরও গ্রাসাচ্ছাদনের ব্যবস্থা করবার অধিকারী নন? ইত্যাদি। বয়সের গুণে মার ক্লান্তিও এসেছিল। ঠাকুরদার খেদের কথাগুলো মনে লাগল। তাছাড়া শোকের আঘাতে যে প্রচণ্ড অভিমান এসেছিল, সময়ের প্রলেপে শোক কমবার সঙ্গে সঙ্গে সে জেদ অভিমানও হয়ত একটু ফিকে হ’য়ে এসেছে। তিনি রাজি হলেন। ঠাকুরদা তাঁর ষোড়ার্জিত সম্পত্তির যে কতকাংশে দানবিক্রয়ের অধিকার ছিল, তারই কিছু এবং দুখানা বাড়ি আমাদের দু বোনকে সমানে ভাগ ক’রে দিলেন। একখানা বাড়ি এই, আর একখানা ভাড়া দেওয়া।

তাছাড়া, গ্রামেও এক বড় বাড়ি ও কিছু জমিজমা আছে—সেখানা ফার্ম-হাউস কুঁরে দীর্ঘ দিনের চুক্তিতে ভাড়া দিই।

“ঠাকুরদা মাকে বললেন শেষ কদিন যেন আমরা তাঁর সঙ্গে থাকি। তার পর তাঁর মৃত্যুর পর যে-খার জায়গায় যাবে চ’লে। মৃত্যুর আর দেহিও ছিল না বড়।

“মা বাড়িওয়ালাকে নোটিস দিলেন। আমাদের ভাড়াটেকেও অন্ত্র বাড়ি দেখতে বলা হ’ল।

“পুরোনো বাড়ি ছাড়বার দিনকতক আগে আইরিণের হঠাৎ বিশেষ পরিবর্তন লক্ষ্য করলাম। ওর সেই বালিকা-স্বলভ হাসিখুঁসি ভাব, সেই কথায় কথায় আদরে-আবদারে গ’লে-পড়া, যখন-তখন মাকে বোনকে অনর্গল যা তা ব’লে হাসানো—কোথায় যেন সব গেছে উবে। সে বিষম-মুখে কেমন অন্তত্ব ধীরভাবে চলাফেরা করে, আমাদের কাছে বড়-একটা আসে না—যতটা সম্ভব একা একাই থাকে। আমরা তখন বড় ব্যস্ত ছিলাম, ওর এই পরিবর্তন লক্ষ্য করলেও দুঃখনেই মনে করলাম এ শুধু পুরোনো বাড়ির উপর মমতা আর তার জন্তে মন-কেমন-করা ছাড়া অত কিছুই নয়।

“ভাড়াটে উঠে বাবার পর একদিন সন্ধ্যায় একটু কি দরকারে সেদিককার শোবার ঘরখানিতে ঢুকে দেখি, সে ঘরের আবছা আঁধারে টেবিলের উপর মুখটি গুঁজে আইরিণ একা ব’সে। দেখে বড় আশ্চর্য লাগল—এ সদাচঞ্চল হরিণ শিশুর এমন কী ভাবনা, এ-বাড়ির উপরও তার এত কিসের টান যে এমন সময়ে একলা ব’সে চিন্তায় যেন একেবারে উবে গেছে? কাছে গিয়ে ডাকলাম—‘রিণি!’

“আইরিণ ভীষণ চমকে উঠে একেবারে যেন শ্রুতধা ভেঙে পড়ল।

আমার মনটা অজানা ভয়ে ভ্রাসাড হ'য়ে গেল। একটু পরে দরজাটা বন্ধ ক'রে খুব কাছে এসে ওকে জড়িয়ে ধরলাম—‘কি হয়েছে বোন?’

“অনেক জিজ্ঞাসাবাদ, অনেক আদর আর অভয় দেওয়ার পর সে যা বলল—আঃ যুথি, আজও সেদিনটা আমার স্পষ্ট মনে আছে,—সে-ব্যথা, সে-সব অপমানের আগুন আজও এ-বুকে তেমনি যেন জ্বলছে—” বৃদ্ধার ঠোঁট দুটি থরথর ক'রে কেঁপে উঠে শীর্ণ কপোল বেয়ে দুটি শীর্ণ ধারা নামল।

আমি দুঃখিত হ'য়ে বললাম—“আর দরকার নেই এ-সব ব'লে—”

—“ক্ষমা করো, যুথি—কিন্তু ওঃ ভগবান, স্মৃতিতেও এখনো ঐত জালা! মনে হয় যেন সেদিনে ফিরে গিয়েছি,—যেন এই আজই ঘটেছে ব্যাপারটা!” একটু স্থির হ'য়ে আবার বলতে লাগলেন—“তোমার কাছে ব্যথার বোকা নামাজি, স্বার্থপর জরাজীর্ণার ‘দুঃখের কাহিনী’ ধৈর্য্য ধ'রে শুনছ, এই-ই বা আমি কোথায় কার কাছে পেয়েছি? যাক, শোনো—সংক্ষেপেই—আমাদের শেষ ভাড়াটে ছিল এক—এক জাপানী যুবক। তখনকার দিনে বিদেশী ভাড়াটে নেওয়া একটু দুঃসাহসের কথা ছিল। কিন্তু এই ছেলেটি সম্ভ্রান্তবংশীয়, ছাত্র, তারি সহৃদয়—মা ওকে বিশেষ জেনেছিলেনই ঘরে স্থান দিয়েছিলেন। কি পড়ছিল জিজ্ঞাসা করিনি, সে-ও নিজে থেকে কখনো বলেনি। শুধু এইটুকু জানতাম যে, মাঝে মাঝে সে ইংলণ্ডের নানা জায়গায় যুবে কলকারখানা, শিল্পবিদ্যা, শিক্ষাকেন্দ্র এই সব দেখে বেড়াত। ওর সম্বন্ধে আমাদের মনে কোনো সন্দেহ ছিল না। নিজের ঘরে আপন ভাবে থাকত, আমরা কখনও ওর কোন বিষয়ে হস্তক্ষেপ করতাম না—কিন্তু কবে থেকে যে আইরিশের ওকে এত—” মিস টমাস জোরে একটি নিশ্বাস ফেলে

বললেন—“ঐটুকু মেয়েও যে ভালোবাসতে পারে এবং এতই গভীর ভাবে—  
সে কি স্বপ্নেও ভেবেছিলাম? তখনকার দিনকাল, যুগি, অন্তরকম  
ছিল। এখন আমাদের মেয়েরা অতিমাত্রায় অকালপক।—কিন্তু এ-ই কি  
সব?—তাহ’লে আর কাঁদি কেন?—সেই শিশু-স্বভাব আইরিণ—যে  
তখনও স্কুলের মেয়েদের মত বেণী ঝুলিয়ে বেড়াত—”

আমি স্নেহে তাঁর অশ্রু মুছিয়ে দিয়ে বললাম—“আজ এ পর্য্যন্ত  
থাকুক, বাকিটা আর একদিন শুনব—”

—“আর বড় বেশি নেইও—মাকে সব বলবার পর তিনি কি-একরকম  
হ’য়ে গেলেন। বললেন—তাঁর দোষেই এতটা হ’তে পেরেছে। তিনি  
যদি ছেলেটিকে মাঝে মাঝে চা-এ না ডাকতেন, আইরিণের তো ওকে  
এত বনিষ্ঠভাবে জানবার সুযোগই হ’ত না। তিনি না-কি কতবার  
লক্ষ্য করেছেন যে, ও এগেই আইরিণের মুখ চোখ উঠত উজ্জল হ’য়ে।  
ছেলেটিও ওকে যথেষ্ট যত্ন করত, প্রায়ই নানা রকম জাপানী জিনিস  
উপহার দিত, বলত জাপানের গল্প। জানো তো—ওরা কি রকম ভদ্র—  
সুন্দরের প্রতি প্রীতি ওদের মজ্জায়! আইরিণের ওকে ভালো লাগায়  
আশ্চর্য্য হইনি, কিন্তু সে-ভালো-লাগায় যে কোনো বিশেষত্ব থাকতে  
পারে—একবারও মনে হয়নি।” মিস টমাস অনেকক্ষণ অল্পমনস্কভাবে  
চুপ ক’রে রইলেন।

একটু পরে সচেতন হ’য়ে বললেন, “মা কিছুতেই আর ঠাকুরদার বাড়ি  
যেতে চাইলেন না : শরীর খারাপের দোঁহাই দিয়ে আইরিণকে নিয়ে  
চ’লে গেলেন সুদূর ইটালিতে। আমি ঠাকুরদার কাছে রইলাম ; তিনি  
স্বপ্নে পেলেন এই ভেবে যে, মা বাবার মৃত্যু ক্ষমা করতে পারেননি  
ব’লেই ও-বাড়ি গেলেন না।

“প্রায় বছরখানেক ওরা ইটালিতে ছিল । সেখান হ’তে খুব সাধারণ কথাবার্তা ছাড়া চিঠিতে মা আর কিছুই লিখতেন না । ইতিমধ্যে আমার জীবনেও কত শ্রোতই বে এল গেল—! জন আমাকে বিয়ে করতে চাইলে । মৃত্যুর পূর্বে ঠাকুরদা মত দিয়ে গেলেন । কিন্তু আমি জনকে বললাম মা-র ফিরে আসা পর্যন্ত অপেক্ষা করতে । ভেবেছিলাম, চিরদুঃখিনী জননীকে অন্তত এই একটুখানি সুখ দিতে পারব । তখন কি জানতাম কী ঘোর অভিশপ্ত ছিল সমস্ত পরিবারটা ?

“বছর ঘুরলে মা ফিরলেন, সঙ্গে—এ কাকে নিয়ে ? এই কি সেই ননীর পুতলি, দুধের মেয়ে রিণা ?—মা-র দেহমন গেছে ভেঙে : সব শুনলাম । পাছে চিঠিপত্রে এ-সব লিখলে কোনো রকমে প্রকাশ হ’য়ে পড়ে, সেই ভয়ে লিখতে পারেননি ।—আইরিণ—” ব’লে মিস টমাস নীরবে কাঁদতে লাগলেন ।—“সেখানে ওর একটি মেয়ে হয়—ক্ষীণ, দুর্বল, তিন মাসের বেশি বাঁচেনি । মার তাতে দুঃখ ছিল না, কিন্তু সে শোকে একেবারে ভেঙে পড়ল । যেখানে শিশুটিকে কবর দেওয়া হয়, দিনরাত নাকি সেখানে প’ড়ে থাকতে চাইত । এর উপর ওর হ’ল দারুণ ব্রেন ফীভার । কোনো ক্রমে বাঁচানো গেল তো—” মিস টমাস দীর্ঘশ্বাস ফেলে বললেন—“এখন যা দেখছ । কেবল তখন আর একটু বাড়াবাড়ি ছিল । সর্বদা আত্মহত্যা করতে চাইত; লোকজন—বিশেষত পুরুষমানুষ—এখনও ওর চোখের বালি । অনেকদিন ওকে নার্সিং হোমে রাখতে হয়েছিল । মা আর বেশিদিন বাঁচেননি,—মৃত্যুর আগে ওকে আমার হাতে দিয়ে যান । তাঁর আশা ছিল যদি কখনো ভালো হয়—কিন্তু ভালো সে আর হয়নি ।” একটু থেমে—“তাই তোমাকে পেয়ে অমন করে—তোমার মুখের আদলটা—”



—“জানি—”

—“ও তো স্বাভাবিক অবস্থায় নেই—ঐটুকুতেই তোমার ওপর এত টান হয়েছে।”

অনেক কিছুই এখন পরিষ্কার হ’য়ে গেল। এই জাপানী-প্রীতি, “বেবি” ব’লে ডাকা, বেবির মতনই সেবা-যত্নের ঘটনা, যেখান-সেখান থেকে যখন-তখন জাপানী ফাল্গুস, ক্যান, স্ট্রিকার্যা আরো কত কী কিনে নিজের ঘরে জমিয়ে রাখা।—হঠাৎ চমক ভেঙে দেখি, মিস টনাস মগ্ন হ’য়ে কি ভাবছেন। চোখোচোখি হ’তে কী বলব ভেবে না পেয়ে বললাম—  
“আমনি বুঝি আর বিয়ে করতে পারলেন না?”

—“এর পরে কি আমার মনের অবস্থা ঠিক ছিল? তাছাড়া এই যে এত ব্যাপার ঘটে গেল, জন তার কিছুই জানত না—লোকে জানত টাইকয়েডে রিণা পাগল হ’য়ে গেছে। যাকে জীবনের নিভৃত কথা বলতে পারব না, তাকে বিয়ে ক’রে ঠকাব কী ক’রে? আর সে যদি সব শোনে, তবে কি আমাকে আগের মত শ্রদ্ধা করতে, ভালোবাসতে পারবে?—তাই নিজেই স’রে দাঁড়ালাম। তবু—সে এসেছিল।”

—“কি বললেন তিনি?”

—“বলল—‘ডোরা, তুমি কি আমাকে বিশ্বাস করো না?’ আমি ভয়ে ভয়ে বললাম—‘এ-কথা কেন?’ জন বলল—‘রিণার দেখাশুনার জন্তে তুমি বিয়ে করতে চাও না, কিন্তু এটা কেন ভাবোনি যে সে যেমন তোমার, তেমনি আমারও বোন?’—দেখলাম ও কিছুই সন্দেহ করেনি। আমার বাধা আরো বেড়ে গেল। একদিকে ওকে বলা—ওর চোখে নিজের ছোট বোনটিকে, সঙ্গে সঙ্গে নিজেকে ছোট করা, আর এক দিকে চিরদিনের সাথীকে হারানো। এই দ্বিধায় দ্বন্দ্ব আমি কী যে করব স্থির

করতে না পেরে কিছুদিনের জন্তে নরওয়ার্ড-এক ফিয়ার্ড-পল্লীতে গিয়ে গা-ঢাকা হ'য়ে রইলাম ।

“সেখানে গিয়ে জনের মাত্র একখানা চিঠি পাই—‘তুমি কেবল বোনের কথাই ভাবলে ? আমি তবে তোমার কেউ নই ? . বেশ, ডোরা, তাই হোক, আমি আর কখনও তোমায় বিরক্ত করব না’ ।”

আমি সাগ্রহে বললাম—“তার পর ?”

—“তার পর, যুথি, তার সঙ্গে আর এ জীবনে দেখা হয়নি । বলেছি না অভিশপ্ত পরিবার ?—জন আমি ফিরবার আগেই মারা যায় । ওর হার্ট দুর্বল ছিল বরাবরই ।”

চোখে আমার জল ভ'রে এল । উঠে ব'সে বৃদ্ধাকে জড়িয়ে ধ'রে বললাম—“কেঁদো না মা, ভগবান্ কোন্ ভাঙন দিয়ে যে কী গড়তে চান—” কথাটা শেষ করতে পারলাম না ।

—“যুথি, ভারতবাসী যে পরজন্ম মানে—”

হঠাৎ উপরে ও সিঁড়িতে দ্রুত পদশব্দ শোনা গেল : একটু পরেই রিণা দরজার কাছে এসে উদ্বিগ্নভাবে বললে—“ডোরা, তুমি কি আজ সারারাত বেবিকে ঘুমোতে দেবে না ? এত রাত অবধি আলো জালিয়ে হচ্ছে কী শুনি ?”

—“এই যে রিণি, এই যাই বোন ।—সত্যি, রাত কম হয়নি ।”



দে  
শী



পরিচয়  
ভাড়া-গড়া



## পরিচয়

মেয়ে হয়েছে ব'লে বাড়ীর সবাই অসন্তুষ্ট—প্রসূতির অন্তায় নয় ?

প্রথমটি মেয়ে, তারপর দুটি ছেলে, তারপর এই সন্তোজাত শিশু—  
পর পর দুই ছেলের পরে এই মেয়ে। নীরজা ভাবে, তবু কেন লোকের  
কথা শুনতে হয় ? বিধাতার নিজের কাছে যদি পুত্রকন্যার সমান দর,  
তবে বান্দলার ঘরে ঘরে মেয়েরই কপালে মানুষের কাছে তার এত  
অনাদর কেন ? অন্তত, জন্মমুহূর্তেও কি কেউ সত্যিকার আনন্দ নিয়ে  
শিশুকে বরণ করতে পারে না ? ‘মেয়ে হয়েছে’—বাড়িশুদ্ধ সবাইকার  
মুখভার ! প্রত্যেকের যেন কি একটা আশাভঙ্গ হ'ল ! শিশু গর্ভে থাকতে  
কতই না জল্পনা-কল্পনা—‘ছেলে হবে, না মেয়ে—!’...ছেলে হবে আশায়  
সবাইয়েরই চোখে আলো ওঠে জ'লে...মেয়ের আগমনীর সঙ্গে সঙ্গে  
সবই ধূলিসাৎ, সবাই—দুঃখ। আত্মীয়-পরিজনের সমালোচনার ভয় :  
মা-ও নিভৃত প্রাণের দরদ—স্নেহ বাইরে প্রকাশ করতে সাহস করেন  
না। আঁতুড়-ঘরে শুয়ে শুয়ে নিরুপায় নীরজা অনেক অপ্রীতিকর কথা  
শুনতে পায়। যখন বড় কষ্ট হয়, জননীর স্নিগ্ধ চোখ দুটির শান্ত  
কোমল দৃষ্টি নিয়ে অনাহৃত অতিথির নীর তলুখানি থেকে সব  
গ্লানি যেন নিঃশেষে মুছে নিতে চায়। কিন্তু কোনোদিন প্রতিবাদ  
করা দূরে থাক, মুখ ফুটে কাউকে একটা কথাও না। বাড়ির সে  
বড়-বো হ'লে কি হয়, শাস্তি এখনো বেঁচেয়ে। তা ছাড়া, ছোট জায়েদের  
সঙ্গে ও কোনোকালেই এঁটে উঠতে পারে না—না কথায় না চতুরতায়—  
ওর প্রকৃতির বিশেষত্ব কেবল বুকভরা বোবা স্নেহ আর সকলের সব

কথ। অতি সহজে মেনে নেওয়া। ঠিক, সেজ্ঞেই তো ওকে কেউ মানেনা।

মেয়েটি জন্মাবার দিন-দুই আগে সেজ-জা হিরণ্যীর হাত দুখানি ধ'রে মিনতি ক'রে বলেছিল—“হিরণ, লক্ষ্মী বোন আমার, সতুকে একটু দেখিস। খুকি আর মণির জন্তে ভাবনা নেই, শোবেও ওদের ঠাকুরমার কাছে। শুধু এর জন্তেই যত—”

হিরণ পূর্ব সম্পর্কে নীরজার বোন হয়—নিজে নিঃসন্তান। আশ্বাস দিয়ে বললে : “দিদি, সতু কি আমার পর! কিছু ভেবো না তুমি, ভালোয় ভালোয় উৎরে এসো, সতুর সব ভার আমি নিলাম। তাছাড়া জানই তো কি রকম লক্ষ্মী ছেলে, এতটুকু বিরক্ত করতে দেখেছ কখনো?” ...নীরজা নিশ্চিত হ'ল। মনে মনে ভাবে,—হিরণ মেয়েটি বড় কাজের, যদিও—যাক, সে-সব ছোটখাট ক্রটি ধ'রে কি হবে, মনটা আসলে ওর ভালোই আর সতুকে সত্যিই স্নেহ করে।

\* \*  
\*

মাত্র আড়াই বছরের ছেলে, মায়ের অভাব বোধ করবারই কথা, কিন্তু সতু—ভাল নাম শিশির—তারি শাস্ত। সারাদিন বা'পায় তাই নিয়ে আপন মনে খেলা করে। এইটুকু ছেলের পক্ষে আশ্চর্য্য বটে কিন্তু ওর মধ্যে কেমন একটা নীরবতা আছে যা ওর বড় ভাই বা বোন—কারো মধ্যে নেই। খেলা করতে করতে মা'কে মনে পড়লে উঠে গুটি-গুটি হেঁটে সোজা যায় মায় ঘরের দিকে। হিরণ রান্নাঘরের বারান্দা থেকে দেখতে পেয়ে ডাকে—“সতু, সন্তু, এদিকে এসো দিকি বাবা, এসো তো খন, এই দেখ কেমন রাঙা আলু—এই নাও।” ওদিকে

যেতে চাইলেই বারবার এরকম বাধা পড়ায় দুদিনেই সে বন্ধে নিয়েছে।  
কাকীমার এ-সব—শুধু ওকে মার কাছে যেতে না দেওয়ার ছল। এক  
একদিন কিছুতেই ভোলে না, নিষেধ না মেনে একথানা পা তুলে  
বলে—“মা দাই।” হিরণ বলে—“না লক্ষ্মী ছেলে, যেও না,  
ওখানে একটা কাঁদুনে খুকী এসেছে, গেলেই মারবে।” সতু বলে—  
“মারবে?”

—“হাঁ মারবে, ব—ডড মারবে। ভারি দুষ্টু মেয়ে।” সতু মুখের  
মধ্যে ডানহাতের তর্জনীটা পুরে উঠানে দাঁড়িয়ে দাঁড়িয়ে খানিকক্ষণ কি  
ভাবে। তারপরেই ফিরে খেলা করতে চলে যায়। হিরণের এত মায়ী  
হয়, ভাবে—“আহা, বেচারি!”

খুকীকে যে সতুর বড়ই ভয়, তা নয়। ও কোনো কিছুতেই বিশেষ  
ভয় পায় না। তার একমাত্র কারণ—ওকে ঐর আগে কেউ কোনোদিন  
ভয় দেখায়নি। শাস্ত স্বভাবের গুণে আর দেখতে বড় সুন্দর বলে  
বাড়ির সবাই ওকে ভালোবাসে, না চাইতে যখন তখন এটা সেটা দেয়  
হাতে। সতু মোটে আবদার করে না। আজ পর্যন্ত কোনো বিষয়ে  
জেদও করেনি, এটাই ওর ফিরে যাবার কারণ।

সেদিন দেউড়ির বারান্দায় বসে ওর বাবা দু-একটি বন্ধুর সঙ্গে কথা  
বলছেন। ছেলেমেয়ে তিনটি কাছেই ছুটোছুটি করে খেলে বেড়াচ্ছে।  
ইঠাং নগির ধাক্কা খেয়ে সতু যায় পড়ে। উঠান থেকে বারান্দা খুব  
উঁচু না হলেও নিচে কতকগুলো কাঠ পড়েছিল অনেকদিন থেকে। সতুর  
কপালে লাগল পোঁচ। খুকী ছুটে গিয়ে ভাইকে তুলে ধরল। বাবা  
দেখলেন, যেখানটা লেগেছিল—রক্ত জমে গাঢ় নীল হয়ে ফুলে উঠেছে।  
এ ঘটনাটির উল্লেখ করে তারপরে কতবার বন্ধুদের কাছে বলেছেন—



“মাশ্চর্য্য যে ছেলেটি একটু কাঁদল না, খুকী কিম্বা নগি হ’লে শ্রেফ ভয়েই কঁদে খুন হ’ত।”

আর একদিন ঠাকুরমার ঘরের সামনে ব’সে বাড়ির তিনচারটি ছেলেমেয়ে মালসার আগুনে কাঁঠাল-বীচি পুড়িয়ে থাকে। খুকীই দলের সর্দার, বরসে এদের সবাইয়ের বড়—সব রকম দুষ্ট বুদ্ধি প্রথমে ওর মাথায়ই গজায়। ওরা কাঠি দিয়ে বীচিটা আগুনের ভিতর গুঁজে দেয়। একটু পরে কটু ক’রে শব্দ হ’লেই বোঝে এবার তুলবার সময় হয়েছে, কিন্তু গরম বীচিটা ওঠাবে কে? খুকা নিজে আবার বেঁজায় ভীতু, একটুখানি হাত দিয়েই ‘উঃ আঃ’ ক’রে সরিয়ে নেয়—দ্বিতীয়বার চেষ্টা করতে সাহস করে না। সতু খাবারের ভাগ পাবার আশায় একপাশে ব’সে থাকে। এদিকে দিদি ওর উপর খুব সদয়, রোজই কুলটা, জামটা এনে খেতে দেয়। বীচিটা তুলতে না পেরে ওকে ডেকে বলে—“সন্ত, তুমি তোলা তো, লক্ষ্মী মাণিক, তোলা তো ওটা”—সতু এগিয়ে এসে আগুনের মধ্যে হাতটা পুরে দেয়। একটু খুঁজে দেখে সেই গরম গরম বীচিটা তুলে তাড়াতাড়ি মাটিতে রেখে দেয়। ওরা খুব হেসে উঠে আরো বীচি আগুনে পোড়ায়, আর একটার পর একটা ওকে ওঠাতে বলে। সতু স্নাপত্তি করে না; জালা করলে হাতখানা ঠাণ্ডা মেজেতে চেপে ধরে কিন্তু একটুও কাঁদে না। সেদিন থেকে ওর ভাইবোনেরা জেনে নিয়েছে—“সন্ত কিছুকু ভয় পায় না।”...

একুশ দিনের আগে নীরজার বিছানা ছেড়ে ওঠা বারণ। সহর থেকে বেশ খানিকটা দূর এ-পাড়াগাঁটির রীতিনীতি খুব কড়া, বাধা-ধরা নিয়ম, এতটুকু এদিক-ওদিক হবার জো নেই। পুরো একুশটি দিন

প্রসূতি আর শিশুকে আলাদা রাখা হয়। • যতদিন শাশুড়ি বা ঋষি কোনো প্রাণীনা বেঁচে থাকেন, ততদিন আধুনিক-ভাবাপন্ন ছেলেদের যুক্তিতর্ককে আমলই দেওয়া হয় না। অবশ্য এ-কয়দিনের বিশ্রামে ভালো বৈ মন্দ হবার কথা নয়, কিন্তু দুঃখ এই যে, যে-ই তিনটি সপ্তাহ পার হ'য়ে যায়, তারপরে সে যে সবে আঁতুড়ঘর থেকে উঠেছে সেকথা কেউই আর মনে রাখবার দরকার বোধ করে না। সূর্য হয় নিত্যকার সেই অবিশ্রাম খাটুনি, সংসারের শত হান্ধাম পোয়ানো। তার উপর বাড়ির বদ্বি হয় সে বড়বো, সব বোঝা তো আগে তারই ঘাড়ে এসে পড়ে। কোথাও কিছু খারাপ হ'লে ছোটজাদের উপর ততটা দোষ পড়বার কথা নয়। এ-বাড়িতে চিরদিন শাশুড়ির পরেই সংসারের সব দায়িত্ব বড়বোয়ের। কিন্তু এমনই কপাল নীরজার, যে, আঁতুড়েও মনের শাস্তি নেই। কেবল একটার পর একটা ভয়!...মণিটা না হুস্ক, হয়ত খিডকীর পুকুরের ঘাটে নেমেছে। সেখানে কে-ই বা দেখছে ওকে! • কব্রার জলে ডুবে যায়, সেই থেকে ওর জন্তে নীরজার জলের ভয় আর ঘোচেই না। মেয়েটা সারাদিন পাড়ায় পাড়ায় টো-টো ক'রে বেড়ায়—যাহোক দুটো কিছু মুখে দেবার জন্তে দুপুরে একবার বাড়িমুখে হয়, তারপর সেই যে বেরোয়, সন্ধ্যার আগে আর ফেরেই না। অত বড় মেয়ে, ছোট ভাই দুটিকে-যে একটু আগ্লাবে, মাকে একটু নিশ্চিন্ত হ'তে দেবে—কিন্তু না, ও-মেয়ে কোনো কাজের ধার-পাশ দিয়েও যায় না, কেমন যে পাগলের মত আপন মনে ঘুরে বেড়াতে ভালোবাসে! এখন না নেই ওর প্রাণে যা একটু ভয়-ডর ছিল তা-ও কি আর আছে?

হিরণ মাঝে মাঝে ঝন্টার দেয়—“আর পারিনে বাপু-তোকে নিয়ে, থেকে থেকে কেবল ঐদিকে ছুটবি। বোস্ এখানেক বসে থাক।

বড় বোনটাও এমন ! . হয়েছে তো আবার আরো একটা মেয়ে, এদিকে ছেলেটা অবত্রে যায় যায়। সারাদিন ওকে দেখে কে শুনি ?”—হিরণের ঐ দোষ, অकारणे লোককে কথা শোনায়, বিষম বদমেজাজী বে।

. বতই শান্তস্বভাব হোক, সারাক্ষণ একটা ছেলে কিছু একজায়গায় ব'সে থাকতে পারে না। আর, বাস্তবিক, হিরণেরও খুব দোষ নেই। শাশুড়ি তো নানে গৃহিণী, পূজো-আচ্চা, ঠাকুরসেবা আর ভোগ-আরতি নিয়েই রাতদিন ব্যস্ত। মেজজা নিরুপমা দূরে দূরে থাকতেই ভালোবাসে। কখনো নিজের ইচ্ছায় কিছু করল তো ভালো, নইলে, ওকে কোনো কাজ করতে বলতে কারো ভরসা হয় না। হিরণ তাই নাঝে মাঝে সতুকে বাইরে চাকরদের জিন্মায় পাঠিয়ে দেয়। সেখানে সে কি করে না করে কেউ খোঁজ রাখে না। ওরা আপন মনে ব'সে কেউ সম্বৎসরের বুড়ি, টুকরি, কেউ জাল, কেউ বা পাটি আর মাহুর বোনে। এই সেকেলিয়ানা-প্রিয় সম্পন্ন গৃহস্থবরের অত্যাশঙ্ক যত জিনিষ আজ পর্যন্ত বাড়িতেই তৈরি করানো হয়। বুড়ো গিন্নিমা যতদিন বেঁচে আছেন, এদিক দিয়ে চিরাচরিত প্রথা বা কাজের কোথাও কোনো ব্যতিক্রম হবার জো নেই।

বেশিদিন হয়নি—বাড়ির খুব কাছেই নতুন পুকুর কাটানো হয়েছে। চার পাড়েই নানাজাতের অসংখ্য কলাগাছ—অজস্রগ্রন্থ। ভালো ভালো কলা-ই এত বেশি যে কাঁঠালি ও চাঁপাকলাগুলো কে খায় তার ঠিক নেই। বিক্রি ক'রে, পাড়ার ঘরে ঘরে বিলিয়ে, চাকরবাকরদের দিয়ে খুয়েও শেষ করা যায় না। নতুন মাটির জোরে কলা যেমন, তেমনি শাক-আলুও যাঁ ফলেছে—। কাঁদি কাঁদি কলা আর সে আলু বাইরের

ঘরের যেখানে সেখানে প'ড়ে থাকে। পেকে নেহাৎ নষ্ট হ'য়ে যাবার উপক্রম হ'লে অবশেষে গরুকে খেতে দেওয়া হয়।

সতু স্ত্রীবিধা পেলই যখন তখন গোটা গোটা কলা গিলে আসে। কেউ দেখবার নেই, বারণও করে না কেউ। চাকরদের কেউ হঠাৎ যদি বা দেখে ফেলে, গিলিমার বকুনির ভয়ে বাড়ির ভিতর আর বলেই না। তাছাড়া—ওরা ভাবে—ছেলেপুলে দু-একটা কলা খেলেই বা। ওদের ঘরে তো খাওয়াদাওয়ার কড়াকড়ি বা বাঁধাবাঁধি নিয়ম নেই এত।

সতু কাকীমার কাছে এসে দুধ খেতে চায় না, ভাতও ফেলে ছড়িয়ে উঠে যায়। হিরণ মহা মুন্সিলে পড়ে। সব রাগটা তখন পড়ে গিয়ে ওর মায়ের উপর। বেশ গুছিয়ে দুকথা শুনিয়ে দেয়। রাগের সময় ওর মনেই থাকে না কথাগুলো একটুও সঙ্গত হ'ল কি না। নিজের সন্তান হয়নি, অভিজ্ঞতাও নেই—কেন যে ছেলে খেতে চায় না তার আসল কারগটা খুঁজে বা'র করবার কথা ওর মনেও আসে না। এক একদিন এমন সব কথা ব'লে বসে যা বড়বোন বা বড়জাকে কেউ কখনো বলে না। মেজাজ ভাল থাকলে তার জন্তে নিজেই মনে মনে কত আফশোষ করে, কিন্তু স্বভাব যাবে কোথায়? দুদিন পরে আবার যে-কে-সেই।

দিনকয়েক পরে দুপুরবেলা হিরণের মাথায় যেন খুন চেপে গেছে।... “এই ভর দুপুরের গরমেও তোর জন্তে একটু গা-গড়িয়ে নেবার জো নেই? বেলা না পড়তে উঠে আবার সেই হাঁড়ি ঠেলতে হবে না? তোর মা মহারানী তো দিব্যি প'ড়ে আছেন, তাঁর আর কি? আমারই না ঘাড়ে এসে জোটে যত রাজ্যের হাঙ্গামগুলো—” এ-সব গোলমালের সময় নিরুপমা কখনো ঊকি মেরেও দেখে না, পাশ কাটিয়ে স'রে যায়। আজ কিন্তু ডেকে জিজ্ঞেস করল—“কি হয়েছে ভাই সেজবো?”

—“আর মেহদি, ঝোলো না—এইমাত্র ধুইয়ে মুছিয়ে পরিষ্কার ক’রে নিক্ষেপলুম, ছ’মিনিট না যেতে আবার—”

টেঁচামেচি শুনে শাশুড়ি বারান্দায় এসে দাঁড়িয়েছিলেন। ব্যাপার কি বুঝতে না পেরে জিজ্ঞেস করলেন, —“কি হয়েছে বোমা?”

—“এই দেখুন না মা, সতু আজ সারাদিনই যেখানে সেখানে—”

—“সে কি! কোনো অসুখ-বিসুখ হয়নি তো?”

—“তা তো জানিনে মা, এদিকে স্নান করতে করতে আর কাপড় ছেড়ে ছেড়ে আমি যে হায়রাণ হ’য়ে গেছি—”

—“ওর মুখপুড়ী নবাবজাদী মা করছেন কী—শুনি? একটু কি ঊকি মেরেও দেখতে পারে না ছেলেটা কিরকম থাকে না থাকে—হজম হয় কি না হয়! চারছেলের মা হ’ল, এসব কথাও কি এখনো শিখিয়ে দিতে হবে?”

—“তাঁর তো ভারি দায় পড়েছে মা, মেয়ে বুকে নিয়ে উনি এখন আরামে নাক ডাকাচ্ছেন।”

একটা কথাও নীরজার কান এড়ায়নি। এতক্ষণ নীরবেই শুনেছে, কিন্তু শেষের কথাটায় হঠাৎ ওর মৈথ্যচ্যুতি হ’ল। বারবার একই বিষয় নিয়ে গোঁটা দেওয়া! কেন, ও কি সাধ ক’রে মেয়ে ডেকে এনেছে? এ কী অবিচার!...

জগতের রীতি! এক অক্ষমের সব রাগ গিয়ে পড়ে অল্প এক অক্ষমের উপর!—উঠে ব’সে নীরজা ছেলেকে উদ্দেশ্য ক’রে বলে—“ওরে দস্তি ছেলে, তোর মরণও নেই? দশ কথা শুনতে শুনতে হাড় জালাতন হ’য়ে গেল যে আমার—”

কথাটা শাশুড়ির কানে তুলে দিল হিরণ—“দেখছেন মা, তেজ কত দেখছেন আবার—”

শাশুড়ি আগুন হ'য়ে—“কি বললি লা?” . ব'লে উঠোনে নেমে এলেন। “মা হ'য়ে ছেলেটাকে এত বড় গাল? ছেলের চাইতে তোর মেয়ে হ'ল বেশি?” রাগে তাঁর মুখ দিয়ে আর কথা বেরয় না। ঘরের ফোঁতে দুঃখে নীরজার বায় আগে কোনোদিন কোনো ছেলেমেয়েকে ও এতবড় কথা বলেনি। দুর্বল শরীরে রাগটাও হয় বেশি। নইলে কী ক'রে সে এমন কথা বলতে পারল—বিশেষ ক'রে মতুকে—যে কোনোদিন ওকে এতটুকু বিরক্ত করে না!

রাত্রে কথাটা খুকীর বাবার কানে উঠতে দেবী হ'ল না। বুঝতে পারলেন তিনি সবই, তবু স্ত্রীর উপর হ'ল ভয়ানক রাগ। মার উপরও অভিমান। ঐটুকু ছেলেকে উপলক্ষ্য ক'রে বোয়েদেরই বা এত রেষারেবি জেদাজেদি কেন? না ও-সব দেখেও দেখেন না।—গস্তীরমুখে খাওয়া শেষ ক'রে বাইরের ঘরে চ'লে গেলেন। সকালে খুকিকে ডেকে ব'লে দিলেন যেন ভাইটিকে চোখে চোখে রাখে।

ছোট হ'লে কি হয়, মতুর বুদ্ধি খুব। ও বুঝতে পেরেছে যে তারবার পরিষ্কার করিয়ে দিতে বললে—এতদিন বলত অভ্যাসবশতই—চাকীনা খুসি হয় না। তার উপর, ভাতের বদলে দু'বেলা মাগুর ন্দোবস্তে বেচারা রীতিমত ভড়কে গেছে। নীরজার ছেলেমেয়েরা ধসাতুকে ভয় করে যমের মত। মতু আর কাকীমার কাছে আসে না, দিদিও তার কিছু বোঝে না; ফলে অমুখ ভিতরে ভিতরে বেড়েই গলে।

ওদের বাবা শীকার করতে ভালোবাসেন। পৈতৃক অমলের এক প্রকাণ্ড বন্দুক নিয়ে মাঝে মাঝে পাহাড়ে চ'লে যান, দিনকয়েক পরে শীকার

সঙ্গে ক'রে বাড়ি ফেরেন। এটা এ-রাড়ির পক্ষে একেবারে অনাচার; বন্দুক রাখতে হয়েছিল শুধু চা-বাগানে আগেকার অনাবাদ জঙ্গলের দিনে হিংস্র বুনো জানোয়ারের হাত থেকে আত্মরক্ষার জন্যে। মা গুর কতবার অন্তর্য ক'রে, রাগ ক'রেও ব'লে দেখেছেন—কিন্তু ছেলে শোনে কই?

. সেদিন সন্ধ্যার একটু আগে কে এসে তাঁকে খবর দিয়ে গেল নতুন পুকুরে একটা মস্ত বুনো হাঁস চরতে এসেছে, তাক করতে একটুও ব হবে না। এ-লোভ সামলানো দায়। চুপি চুপি বন্দুকটা নিয়ে বেরিয়ে গেলেন। পুকুর আর বাড়ির মাঝখানে শুধু একটুখানি ফাঁকা মাঠ। পাঁড়ে দাঁড়িয়ে কেউ জোরে কথা বললে বোঝিরাও শুনতে পায়।

. সব সন্ধ্যার অন্ধকার নেমে এসেছে। এমন সময় গুডুম ক'রে বন্দুকের গম্ভীর আওয়াজ!—নীরজার সর্বশরীরে কাঁটা দিলে...কোলের মেয়ে চমকে কেঁদে উঠল। স্বামী শীকারে গেলে বরাবরই ওর মনটা খারাপ হয়ে যায়, কিন্তু এর আগে কোনোদিনই বাড়ির তল্লাটে তিনি প্রাণিহত্যা করেননি। শাশুড়ির মত সেও মারা-কাটা একেবারেই সহ করতে পারে না। কেমন একটা অজানা শঙ্কায় ওর মনটা ওঠে ভার হয়ে।

আবছা অন্ধকারে উঠোনে ছেলেমেয়েরা তখনও খেলা করছে। বাড়ির রাখাল ছেলেটা—বলা নেই, কওয়া নেই—হঠাৎ সাম্নে এসে, “এই দেখ। এটা কি” ব'লে মস্ত রক্তাক্ত হাঁসটা তুলে ধরল। রান্নাবর হ'তে বোয়ের “দেখি, দেখি” ব'লে এগিয়ে এল। সঁতু এতক্ষণ দিদির খেলায় হাঁড়িটা ধ'রে বসেছিল। সকলের দেখাদেখি সেও উঠে এসে কোতুহলে ঝুঁকে প'ড়ে দেখতে গেল। রাখাল কিছু না ভেবে চিন্তে পাখিটাবে শূন্যে ছুঁলিয়ে হঠাৎ একেবারে সত্বর চোখের সামনে ধরল। তাৎ

হুন্ডে-পড়া ভাঙা ঘাড় থেকে টস্ টস্ ক’রে রক্ত ঝরছে তখনো। সতু ভয়ে শিউরে কেঁদে ওঠে। হিরণ ছুটে এসে ছেলেকে কোলে তুলে নেয়। “ঘাট্, ঘাট্, কেঁদো না মাণিক, ও কিছু নয়, ও কিছু নয়। আচ্ছা হারু, তোর ঘটে কি এতটুকু বুদ্ধি নেই রে? ছেলেটাকে ভয় সন্ধ্যায় মিছিমিছি ভয় দেখালি? অর টর হয় তো বাবুকে ব’লে মজা টের পাওয়াব এখন। যা, দূর হ’য়ে যা—”

হারু মুখ কাঁচুমাচু ক’রে “কে জানত মা এত ভয় পাবে—কখনো তো—” বলতে বলতে স’রে পড়ল।...

সেই থেকে সতুর অসুস্থ ভয়ানক বেড়ে গেল। আজকাল ও আর খেলাও করতে চায় না। কেবলই হাত দিয়ে পেট চেপে ধরে, কিন্তু মুখে কিছু বলে না। থেকে থেকে পেটে হাত না দিলে কেউ বুঝতেও পারত না কত ব্যথা করছে ওর। সঙ্গে সঙ্গে অর। উপোস দিয়ে প’ড়ে থাকে, তবু সাঙু খেতে চায় না। দুদিন না যেতেই এমন রোগা হলদে বরণ হ’য়ে গেল—! ওর যা কিছু আকার শুধু দুটি ভাতের জন্তে। মায়ের পেছন পেছন গিয়ে আঁচল ধ’রে কাঁদে। নীরজার ইচ্ছা হয় শুধু হুন দিয়ে মেখে দুটি নরম গরম ভাত ওর মুখে দেয়। কিন্তু সতুর বাবার কড়া নিষেধ—আমাশায় কিছুতেই যেন ভাত দেওয়া না হয়। চিকিৎসা করছেন তিনি নিজেই। নীরজার এই জ্বোলো হোমিওপ্যাথিক ওষুধে একেবারেই আস্থা নেই, কতবার আপত্তি করেছে, কিন্তু ওর কথা শোনে কে? ঠাকুরমা দেব-দেবীর কাছে ‘মানৎ’ করেন, জপের মালাটি সতুর কপালে ছুঁইয়ে যান : কিন্তু অসুস্থ সারে না। ক্রমে যখন এমন হ’ল যে ছেলে আর উঠে হাঁটতে পারে না, তখন গ্রামের এক অবশ্রান্ত সাব্-এসিষ্ট্যান্ট সার্জনকে ডেকে আনা হ’ল।



সতুর এবার বড়ই কষ্টের দিন। বাবার ওষুধ ছিল খেতে বেশ মিষ্টি, তাই ২৩ অঁপত্তি করত না। কিন্তু এখন ডাক্তারের এলোপ্যাথিক মিক্শার জোর ক’রে হাত পা চেপে ধ’রে নাক টিপে ঝাওয়াতে হয়। এত দুর্বল হ’য়ে গেছে এ ক’দিনেই বে, এমন ক’রে ওষুধ ঝাওয়াবার পরে বেচারী খানিকক্ষণ একেবারে নিজীবের মত প’ড়ে থাকে। দেখে দেখে নীরজার মনে হয়—এই এত দুঃখের জগতেও শিশুর রোগ-বস্তুভোগের ভুল্য দুঃখ বুঝি আর নেই!

আটদিন যেতে না যেতে সতু ভাতের জন্তেও আশ্চর্য করা ছেড়ে দিল। বালিশের উপর মাথাটি কেমন অসহায়ভাবে এলিয়ে দিয়ে বিছানায় একেবারে নেতিয়ে প’ড়ে থাকে। আড়াই বছরের ছেলেকে পাঁচবছরের ছেলের সমান লম্বা দেখায়। নীরজা বারবার মুখের কাছে মুখ নিয়ে গিয়ে ডাকে, “সন্তুগণি; ভাত খাবে বাবা? ভাত খাবে, ধন?” ওর আশা—যদি ভাতের নাম শুনেও সে মায়ের সঙ্গে এক-আধটা কথা বলে, কিন্তু সতু আর চেয়েও দেখে না, মার কথা হয়ত ওর কানেও পৌঁছল না।

অবস্থা সঙ্কটাপন্ন দেখে দূর গ্রাম থেকে এক খ্যাতনামা শিশু-চিকিৎসককে আনতে লোক পাঠানো হ’ল। কেন যে এ’র কথা আগে কারো মনেই হয়নি কে জানে!

একদিন মন্দিরের ব্রহ্মচারী ঠাকুরকেও ডেকে আনা হ’ল। তিনি এসে অনেকক্ষণ নীরবে প্রার্থনা ক’রে বললেন, “মা, তোমার খোকার এই বিছানার চারদিকে আমি এক রক্ষণ-মন্ত্রের গণ্ডি দিয়ে গেলাম। সাতদিন ওকে এখান থেকে নড়াবে না, বিছানা বদলাবে না, যেমন আছে ঠিক তেমনি রাখবে। সাতদিন পরে আমি আবার এসে দেখে বাব।”.....

দিন দুই পরে সতুর অবস্থা একটু ভালো ব'লে মনে হ'ল। কবিরাজ তখনো এসে পৌছননি। দুপুরে খুকি—সতুর দিদি—বিছানার কাছে গিয়ে উসখুস করছে। ও প্রায়ই এ-ঘরে আসে। সতু কেন অমন ক'রে শুয়ে থাকে সেটাই হ'ল ওর ভাবনার বিষয়। মাঝে মাঝে মার রোদনশ্রীত আরক্ত মুখের দিকে তাকিয়ে কত-কি ভাবতে চেষ্টা করে। এক একবার রক্ত ভাইয়ের শিথিল হাতখানি হাতে নিয়ে দেখে নেড়েচেড়ে। নীরজার মুখে শুধু এই সময় একটু হাসি ফুটে উঠে আবার তখনি মিলিয়ে যায়। মেয়ে যদি জানত কিসের ভয় ওর মার বুকে গুরুভার পাষণের মত চেপে আছে! একদিন কি মনে ক'রে শুধোলো—“বল দেখি মা, ভাইটি তোর বাঁচবে তো? বল—”

খুকি চুপ ক'রে খানিক মার মুখের দিকে চেয়ে রইল। হঠাৎ কে যেন জোর ক'রে সেই আট বছরের মেয়ের মুখ দিয়ে বললো—“বাঁচবে না।” নীরজা “ছি, মা, ও-কথা বলতে নেই” ব'লে চোখের জল ফেলে। মেয়ে থতমত খেয়ে বেরিয়ে গেল সে-ঘর থেকে।

পরদিন সতু আরো শান্তভাবে ঘুমোয়। নীরজার বিশ্বাস ছেলে ওর এষাত্রা বেঁচে গেল। আজই যে কোনো সময় কবিরাজ এসে পৌছবার কথা।

দুর্বল শরীরে এ কয়দিন খেটে খেটে, তার উপর দুশ্চিন্তায় ও বড়ই ক্লান্ত হ'য়ে পড়েছে—এতদিন নাওয়া খাওয়া জ্ঞান ছিল না। আজ যখন দেওর স্বরেন এসে বললে—“সতুর জন্তে আর কোনো ভয় নেই”, তখন কোথা থেকে বিশ্বের ক্লান্তি ওকে ধরল ঘিরে। শান্তি একবার বলতেই নীরজা সেখানেই শুয়ে পড়ে।.....হঠাৎ স্বপ্নের মতন—অস্ফুট,

অক্ষুটভাবে শোনে সতু 'কাঁদছে—দুর্বল্য করণ স্নরে! ধড়মড় ক'রে উঠে বসে দেখে ঘর অন্ধকার, সতু নেই!

খুকি টেচিয়ে ডাকে, “ঠাকুমা সস্তর গালের ঘায়ে ওষুধ লাগাচ্ছিলেন, মাগো—শুনছ ওমা? তাইতে ও কাঁদছে আর হাঁপাচ্ছে—বড্ড লেগেছে, মা—”

—“ওগো কেন তোমরা ওকে বিহানা থেকে তুলেছ, ঠাকুরের মানা-যে—” নীরজা আকুল হয়ে ছুটে আসতে না আসতে সতু আর একবার “এ” ক'রে কঁদে, আর একটুখানি নড়ে চড়ে স্থির হয়ে গেল।

সন্ধ্যার অন্ধকারে—যে-সময় রক্তমাখা বুনা হাঁসটাকে দেখে ও ভয় পেয়েছিল, তার ঠিক দুসপ্তাহ পরে, সেই একই সময়ে—সতুর অমল শিশুপ্রাণ কোন্ অনন্তে যে মিলিয়ে গেল.....

ঘরের ভিতর ওর তনু দেহখানি ধবধবে নতুন কাপড় দিয়ে ঢেকে দেওয়া হয়েছে। তাই আগলে বসে হু'ভাই-বোন—খুকি আর মণি। পাড়ার যে কেউ দেখতে আসছে অম্নি মুখে হাত চাপা দিয়ে ফিস্ ফিস্ ক'রে বলছে—“চুপ, চুপ, গোঁষ কোরো না। সেজকাকা বলেছেন ও অনেকদিন পরে ঘুমোচ্ছে, জ্বর সেরে গেছে।” সবাই চোখের জল চেপে স'রে যায়।

খানিক পরেই সতুকে উঠিয়ে নিতে আসে। মণি পিছন পিছন যায়, ডেকে জিজ্ঞেস করে, “সন্তকে কোথায় নিয়ে যাচ্ছ, সোনাকাকা?”

—“সহরে, হাঁসপাতালে। আবার আসবে। যা, ঠাকুমার কাছে বা।” ভাইবোন ফিরে আসে.....

একদিন দু'দিন—চার-পাঁচদিন যায় কেটে। সন্ত তো কই আর আসে না? মা রোজই কাঁদে। কেন? কিছু না বুঝেও ওদের কাঁদা, পায়। মণি কঞ্চির রাশ কুড়িয়ে এনে খাটের নিচে জড়ো করে রাখে। কবে একবার সতু দাদার কাছে একটা কঞ্চি চেয়ে পায়নি; মণি উল্টে ওর পিঠে এক থাপ্পড় বসিয়ে দিয়ে বলেছিল, “পালা এখান থেকে, আমার লাঠি তোকে দেব না।” আজ অবোধ শিশুর বিরহ-কাতর প্রাণ সেদিনকার সেই নিষ্ঠুরতা, ছোট ভাইটিকে বিমুখ করার বেদনা ভুলতে—যেখানে যত কঞ্চি বা লাঠি দেখে, তুলে এনে জমিয়ে রাখে...কেউ জিজ্ঞেস করলে বলে—“ভাইটি ফিরে এলে তাকে দেব।”

খুকি বখন তখন যাকে তাকে শুধায়—“সন্ত কবে আসবে?” কেউ জবাব দেয় না। সতুর যাওয়ার দিন থেকে বাবার দেখা পাওয়া যায় না। ঠাকুমাকে জিজ্ঞেস করলে মুখ ফিরিয়ে চ'লে যান, সেজকা কীমা আঁচলে চোখ মোছে! খুকির মনে অস্পষ্টভাবে একটা ভয় আসে। কোথাও কী যেন একটা হয়েছে! সমস্ত বাড়িখানার এ কী অদ্ভুত থমথমে ভাব!...ভাইটির কথা জানতে চাইলেই-বা সবাইকার মুখ এমন হ'য়ে যায় কেন?—মণি আর খুকি অজানা বিষাদে দিন দিন ঝুঁকিয়ে ওঠে। খুকি ভাবে—“তবে কি—তবে কি—সন্তকে ঐ নদীর ধারে—যেখানে নাকি সুরোর দাদাকে—বাঃ তা কেন হবে? সুরোর দাদা তো একেবারে ম'রে গিয়েছিল। হ্যাঁ, মড়া—নড়ত চড়ত না। সতু গেছে সহরে। কিন্তু আসেই না...একেবারেই আসে না কেন?”...নিজের নিজের দুঃখ নিয়ে সপাই ব্যস্ত, এ ছুটি শিশুর মনের বেদনা কেউ বোঝে না। ওরা ভাষায় গুছিয়ে বলতে পারে না ব'লে ওদের প্রাণের শূন্যতা কারো চোখে ধরা পড়ে না।

একদিন বাড়ির রাখাল ছেলেটাই ব'লে ফেলল—“সে ম'রে গেছে রে, অমর আসবে না।”

খুকির মাথাটা কেমন ক'রে ওঠে। ভয়ানক রাগ ক'রে বলল—  
“মিথ্যে কথা বলছ? বাবাকে ব'লে দেব না?”

—“না রে, সত্যি বলছি। ও মড়া হ'য়ে গিয়েছিল—ওকে সেদিনই পুড়িয়ে ফেলেছে।”

মণি একটু হাঁ ক'রে থেকেই কেঁদে ফেলল। তাড়াতাড়ি ওকে জড়িয়ে ধ'রে খুকি বাড়ির ভিতর চ'লে গেল। রাখাল কি বলেছে মার কাছে নালিশ করতেই নীরজা মাটিতে উপুড় হ'য়ে পড়ল। মণি ভয়ানক কঁাদতে থাকে, হিরণ এসে ওকে কোলে তুলে নিল। খুকি খানিকক্ষণ অবাক হ'য়ে সবাইকে দেখে। তারপর কেমন বিহ্বলের মত ধীরে ধীরে বেরিয়ে যায়।.....

\* \*  
\*

মৃত্যুর সাথে এই ওর প্রথম পরিচয়!

## ভাঙা-গড়া

মাত্র বহর তিনেকের ছেলে—কিন্তু কী যে দুঃস্থ—! রাতদিন কেবল আন্ধার আর বায়না আর কান্না ! কান্দতে একবার আরম্ভ করলে থামানো দায়, এটা ভাঙবে ওটা আছড়াবে, হাত-পা ছুঁড়ে চিংকারে গলা ফাটিয়ে মেজের এধার থেকে ওধারে দেবে গড়াগড়ি।—সে কী কাণ্ড !—মা সামলাতে পারে না, বৌদিদি কিল চড়টা খেয়ে ছুটে পালায়—জ্যেঠাইমা নিরাপদ ব্যবধান বজায় রেখে বারান্দায় দাঁড়িয়ে শোরগোল করেন। ছোট দিদি কনক তো ভয়ে ত্রিসীমানায় ঘেঁষে না। বাস্তবিক এত ছোট-বেলা থেকেই এমন জেদী ছেলে কেউ জন্মে দেখে নি। পাড়াপড়শি কেউ বলে—“বৈচে থাকলে ও-ছেলে বর্গী হবে” ; কেউ বা বলে—“পাগল হবে—সহজ মানুষের কি এতটা রাগ হয় কখনো ?”—কোন্ আন্দাজটা পরে ঠিক হবে ? এ-সবের একটাও কি ? দেখা যাক।

\* \*  
\* .

সেদিন সকালে এম্নি ধূলোকাণ্ডা মেখে ও গড়াগড়ি দিয়েছে। দৈনিক বরাদ্দ কলার একটার জায়গায় দুটো চেয়ে বসেছে ; মার নিষেধ আছে, তাই বৌদি দেয়নি এই অপরাধ। ব্যস্ আর যায় কোথায়, লাথিয়ে, খই দুধ ঢেলে ছড়িয়ে একাকার ক’রে ধরাশয্যা। ও-বরে বড়দা আইনের বই ঘাঁটাঘাটি করছেন, চীৎকারে কাজের ব্যাঘাত হ’লে অন্তদিন

হুকার দিতে ছাড়েন না, যদিও তাতে প্রায়ই হিতে বিপরীত হয়। আজ হঠাৎ কি মনে হ'ল, উঠে এসে টপ্ ক'রে ভুলে নিয়ে পাশের ঘরে ঢুকে দৌলনার কাছে নামিয়ে দিলেন। সেখানে ছ'মাসের কচি খুকি ঝুমোচ্ছিল, গোলমালাে আচম্কা জেগে উঠে কোকিয়ে কেঁদে উঠল। খোকা তারণ নিজের কান্না বন্ধ ক'রে অবাক হ'য়ে খুকির দিকে চেয়ে রইল, এ-বার্ডিতে যে ওর সঙ্গে পাল্লা দিয়ে কাঁদতে বা অত চোঁচাতে পারে আর কেউ, এ তথ্য ও এই আজ নতুন আবিষ্কার করলে। খুকি টুকটুকে পা দু'খানি আছড়ে গায়ের উপর থেকে কাঁথাখানি ফেলে দিতে দিতে, ছোট ছোট কচি মুঠোতে লাল জামাটি চেপে ধ'রে কি এক রকম অদ্ভুত মুখ ক'রে কাঁদছে! অসময়ে কান্না শুনে বধু রান্নাঘর হ'তে উঠি পড়ি ক'রে ছুটে এসেই থমকে দাঁড়াল, দৌলনার উপর ঝুঁকে পড়ে তারণ অবাক কৌতূহলে দেখছে আর মৃদুরে দাঁড়িয়ে স্বামী হাসছেন।

—“মেয়েটা কেঁদে সারা হ'য়ে গেল—আর তুমি বেশ মামুষ তো; ঐ দস্তিটাকে ছেড়ে দিয়ে কি এত রঙ্গ দেখছ শুনি? যদি কিছু ক'রে বসে?”

খুকির জন্মদাতা আশ্তে বললেন—“আহা, রাগ করো কেন? মেয়ের তোমার কিছুই হয়নি। হাসছি আমি তারণটার কাণ্ড দেখে : দেখছ না একেবারে ‘থ’ হ'য়ে গেছে, কাঁদতে পর্য্যন্ত গেছে ভুলে।”

—“তা তো দেখছি, এদিকে মেয়েটা যে কেঁদে নীল হ'য়ে গেল—সে খেয়াল আছে?” অথ খুকিকে নিয়ে জননীর প্রশ্নান।

তারণ এতক্ষণে সুদীর্ঘ একটা নিশ্বাস ফেলে স'রে ব'সে দাদার মুখের দিকে চেয়ে কাঁচি দাঁত ক'টি বের ক'রে হেসে বললে—“দাইদা, বাব্বী!”

অবশেষে এই একটা উপায় পাওয়া গেছে। রাগে ছেলে এখন চোখ-

মুখে আগুন ছিটিয়ে বাড়ি মাথায় ক'রে তুলে, তখন “বাবীর কাছে যাবি থোকা? ও-ই, ও-ই যে বাবী ডাকে” বললেই থোকা তরানি শাস্ত হ'য়ে এদিক ওদিক তাকায়। খুকির দোলনার পাশে বসিয়ে দিলে তার শিশু ভাষার বিচিত্র কলরব শুনতে শুনতে নিজের আকার-গুলো পর্যাস্ত ভুলে যায়। অতঃপর খুকিকে দোল দেওয়া ওর দৈনিক কাজ। প্রথম প্রথম বৌদিদির ভয় ছিল পাছে সে হঠাৎ কিছু ক'রে বসে, কি রকম দুষ্টু ছেলে জানে তো সবাই! কিন্তু তারণ খুকির কাছে শাস্তির বালবিগ্রহ! শুধু মাঝে একদিন ওর জলজলে চোখ দুটোকে কি ভেবে একটু বিশেষভাবে পরীক্ষা ক'রে দেখতে চেয়েছিল, খুকির তাতে ঘোরতর আপত্তি দেখে আর কোনোদিন সে গবেষণাও করতে এগোয় নি।

\* \*  
\*

তারণের ছোটদিদি কনকের বিয়ে হ'য়ে যাওয়ার পর বাড়িতে এখন ছেলে মেয়ে শুধু দুটি—সে আর তার জাঠ-তুত ভাই মহিমের একমাত্র সন্তান—“ছবি।” শিশু মুখের, আধ ভাষায় সেই যে ও ‘বাবী’ নামকরণ করেছিল, সে নামই ছবিতে উত্তীর্ণ হ'য়ে গেছে যে কী ক'রে—নামলীলার কোন্ বিচিত্র রহস্তে!—মহিমের দেওয়া বড় সাধের নাম ‘আরতি’ পোবাকী কাপড়ের মত যত্নে তোল থাকে, কালে ভদ্রে ব্যবহার হয়।

তারণ পাড়ার যত ছোট ছোট ছেলে মেয়েদের সর্দার। পুকুর, দেউড়ি, খিড়কির বাগান ওদের কোলাহলে নিত্য সরগরম। গাছের নিচের ডালের ফলপাকুড় কখনো গাছে পাকতে পায় না। খিড়কীর পুকুরের সংলগ্ন পুরোণো লিচু গাছটার সব চেয়ে মোটা আর নিচের ডালটি



সর্দারের সিংহাসন। সাধু অসাধু নানা উপায়ে সংগৃহীত সময়ের ফলমূল, আচার মোরব্বা, বাঁশি, খেলনা, রঙীন কাগজ যেখানে যে যা পায় সব এনে একত্র করে এবং তারণ সেগুলো সকলের মধ্যে ভাগ বাঁটোয়ারা ক'রে দেয়। যেমন সকল বিষয়ে, তেমনি এতেও সবাইকে সর্দারের বিবেচনা তথ্য রায় মেনে চলতে হয়, নইলে রক্ষে আছে? এজন্তে ওর অধীনে পাড়ার মেয়েরা বড় কেউ বেশিদিন টিকে থাকতে পারেনি, কেবল এক ছবি ছাড়া। এটা বলতেই হবে যে ছবির নিজের গুণ আছে যথেষ্ট, একেবারে কাকার মনের মত। নিন্দুক লোকে বলে মেয়ে না হ'য়ে ওর ছেলে হ'য়ে জন্মানো উচিত ছিল। কেউ বা বাঁকা কটাক্ষ ক'রে বলে—“এতটা হ'ত না, শুধু সঙ্গ দোষেই—”। গায়ে হাতে কোথাও পরে না একটা গয়না, মাথার চুল মাকে দিতে দেয় না হাত। কাপড়ের আধখানা প'রে বাকি আধখানা জড়ায় কোমরে; ভুলেও কখনো পাড়ার মেয়েদের সঙ্গে বায় না পুতুল খেলতে বা ‘চড়িভাতি’ করতে। ও কেবল ‘ছোট্টকার’ হুকুমে ওঠাবসা চলাফেরা করবে। এমন অল্পগত অল্পচর ‘কার না প্রিয় হয়? অল্প মেয়েরা আড়ালে গাল দেয়, ভয়ে সামনাসামনি কিছু বলতে পারে না—পাছে তারণ কোন এক ফাঁকে এসে লাঠির এক ঘায় পুতুল ও পুতুলের হাঁড়িকুঁড়ি ভেঙে চুরমার ক'রে রেখে যায়। এ-হেন তারণ ও তার ভাইঝি যে গ্রামের নিরীহ শিশুদের ভীতিপ্রদ আদর্শ এবং দুষ্ট ছেলেদের প্রাণপ্রিয় সুহৃদ হ'য়ে উঠবে এতে আর আশ্চর্য কি?

তাছাড়া হরস্তপনার স্রবিধাও বিস্তর। তারণের বড় ভাই অপূর্ণ দূর কলকাতায় কলেজে পড়ে। সুদীর্ঘ ছুটিতে ছাড়া বাড়ি আসতে পারে না। মহিম কার্যোপলক্ষে বেশির ভাগই—সহরের বাড়িতে থাকেন, অবসর পেলে টুক ক'রে গ্রামে চলে আসেন, কিন্তু কখন আসবেন বা ধাবেন তার

হমিশ কেউ জানে না। এজন্তেই যা একটু সতর্ক থাকতে হয়, নইলে তারণ বলে, ওরা আরো কত ‘মজা’ মারত।

জ্যেঠাইমার মাঝে মাঝে ওদের পড়াবার খেয়াল হয়। কখনো কখনো দুপুরে দুজনকে কাছে বসিয়ে রামায়ণের গল্প শোনাতে আরম্ভ করেন— উপদ্রবটা যদি তাতে একটু কমে—সে-ও কম লাভ নয়। কিন্তু গরমে আর সারাদিনের পরিশ্রমের পর ক্লান্তিতে শীগ্গীর বুঁজে আসে তাঁর চোখ।

সেবার মহিম বাড়ি এসেছেন। কি একটা দরকারী কাজে ও-পাড়ায় বিস্তর ঘোরাঘুরির পর অনেক বেলায় ফিরে নেয়ে থেয়ে এইমাত্র একটু বিশ্রামের জন্ত শুয়েছেন। বধু তখনও রান্নাঘরে, বিকেলের খাবারটা গুছিয়ে রাখতে ব্যস্ত। ছোট শাশুড়ি পাড়ায় গিয়েছেন, মহিমের মা ভিতর বারান্দায় মাদুর পেতে শুয়ে। হঠাৎ খিড়কির বাগানে ছেলেদের টেঁচামেচি, ভাঙা টিনের ও কাঠের বাজ্রে কাড়া-নাকাড়ার ডামাডোল— ছলুছুল ব্যাপার!—কিন্তু সব ছাপিয়ে ছবির তীক্ষ্ণ কণ্ঠের সরোদন চীৎকার—“ও ছোটকা, তোমার পায়ে পড়ি, ছেড়ে দাও—আমি আর রাবণ হব না—ও ছোটকা!—ওগো মাগো, ছোটকা আমার মেরে ফেললে গো”—সঙ্গে সঙ্গে রঙ্গমঞ্চে বাবা, ঠাকুরমা, মা-র উর্ধ্বাসে একত্র আবির্ভাব তথা ওদিকে বালখিল্যদের রণে ভঙ্গ। তারণের কান ধরে বড়দা ঘরে নিয়ে এলেন। তারপর জিজ্ঞাসাবাদে জানা গেল—আজ রাম-রাবণের বুদ্ধাভিনয়ের পালা, ঠিক করা ছিল। কথা ছিল ঠাকুরদের কেউ হবে রাবণ আর তারণচন্দ্র স্বয়ং রাম সীতা-হরণ করা হবে ছবিকে। তবে—রামায়ণের উদ্ধার পর্বটা একটু এগিয়ে নিয়ে—রাবণ ভিক্ষা নেবার ছলে

যে-ই সীতাকে চেপে ধরবে, অমনি অকুস্থলে রামচন্দ্র ছুটে এসে তার গলা ধরবেন। টিপে, এবং সেখানেই তুমুল রাম-রাবণী যুদ্ধ বাধিয়ে সীতার তখন-তখন উদ্ধার সেরে অযোধ্যায় রাজ্য হ'তে চ'লে যাবেন। কিন্তু সব ফাঁসালে ঐ কেষ্ঠা। সমস্তই ঠিক, অভিনয় শুরু হবে—এমন সময় ভয় পেয়ে ও এমন বেকে দাঁড়াল যে ওর দেখাদেখি দলের আর কেউই রাবণ হ'তে ভরসা পেল না। অগত্যা ছবিকেই রাবণ হ'য়ে কেষ্ঠাকে সাজাতে হ'ল সীতা—নইলে যে প্লে মাটি।—তারণের অপবাধ কী? যুদ্ধে মার খাওয়া যে রাবণের অদৃষ্টলিপি—সত্যি কি না জ্যোষ্ঠাইনাকে জিজ্ঞেস করে—সে কি রামায়ণ মিথ্যা ক'রে তাকে বাঁচিয়ে দিতে পারে? তবু তো সে রাবণকে মাটিতে ফেলে টুঁটি চেপে ধরেছিল মাত্র, একেবারে মারেনি। ছবিটা এমন বোকা, ভাবলে বুঝি সত্যিই মেরে ফেললে। সে নিজে রাবণ হ'লে হাজার মারলেও টুঁ শব্দটি করত না কি?

বৌদি বললে—“তা-ই কেন হ'লে না? মানাতোও ভালো, আর তোমার হুতুমানী দলটিও তখন স্বচ্ছন্দে সবাই মিলে গলা টিপে রাবণ-বধ করতে পারত—পাড়া জুড়ুত।”

—“হুঁ, তা পারি কখনো? রামচন্দ্র মহাবীর ছিলেন না? খুব ক'য়ে যুদ্ধ করবেন কিনি শুনি? ওরা কেউ পারে মোক্ষম লড়াই করতে?—তাই তো আমাকে—বৌদি, রামায়ণ তো পড়নি, তাই জানো না—”

বৌদি হেসে বললে—“বীরপুরুষ!”

রামায়ণী কথার পরিণাম দেখে জ্যোষ্ঠাইমা তো অবাক! সমস্ত শুনে মহিম হাসবেন কি বকবেন! খুঁড়িমা কখন এসে পিছন থেকে সব শুনেছেন—এখন এগিয়ে এসে বললেন, “মহিম, নিজের চোখে দেখলি তো সব? নিত্যি এই ব্যাপার—জালিয়ে খেলে! সারাদিন একটা-না-একটা লেগেই

আছে, মেয়েটাকে শুকু ডানপিটে ক'রে ছাড়লে। ওকে কি লিখতে পড়তে দিবিনে তোরা? বয়সও তো কম হয়নি ছেলের—শেষটা কি আকাট মুখ্য হ'য়ে থাকবে চিরটাকাগ?

মহিম বললেন—“খুঁড়িমা, স্কুলে দিলেই কি তোমার ছেলে রাতারাতি নিরীহ ঠুঁটো জগন্নাথ ব'নে যাবেন ভাবো? এখানে বরং ঘরের মেয়েকে রাবণ-বধ করছে, সেখানে পরের ছেলের কীচক-বধের দায় সামলাবেন কোন দায়রা?”

—“তবে কি করবি কর বাবা, বা ভালো বুঝি। ওকে সামলানো—সে আমার বাবা এলেও পারবে না।”

বৌদি বললে—“মেয়েটাও কি হয়েছে কম দস্তি না কি? না গো মা—চোপার দিন ছেলেদের সঙ্গে টো টো—এত খেলনা, পুতুল, পুঁথির-গয়নাপতুর এনে দিই, তা মেয়ের ও-সবে মনই ওঠে না।”

মহিম বললেন—“ক'দিনই বা দস্তিপনা করবে মেয়ে? যে ক'টি দিন একটুখানি বোরাকেরা করতে পারে, করেই নিক না—”

—“ও-ই-ই তো—তোমার প্রশ্ন আছে বলেই না—তোমার আর কি বলো না? তুমি তো বাড়ি থাকো না, মেয়েকে নিয়ে রাজ্যের লোকের দৃশ্য রঙম কথো শুনে হয় না—” বৃদ্ধ মুখভার ক'রে প্রশ্নান।

অনেক ভেবে মহিম তারণকে সহরে নিয়ে যাওয়াই ঠিক করলেন। এখানে স্কুলে দিলেও ওকে দেখে কে? ও কি কাউকে মানবে, না পড়াশুনা একটুও করবে? তাছাড়া অনেক দিন থেকে তাঁর ইচ্ছা ছিল মেয়েকেও যথাসম্ভব লেখাপড়া শেখাবেন। এইবার সকলের সকল রকম আপত্তি নাকচ ক'রে তিনি ওকে বোর্ডিংএ ভর্তি ক'রে দিলেন। তারণকে বাসায় নিজের সঙ্গে রেখে স্কুলে দেওয়া হ'ল।

অকস্মাৎ এরকম বনোবনো ছবি কতবার ভেবেছে : এমন জানলে সে কল্পনো কঁাদত না—ছোট কাকা যতই না তাকে রাবণ সাজিয়ে গলা টিপে ধরুক বা কাটবার জন্তে খাঁড়া ওঠাক। কিন্তু এখন তো হাজার সংস্কল্পেও আর আগের দিনগুলো ফিরে পাওয়া যায় না। বোর্ডিং ওর বয়সী মেয়ে অনেক, কিন্তু সবাই সারাক্ষণ যেন ওর পেছনেই লেগে আছে। লিচুটা পেয়ারাটা পাড়বার জন্তে গাছে চড়তে না চড়তে মেয়েরা চোখ কপালে তুলে ‘মাসী’কে নালিশ করতে ছোট। একটু যদি সাহস আছে ওদের! খেলার মধ্যে শুধু কড়ি, আগ-ডুম-বাগ-ডুম, কাণামাছি, লুকোচুরি—ছবির ও-সব একটুও ভালো লাগে না—কোনোদিনই লাগত না। ওর প্রাণটা থেকে থেকে কেবলই দেশের বাড়ির সেই বন-জঙ্গল, ডোবা-নালা, পুকুর-পাড় ও আমবাগানের আনাচে কানাচে ঘুরে বেড়ায়। সহরে মানুষ কী সুখেই বা থাকে! সে শুধু শুক্রবারের জন্তে দিন গোণে। শনি, রবি—হুদিন ছুটি। বাবা নিতে আসেন ও-ই সামনের গেটটার ওধারে যে বড় রাস্তা আছে, ওখান দিয়ে হেঁটে। বিকেলে চুল ঝেঁপে মুখ মুছে তৈরি হ’য়ে ছোট পোটলাটি হাতে নিয়ে দোতলার খোলা বগানদ্বায় গিয়ে দাঁড়ালেই সে বাবাকে আসতে দেখতে পায়। আর—এ কথা কিন্তু ওরা দুজনে ছাড়া আর কেউই জানে না—ছোটকা অনেক আগে থেকে গেটের ধারের ঐ মস্ত বকুল-গাছটার উপর উঠে ব’সে থাকে—দুবার ‘কু-উ’ ক’রে ছবিকে নিজের উপস্থিতির কথা সংকেতে জানায়। এ-কথা কাউকে বলার জো নেই, বুড়ো দরওয়ান জানতে পারলে কাকার কান ধ’রে নামিয়ে আনবে, আর কখনো কি উঠতে দেবে?

সে বাবার সঙ্গে হেঁটে হেঁটে যে-ই সরকারী হাঁসপাতালের কাছাকাছি এসে পৌছয়, অমনি কাকা কোথা হ’তে টুপ্ ক’রে এসে হাত ধরে।

বাবা মনে করেন—তারণ এইমাত্র খেলা শেষ ক’রে স্কুল থেকেই এল। ছবির এত হাসি পায়!—ভারি ইচ্ছা করে একবার জোরে হেসে নেয়, কিন্তু তার উপায় নেই—বাড়ি পৌছে কাকা ওর কানটা এমন ম’লে দেবে! —অগত্যা কাপড়ের পুঁটুলিটি বুকে চেপে ধ’রে পরম গম্ভীর মুখে পথ চলতে থাকে। মাঝে মাঝে বাবার পিছন পিছন এখানে ওখানে থামে, কাবুলি-ওয়ালার দোকান থেকে ফল, বাদাম—রাধুর সটল থেকে বিস্কুট, চকোলেট কিনে নিয়ে লালদীঘি ঘুরে, ফকির-সাহেবের পাহাড় পার হ’য়ে বাড়ি ফেরা।—

সপ্তাহের এই ছুটি দিন বড় স্নখে কাটে। দুপুরে বাড়িতে কেউ থাকে না। যে বুড়ো চাকরের উপর ওদের দেখাশুনার ভার দিয়ে মহিম কাজে চ’লে যান, সে অচিরেই বারান্দায় আরামে নাসিকাস্থানি করে। তখন দুজনে পা টিপে টিপে নিচে নেমে মায়। বাড়ির পিছনেই যে নালাটা নদী থেকে বরাবর বেরিয়ে এসে ঘুরে ঘুরে সহরের ভিতর অনেকদূর চ’লে গেছে, তাতে জোয়ারের সময় নদীর জল ঢুকে ফুলে কাঠের কারখানার বড় বড় চেলা-কাঠগুলোকে সারি সারি ওপরে ভাসিয়ে তোলে। তাদেরই মস্ত একখানাকে ডিঙির মতন ভেবে নিয়ে তারণ ছবিকে নিয়ে চেপে বসে। পড়বার ভয় নেই, ভেসেও যায় না— কারণ কাঠগুলো সবই মোটা মোটা দড়ি দিয়ে কারখানার খুঁটির সঙ্গে দিনরাত বাঁধা থাকে। যেদিন নদীতে ভাঁটা, সেদিন নালায় এককোঁটা জলও থাকে না। রোদের তাপে চেনা-অচেনা নানান মাছ আর মৎস্ত-শিশুরা ধড়ফড় ধড়ফড় ক’রে ঠাণ্ডা কাদার বুক খুঁড়ে একেবারে ভিতরে ঢুকবার চেষ্টা করে। তারণ কাঠের ওপর চুপটি ক’রে বসে নিবিষ্টমনে চেয়ে থাকে, যে-ই মাছ নড়তে দেখে অম্নি একতাল কাদা ভুলে ছবির

সামনে ফেলে দেয়—সে তা আঙ্গুল দিয়ে ঘেঁটে ঘেঁটে মাছ উঠল কি না দেখে। কোনো কোনো দিন আবার তারণ মাটি খুঁড়ে কেঁচো নিয়ে আসে। একটা লাঠির আগায় সরু স্রতো বেঁধে, সেই স্রতায় কেঁচো বেঁধে মাছ ধরতে যায়। ছবির কিন্তু এ-খেলাটির উপর অত্যন্ত বিতৃষ্ণা, ছোটকাকার ভয়েও সে কেঁচো ধরতে রাজি নয়। কোনোমতে একবার হোঁয়া গেলে ঘ'সে ঘ'সে হাজার হাত ধোও—মনে হবে যেন হাতে লেগে রয়েছে। রাত্রে খাবার সময় কাকার হাতের দিকে তাকিয়ে গা-কেমন করে।

আর একদিন খাওয়াদাওয়ার পর শবু তেমনি নাক ডাকাচ্ছে। তারণ বললে, “আগরে ছবি, একটা মজা দেখবি আয়।” শবুর পাশেই নাহুরের ওপর কাগজে জড়ানো গোটাকয়েক বিড়ি আর দেশলাইয়ের বাস্র রোজ্জই থাকে। একটা বিড়ি আর দেশলাই নিয়ে দু'জনে নালাতে নেমে পাঁশাপাশি বসলে। তারণ বিড়ি মুখে দিয়ে বলল—“ধরিয়ে দে।” অনেকগুলো কাঠি খরচের পর অনেক কষ্টে বিড়িটা জ্বালায় হ'লে তারণ একটানে অনেকখানি বোঁয়া বের ক'রে দেখালে। ছবির ক্রান্ত পেতে বললে—“এবার আমায় দাও।”

—“না, তুই পারবিনে, পুড়ে যাবি।”

সে জেদ ক'রে বললে, “না, দাও—খুব পারব, দেখো তুমি।” ততক্ষণে বিড়ির পাতা পুড়ে শেষ হ'য়ে তামাক পুড়তে আরম্ভ করেছে। ছবি জোরে টান দিতে না দিতেই—ইস্, দুনিয়াটা যেন চোখের উপর যুর্ছে, গাছপালা, নদী-নালা, সামনে ও-ই গরুটা—ছোটকাকা—ছবি সেখানেই শুয়ে পড়ল : একটু আগেই ভাত খেয়েছিল, তার কিছুই আর জঠরস্থ রইল না। তারপর থেকে সে তামাকের গন্ধও সহ করতে পারে না।

এ-সব ক্রীড়া-কৌতুকের কথা, কিন্তু মহিমের কানে গেলে বড় মুষ্টিলি বাধে : তার পরের হাওয়া ছবিকে আর বাড়িয়ে আনা হয় না। তাই শ্বাস-সাবধানে সব সারতে হয়। ও কতরকম ক'রে ব'লে দেখেছে, কিন্তু বাবার যে কেমন জেদ—কিছুতেই তাকে কাকার সাথে একসঙ্গে বাড়িতে রাখবেন না—বোর্ডিংএ ওর কত কষ্ট হয়—তবু না।

প্রথম বছর গরমের ছুটিতে দুজনে একসঙ্গে বাড়ি এসেছে। তারপরে পুকুরের জল আর গাছের ডালে ছাড়া অন্ত্র কোথাও খুঁজেই পাওয়া যায় না। কাঁঠাল পেড়ে গাছে ব'সে ভেঙে গাছেই খেয়ে আসে। ছবি অতটা পারে না, গাছে উঠে নিচের দিকে তাকালে মাথাটা ওর কেমন করে, পায়ের তলায় কে যেন স্ফুটস্ফুটি দেয়। ওর চুলগুলো—এরই মধ্যে বেশ লম্বা হয়েছে, ভিজলে আর শীগগির শুকোতে চায় না। বাড়ির ভিতরদিকটায় পা দিতেই ঠাকুরমা ধ'রে ফেললেন—“আবার ডুক দিয়ে এসেছ? এই অবেলায় চান ক'রে এলেন মেয়ে—কোনদিন ওর মরবেন—ব'লে দিলাম, লিখে রাখো”—কথাটা মা-র কানে গেলে কিন্তু অত সহজে নিস্তার নেই।—অনেক ভেবে তারপা একটা ফন্দি এঁটে ছবিকে বললে। সে তো আল্লাদে চোঁষটিখানা!...

পরদিন দুপুরে ভাত খেতে এলে মা খানিকক্ষণ আর কথা বলতে পারলেন না। পুরে কানটি ধ'রে দালানে বাবার সামনে এনে—“নাও সামলাও তোমার মেয়েকে তুমি, আমি তো আর পারি না। দেখ একবার—”



বাবা মুখ তুলে চেয়ে দেখেই হেসে উঠলেন : “যাক্ গে, আপদ গেছে। ছেঁড়ে দাও, চুল তো দুদিনেই গজাবে আবার!”—

কিন্তু কথায় বলে, চিরদিন কারো সমান যায় না। এ-হেন মেয়েও ক্রমে বোড়িং-বাসে অভ্যস্ত হ’য়ে পড়ল। বয়সের সঙ্গে সঙ্গে খেলাধুলোর চাইতে লেখাপড়ায় ওর আগ্রহ বাড়ি—ফি বৎসর ক্লাসের ফার্স্ট প্রাইজটি পাওয়া চাইই। স্বভাবও অনেকটা শান্ত সংযত হ’য়ে এসেছে; এখন দেখলে সেই রুক্ষ মাথা, আধো-শাড়ী আধো-ধুতি ক’রে অভিনব ধরণে কাপড়-পরা দুর্দান্ত মেয়েটিকে ওর মধ্যে খুঁজে পাওয়াই মুশ্কিল। ছুটিতে গ্রামে এলে বাড়ি বাড়ি নিমন্ত্রণ রক্ষা ক’রে বেড়াতে ওর অর্ধেকটা দিন কেটে যায়।

তারণের কিন্তু পড়াশুনার চাইতে ড্রইংএ আর ছবি আঁকাতে রোঁক বেশি। দেখে অপূর্ব ঠিক করেছে ওকে কলকাতায় আর্ট স্কুলে ভর্তি ক’রে দেবে। স্কুলের সে সেরা খেলোয়াড়—ফুটবল, ক্রিকেট—হকি-খেলায় একেবারে বিক্রমসিংহ। ছুটির দিনগুলো সাঁতার কেটে, গ্রামের ছেলেদের নিয়ে দল বেঁধে মাঠে মাঠে খেলে বেড়ায়। খুব রোদ থাকে ব’লে হুপুরে বাইরে যেতে পারে না—সে-সময়টা ব’সে ব’সে ছবি আঁকে। শিশু ছবিকে সেই দোল দেওয়ার সময়কার মত শুধু এসময়টা সে আশ্চর্যরকম শান্ত।

ছবি মনে করে ওর ছোটকাকার মত ছবি তিনভুবনে কেউ কখনো আঁকেনি—আঁকতে পারবেও না। সে যাকে তাকে বলবে,—বিনা সাহায্যে এত অল্প বয়সে এমন প্রতিভা ক’জনের দেখা যায়?—সময় পেলেই ব’সে

ব'সে একমনে কাকার ছবি-আঁকা দেখে আর ছোট-ঠাকুরমার কাছে গিয়ে গর্কে, মেহে উচ্ছ্বসিত হ'য়ে বিজ্ঞানাগরের সঙ্গে কাকার মুখের আদল কতখানি সে নিয়ে গভীর গবেষণা করা চাই। তখনকার দিনে বিজ্ঞানাগরের থেকে বড় আদর্শ ছবি কল্পনাও করতে পারত না।

দিনগুলো এমনি শান্তি আর নিরবচ্ছিন্ন আনন্দের মধ্যেই কেটে যাচ্ছে, এমন সময় এক অঘটন ঘটল।

একদিন গ্রামের দক্ষিণ-দিকের নাঠে ফুটবল খেলতে গিয়ে তারণের সঙ্গে ও-পাড়ার রহিম সর্দারের ছেলে কাদেরের বাধল বিষম ঝগড়া! তারণের দল ছিল ভারি, তাই কাদের সেদিন কিছুই করতে পারলে ন্ন। কিন্তু মনে রেখে দিল।

দিন কয়েক পরে—খবর পেয়ে সন্ধ্যার সময় বাড়ি থেকে লোক গিয়ে নাঠের আলের উপর তারণকে অস্ত্রান অবস্থায় পেল। তারপর কিছুদিন জর, প্রলাপ—বনে মানুষে টানাটানি। এযাত্রা বেঁচে উঠল বটে, কিন্তু এত দুর্বল যে, ছুটির পরে ঘুমবার আর স্কুলে ফিরতে পারলে না।

এর পর থেকে তারণের একটা-না-একটা অস্থখ লেগেই থাকে। শরীরের সেই নিটোল পরিপুষ্টিতা য'রে গিয়ে দিন দিনই রোগা আর বিবর্ণ হ'য়ে যাচ্ছে...অবশেষে ভালো ডাক্তার ডেকে পরীক্ষা করানো হ'ল : আর সন্দেহ রইল না। তারণের জন্মের বছরখানেক পরেই নাকি ওর বাবা যক্ষ্মারোগে মারা বান! সকলের বড় বোনটিরও একই রোগে বিদেশে মৃত্যু হয়। মহিমকে বাধ্য হ'য়ে তারণের পড়াশুনা বন্ধ ক'রে দিতে হ'ল।

ছবি কিন্তু আসল ব্যাপারের কিছুই জানল না ! দেশে এ-সব রোগের কথা একটু কাউকে বলে না, যতদূর সাধ্য গোপন ক'রে রাখে—বিশেষত 'ছেলেমানুষ'দের কাছ থেকে । ওকে শুধু প্রবোধ দেওয়া হ'ল, কাকার বড় বেশি জর হচ্ছে, তাই এখন ঠাকুরমার কাছে থাকবে—সেরে উঠলে একেবারে কলকাতায় যাবে ।

মহিমের সংসারে এখন অনেক পরিবর্তন । তাঁর মা মারা যাওয়ার পরে অপূর্বের বিয়ে দিয়ে নতুন-বোকে খুড়িমার সঙ্গী-হিসেবে রেখে স্ত্রীকে নিয়ে তিনি আজকাল সহরের বাড়িতেই থাকেন । কালে-ভদ্রে পূজা-পার্বণ উপলক্ষে আসেন গ্রামে । অপূর্ব চাকরি করে দূর বিদেশে

ছবি ওরফে আরতি এখন কলকাতায় কলেজে পড়ে । মা বাবা সহরেই থাকায় সে ছুটিতে আর গ্রামে আসতে পায় না । তাছাড়া এত বড় মেয়ের এখনো বিয়ে না হওয়ায়—বা মহিম জেদ ক'রে না দেওয়ায়—গ্রামে এলেই রকমারি অপ্রীতিকর আলোচনা হয় । আসতে না দেবার সে-ও একটা কারণ । তাই ও আস্তে আস্তে দেশের বাড়ির কথা ভুলতে আরম্ভ করেছে । সেই পাড়ার ছেলেদের সঙ্গে হুড়োহুড়ি, ছুটোছুটি, ছোটকাকার চেলা হ'য়ে যতরকম অনর্থসৃষ্টি দোরাগা—সে-সব কদাচিৎ কখনো মনে পড়লে হাসি পায়, লজ্জাও করে । ওর সামনে এখন নতুন জীবন, নতুন আশা, কত নব নব সমস্যা । ভিতর বাইরের দ্রুত উজ্জ্বল পরিবর্তন । পড়াশুনার ফাঁকে যে স্বল্প সময়টুকু হাতে পাওয়া যায়, তা মিস দত্ত, মিস রাহা, চাকর, লতা দি, ফুল, পিণ্টু প্রভৃতি কত বান্ধবী,

সখী 'ও পূজাহীদের দিয়ে ভরাট। ওর অকসর কোথায়-যে অতীতের স্মৃতি আঁকড়ে প'ড়ে থাকবে? শুধু রবিবারের অলস মধ্যাহ্নে আর নামে নামে বাবাকে চিঠি লেখার সময় ছোটিকাকার কথা মনে ভেসে আসে খোলা সাগরতীরে দম্কা হাওয়ার ম'ত।

প্রথম প্রথম তারণ মনে করত ছবি গরমের ছুটিতে না' এলেও অন্তত পূজোর ছুটিতে আসবেই। কিন্তু আজ দুবছরের ওপর হ'তে চলল—সে আর বাড়িমুখোই হয় না। মার কাছে শুনেছে আসতে দেওয়া হয় না। এমনটা যে হবে তারণ স্বপ্নেও ভাবেনি। ওর দিন যেন আর কাটতে চায় না। এই রোগে তো কেউ হঠাৎ মরে না, এ যে তিল তিল ক'রে জীবনের রস নেয় শুবে—রস-নিংড়ানো ইক্ষুর মত শেষে একদিন নিপ্রাণি খোলসখানি থাকে প'ড়ে। সে ভাবে—ছবিই বা কেন জোঁস ক'রে আসে না, হ'লই বা একটু নিন্দা, বললেই বা পাড়ার লোকে ঢুটো কথা! এলে ওকে দিয়ে বড়দাকে বলাতে পারত—কলকাতায় চিকিৎসার জন্তে নিয়ে যেতে। ওখানে গেলে নিশ্চয় ভালো হ'য়ে যাবে—এখানে কবিরাজের ওষুধ কত থাকে আর? বড়ডাক্তার দিয়ে চিকিৎসা করাতে ইচ্ছা করে, কিন্তু তার জন্তে টাকা চাই—কোথায় পাবে?—আঃ, এখন কলকাতায় অসহযোগের মাতামাতি—এই দূর পল্লীতেও তার ঢেউ এসে প্রাণে লাগে। জোলা তাঁতির দর বেড়ে বাচ্ছে বৈ কি; তারণ ভুলেও আর বিলিতি কাপড় কেনে না। ওর ভাবি ইচ্ছা করে, সমবয়সী ছেলেদের মত সেও দেশের কাজ ক'রে বেড়ায়। কিন্তু—দেশের কাজ মানে কি?—ছবি এলে জিজ্ঞেসা করত ও কী বলে, ওর মত কী? আশ্চর্য্য যে, এত গোলমালেও সে এখনও কলেজ বরকট করেনি, কাগজে

তো কত মেয়েদের নাম-দেখেছে!—দিনগুলো যেন ওর বুকের ব্যথাটার মতই ভারি—একমিনিট হালকা হ'য়ে ওকে একটু স্বস্তি দেয় না। এমন জীবন্ত হ'য়ে আরো কতদিন থাকতে হবে কে জানে?—

\* \*  
\*

কলেজে সেদিন কিসের ছুটি। সামনেই একটা পরীক্ষা, তাই বোর্ডিংএর মেয়েরা এখানে-সেখানে যে-যার মনোমত জায়গায় বই হাতে তুল্লয়। ছুটির দিনে আরতির পড়াশুনো একটুও ভালো লাগে না—পরীক্ষাকে মনে হয় একটা অনাবশ্যক উপদ্রব ব'লে। কলেজের বাড়ির পিছনের গ্রাউণ্ডে একটা পুরোণো ম'জে-যাওয়া পুকুর—চার পাড়েই তার অনেক কালের বড় বড় গাছ। অমন চমৎকার সবুজ 'লন', ফুল আর পাতাবাহারের বাহার ফেলে অব্যাহত মন তার কেবলই সেই পুকুরের আনাচে-কানাচে ঘুরে বেড়ায়। প্রকৃতির বিস্ময় বেশের মধ্যে ওর প্রাণটা নিতান্ত ছাড়া পায়। পুকুরের ঘন শৈবাল, ফাঁকে ফাঁকে জলের মধ্যে দু-একটি কুমুদ কল্লার, পাড়ের ধারে হিঞ্চে ও কলমীশাক, ছোট ছোট বন-কচুর ঝোপ, ঘাস-গুচ্ছের সাদা, বেগুনি ও নীল রঙের রকমারি ক্ষুদ্র তুচ্ছ ফুল ওর আবাল্য-পরিচিত গ্রামখানির পথ-ঘাট, পুকুরের কথা মনে করিয়ে দেয়। কিন্তু এসবের মধ্যে এত কী দেখবার আছে সঙ্গী মেয়েরা বুঝতে পারে না—ঠাট্টা ক'রে বলে—“আরতি আন জাম আর কাঁচা তেঁতুলের লোভে ওখানে যায়—দৈবাৎ এক আধটা প'ড়ে আছে কি না দেখতে।” প্রিন্সিপালও ওর এই বুনো জায়গার প্রতি প্রীতি লক্ষ্য করেছিলেন। তবে তিনি ভাবতেন—“ভালোই, একলা ব'সে পড়াশুনো করতে চায় তো করুক।” কিন্তু বই-হাতে গেলেই যে পড়তে যাওয়া না হ'তে

পারে, ভালোমানুষ মেমের সে সজ্জাই হয়নি। আরতি অধিকাংশ সময়ই কবেকার বাঁধানো জীর্ণ ঘাটখানির জলের সবচেয়ে কাছের ধাপে বসে থাকে। পড়তে চেষ্টা করে বটে, কিন্তু এখানে এলেই কী এক উদাস-ভাব ওকে কেবলই অশ্রুমনস্ক করে দেয়। কলেজ ও তার সংলগ্ন স্কুল-বাড়ি ছুটির দিনে নিস্তব্ধ নিঝুম পড়ে—যেন রূপকথার ঘুমন্ত রাজপুত্রী, তরুণ-প্রাপের সোনার কাঠির স্পর্শে জাগন্ত মুহূর্তের পথ চেয়ে!... আর, এই বন-বাদাড়, শুকনো পাতার রাশি, পুকুরের সবুজ শ্রাওলা, তারি উপর এক-এক-সময় কোথা-হ'তে-উড়ে-এসে-বসা ছোট্ট অচিন ঐ পাখিটা... এ-সবে যেন কী জাহ্ন আছে। ওর মনে হয় জন্ম জন্ম এমনি কোন্ আবেষ্টনীর মধ্যে ছিল সে—ঋষি-বালিকার মত। ও-ই মহানগরীর সভ্য সৌধমালা এবং তাদের অভ্যন্তরে আজকের সূন্যতা মানবের শত শৃঙ্খলা-সজ্জিত কক্ষের পর কক্ষ, বিলাস-প্রকরণ, অতি সতর্ক জীবনস্বথাত্রা, সব ওর নিতান্ত অপরিচিত অর্থহীন মনে হয়। ও-সবের কিছুই যেন আরতির প্রদত্ত আপন নয়, ভালো থাকে সে অনাবৃত্তা প্রকৃতি-মাতার মৌন-ভাষাময়ী শান্তির মধ্যে—রুম্মা ধরণীর নীরব কোলে।—তবু—

—“কি লো আরতি, এত কী কবিত্ব করা হচ্ছে হাঁ করে ঐ পচা পানার দিকে তাকিয়ে? ডাকলে সাড়াই নেই—এই নে, তোর চিঠি।—বাবা, কী পছন্দ মেয়ের—বরে বসে পড়া তৈরি করবেন?—শ্রীমতী আরতি দেবী—বি-এ-তে ফাষ্ট ক্লাস ফাষ্ট?”

আরতি হাসল। উঠে দাঁড়িয়ে—“বেশ চুপচাপ জায়গাটা লতাদি, ভারি ভালো লাগে আমার—”

—“তা তো দেখতেই পাচ্ছি। আচ্ছা, চললুম এখন—আমার আবার ঢের কাজ পড়ে। মিস্ দত্ত ডেকে বললেন চিঠিখানা তোকে

দিতে—তাছাড়া তোর তপস্যাটাও একবার স্বতক্ষেপে দেখে বাবার মস্ত বৈকি। কেবল—বল না ভাই চুপি চুপি—গালে হাত দিয়ে তুই এত কায় তপস্যা করছিলি কে—ও কি রে?”

আরতি ধপ্ করে ঘাটে বসে পড়েছে। লতিকা উদ্ভিগ্নকণ্ঠে বললে—“কী হ’ল? কোনো খারাপ খবর না কি?” তাড়াতাড়ি চিঠিখানা হাত থেকে টেনে নিয়ে পড়লে “ছবি, তুমি নিশ্চয় একবার বাড়ি এসো। আমার শরীর গেছে ভেঙে। অসুখ থাইসিস—এদেশে যার চিকিৎসা নেই। লোকে কাণা-যুগো করে আমি নাকি আর বেশিদিন বাঁচব না। মোটে একুশ বছর বয়স আমার, জীবনে কত আশা কত আকাঙ্ক্ষা—বাঁচতে আমার কী ভয়ানক সাধ—কেন আমি মরব? ভগবানের কাছে আমার জন্তে প্রার্থনা করো আরতি। বড়দাকে বোলো কলকাতায় গিয়ে চিকিৎসা করাবার জন্তে টাকা পাঠাতে—এমন করে মরতে দেবে আমার? ইতি তোমার ছোটুকা।”

পরদিন বাড়ি থেকে ওর টেলিগ্রামের জবাব এলো—“তারুণের অসুখ শক্ত বটে, কিন্তু এফুনি কোনো ভয় নেই। তুমি পরীক্ষাটা নিয়েই এসো।”

জন্মাবধি খেলার সাথী, বাল্যের বন্ধু, না-বাপের একমাত্র সন্তান, আরতির ভাইয়ের বাড়ি—সে আজ মৃত্যুশয্যায়—তবু ওকে দিতে হবে পরীক্ষা, থাকতে হবে অপেক্ষা করে সময়ের জন্তে! কী যে পরীক্ষা দিল তা ও-ই জানে। কোনোন্যতে শেষ করে—সহরে রওনা হ’ল। মনে মনে কত ভাবনা—কি জাঙ্গি বেঁচে আছে কি না, একবার শেষ দেখাও হ’বে কি না। কতদিনের পর! নাঃ—এমন হ’তেই পারে না, মৃত্যু কি এতই সহজ? ভগবান কি নেই?—জোর করে যত কুভাবনা সে মন থেকে ঝেড়ে ফেলে দেয়।

## ভাঙা-গড়া .

রাত্রে টেনে তন্ত্রার ঘোরে স্বপ্ন দেখে—ছোট কাকা সামনে দাঁড়িয়ে হাসছে। আরতি রাগ ক'রে বলে—যাও, তোমার কোনো অসুখ নী। মিথ্যে আমাকে ভয় দেখিয়ে—কিন্তু এ কী! কাকার চোখ ; কী অদ্ভুত বিষণ্ণ! আরতির মুখের উপর ওর সেই বড় বড় চৌথের স্ত-করণ দৃষ্টি রেখে কি যেন বলতে গেল—একটা কি শব্দে ধড়মড় ক'রে গে উঠে আরতি দেখে কেউ কোথাও নেই। পাশের বেঞ্চিতে ওর খর সঙ্গী বউটি তার খোকাকে বুকের কাছে সন্তর্পণে টেনে নিয়ে নিয়ে। একবার মনে হ'ল ডাকে, কিন্তু কি ভেবে চূপ ক'রে ব'সে ল। সে রাতে ওর চোখে শুম আর এলো না।

সকালে ষ্টেশনে চিরদিনের প্রথমত দরোয়ানই নিতে এসেছে। ভয়ে আরতি ওকে একটা কথাও জিজ্ঞাস করতে পারল না...পাছে কি শুনতে ক শোনে।

গেটের কাছে গাড়ি এসে থামতেই দেশের বাড়ির সরকার বেরিয়ে এলো। “প্রসাদ-দা, আপনি যে এখানে? বাবা কই?”

—“এস দিদি, ভেতরে এসো। ওঁরা বাড়ী গেছেন, আমি কাল সন্ধ্যায় এসে পৌঁছেছি—তোমায় নিয়ে যাবো এই জোয়ারেই। মুখে হাতে জল—”

—“এই জোয়ারেই? কেন?” আরতি আর বলতে পারে না, স্বপ্নের কথা মনে হ'ল—জিত শুকিয়ে তালুতে যেন আটকে গেছে!

—“মুখ হাত ধুয়ে ঠাণ্ডা হও—সারারাত গাড়ীর কষ্ট—রাত্রে কিছু খাওনি বোধ হয়—”

—“না, কিন্তু বলুন আপনি—”



## বিলেতে দেশটির মাটির

—“বলছি দিদি, বলছি যে তুমি দাঁড়িয়ে না—”

—“না, একুনি বলুন—”

সরকার একটু চুপ করে থেবে ওর পিঠে হাত রেখে বললে—“বলব, আর আছে কী দিদি? না, হিঁ ছেলেমানুষি করে না, হিঁ, হিঁ, কী দিদি—দিদি, ওঠো। ওর কি আর প্রমায়ু ছিল—ছেলেবেলা হ’তে দেখছি তো? শৈতুক রোগ—আর যে কাল-রোগ।”

নৌকার উঠে আরতি হঠাৎ জিজ্ঞেস করল—“কখন?”

সরকার চমকে বললে—“কি—কখন?—ওঃ, পরশু ভোর রাতে। তুমি দিদি, এলেই যদি—আর দুটো দিন আগে এলেই চোখের দেখাটা পেত—বাকুরোধ হবার আগে পর্যন্ত কেবল তোর কথা—‘ছিঁ এলো, মা’ এখনো এলো না সে’—না, অমন করলে তো আমি বলব না—”

ছোটকার জীবনের শৈশবে তাকে দেখে কত লোকে কত কথাই বলেছে... আরতি ভাবে... কত আন্দাজই করেছে তার ভবিষ্যৎ জীবনের... কত ভাঙা-গড়া... কত জন্ম-কল্ম... ..

শেষ





